

欽定唐書

卷一百十六之二百二十一



土岐文庫

文庫17

W202

30

三十



文庫 17
W202
30

唐書卷二百十六上

宋 端 明 殿 學 士 宋 祁 撰

列傳第一百四十一上

吐蕃

吐蕃本西羌屬蓋百有五十種散處河湟江岷間有發羌唐旄等然未始與中國通居析支水西祖曰鶻提勃悉野健武多智稍并諸羌據其地蕃發聲近故其子孫曰吐蕃而姓勃窣野或曰南涼禿髮利鹿孤之後二子曰樊尼曰偃檀偃檀嗣為乞佛熾盤所滅樊尼挈殘部臣沮渠蒙遜以為臨松太守蒙遜滅樊尼率兵西濟河逾積石遂撫有羣羌云其俗謂疆雄曰贊丈夫曰普故號君長曰贊普贊普妻曰末蒙其官有大相曰論莖副相曰論莖扈莽各一人亦號大論小論都護一人曰悉編擊通又有內大相曰曩論擊通亦曰論莽熱副相曰曩論覓零通小相曰曩論充各一人又有整事大相曰喻寒波擊通副整事曰喻寒覓零通小整事曰喻寒波充皆任國事總號曰尙論擊通突瞿地直京師西八千里距鄯善五百里勝兵數十萬國多霆電風雹積雪盛夏如中國春時山谷常冰地有寒癘中人輒瘖促而不害其贊普居跋布川或邈娑川有城廓廬舍不肯處聯羸帳以居號大拂廬容數百人其衛候嚴而牙甚隘部人處小

乾隆四年校刊

唐書卷二百十六上列傳

010185143808

昭和六十年二月一日
土岐子吉唐氏寄

拂廬多老壽至百餘歲者衣率氈韋以赭塗面爲好婦人辨髮而縈之其器屈木而韋底或氈爲槩凝鈔爲盤寶羹酪并食之手捧酒漿以飲其官之章飾最上琴瑟金次之金塗銀又次之銀次之最下至銅止差大小綴臂前以辨貴賤屋皆平上高至數丈其稼有小麥青稞麥蕎麥登豆其獸犛牛名馬犬羊羆天鼠之皮可爲裘獨峯馳日馳千里其寶金銀錫銅其死葬爲冢墜塗之其吏治無文字結繩齒木爲約其刑雖小罪必抉目或刖劓以皮爲鞭挾之從喜怒無常算其獄窟地深數丈內囚于中二三歲乃出其寔大賓客必驅犛牛使客自射乃敢饋其俗重鬼右巫事獯羆爲大神喜浮屠法習呪詛國之政事必以桑門參決多佩弓刀飲酒不得及亂婦人無及政貴壯賤弱母拜子子偁父出入前少而後老重兵死以累世戰沒爲甲門敗懦者垂狐尾於首示辱不得列于人拜必手据地爲犬號再揖身止居父母喪斷髮黛面墨衣既葬而吉其舉兵以七寸金箭爲契百里一驛有急兵驛人臆前加銀鶻甚急鶻益多告寇舉烽其畜牧逐水草無常所其鎧冑精良衣之周身竅兩目勁弓利刃不能甚傷其兵法嚴而師無餽糧以鹵獲爲資每戰前隊盡死後隊乃進其四時以麥熟爲歲首其戲碁六博其樂吹螺擊鼓其君臣自爲友五六人曰共命君死皆自殺以殉所服玩乘馬皆瘞起大屋豕顛樹衆木爲祠所贊普與其臣歲一小盟用羊犬猴爲牲三歲一大盟夜看諸壇用人馬牛驢爲牲凡牲必折足裂腸陳于前使巫告神曰渝盟者有

如牲其後有君長曰瘦悉董摩生陀土度陀土生揭利失若揭利生勃弄若勃弄生詎素若詎素生論贊素論贊生棄宗弄贊亦名棄蘇農亦號弗夜氏其爲人慷慨才雄常驅野馬犛牛馳刺之以爲樂西域諸國共臣之太宗貞觀八年始遣使者來朝帝遣行人馮德遐下書臨撫弄贊聞突厥吐谷渾並得尙公主乃遣使齎幣求昏帝不許使者還妄語曰天子遇我厚幾得公主會吐谷渾王入朝遂不許殆有以間我乎弄贊怒率羊同共擊吐谷渾吐谷渾不能亢走青海之陰盡取其貲畜又攻党項白蘭羌破之勒兵二十萬入寇松州命使者貢金甲具言迎公主謂左右曰公主不至我且深入都督韓威輕出覬賊反爲所敗屬羌大擾皆叛以應賊乃詔吏部尙書侯君集爲行軍大總管出當彌道右領軍大將軍執失思力出白蘭道右武衛大將軍牛進達出關水道又領軍將軍劉蘭出洮河道並爲行軍總管率步騎五萬進討進達自松州夜襲其營斬首千級初東寇也連歲不解其大臣請返國不聽自殺者八人至是弄贊始懼引而去以使者來謝罪因請昏許之遣大論薛祿東贊獻黃金五千兩七寶稱是以爲聘十五年妻以宗女文成公主詔江夏王道宗持節護送築館河源王之國弄贊率兵次柏海親迎見道宗執壻禮恭甚見中國服飾之美縮縮媿沮歸國自以其先未有昏帝女者乃爲公主築一城以夸後世遂立宮室以居公主惡國人藉面弄贊下令國中禁之自襪氈罽絛綃爲華風遣諸豪子弟入國學習詩書又請備

者典書疏帝伐遼還使祿東贊上書曰陛下平定四方日月所照並臣治之高麗恃遠弗率於禮天子自將度遼隳城陷陳指日凱旋雖鴈飛于天無是之速夫鵝猶鴈也臣謹冶黃金爲鵝以獻其高七尺中實酒三斛二十二年右衛率府長史王玄策使西域爲中天竺所鈔弄贊發精兵從玄策討破之來獻俘高宗卽位擢駙馬都尉西海郡王弄贊以書詒長孫無忌曰天子卽位下有不忠者願勒兵赴國共討之并獻金球十五種以薦昭陵進封寶王賜餉蕃渥又請蠶種酒人與碾磑等諸工詔許承徽初死遣使者弔祠無子立其孫幼不事故祿東贊相其國顯慶三年獻金盃金頗羅等復請昏未幾吐谷渾內附祿東贊怨忿率銳兵擊之而吐谷渾大臣素和貴奔吐蕃慧以虛實故吐蕃能破其國慕容諾曷鉢與弘化公主引殘落走涼州詔涼州都督鄭仁泰爲青海道行軍大總管率將軍獨孤卿雲等屯涼鄯左武侯大將軍蘇定方爲安集大使爲諸將節度以定其亂吐蕃使論仲琮入朝表吐谷渾罪帝遣使者譙讓乃使來請與吐谷渾平憾求赤水地牧馬不許會祿東贊死東贊不知書而性明毅用兵有節制吐蕃倚之遂爲疆國始入朝占對合旨太宗擢拜右衛大將軍以琅邪公主外孫妻之祿東贊自言先臣爲聘婦不敢奉詔且贊普未謁公主陪臣敢辭帝異其言然欲懷以恩不聽也有子曰欽陵曰贊婆曰悉多于曰勃論祿東贊死而兄弟並當國自是歲入邊盡破有諸羌羈縻十二州總章中議徙吐谷渾部于涼州旁南山帝

刈吐蕃之入召宰相姜恪閣立本將軍契苾何力等議先擊吐蕃立本曰民饑未可以師何力曰吐蕃介在西極臣恐師到獸竄山伏捕討無所得至春復侵吐谷渾臣請勿救使疑吾力困而驕之一舉可滅也恪曰不然吐谷渾方衰吐蕃負勝以衰氣拒勝兵戰必不亢不救則滅臣謂王師亟助之使國幸存後且徐圖可也議不決亦不克徙咸亨元年入殘羈縻十八州率于闐取龜茲撥換城於是安西四鎮並廢詔右威衛大將軍薛仁貴爲邏娑道行軍大總管左衛員外大將軍阿史那道真左衛將軍郭待封副之出討吐蕃并護吐谷渾還國師凡十餘萬至大非川爲欽陵所拒王師敗績遂滅吐谷渾而盡有其地詔司戎太常伯同東西臺三品姜恪爲涼州道行軍大總管出討會恪卒班師吐蕃遣大臣仲琮入朝仲琮少游太學頗知書帝召見問曰贊普孰與其祖賢對曰勇果善斷不逮也然勤以治國下無敢欺令主也且吐蕃居寒露之野物產寡薄烏海之陰盛夏積雪暑暍冬裘隨水草以牧寒則城處施廬帳器用不當中國萬分一但上下一力議事自下因人所利而行是能久而疆也帝曰吐谷渾與吐蕃本甥舅國素和貴叛其主吐蕃任之奪其土地薛仁貴等往定慕容氏又伏擊之而寇我涼州何邪仲琮頓首曰臣奉命來獻它非所聞帝聽其答然以仲琮非用事臣故殺其禮上元二年遣大臣論吐渾彌來請和且求與吐谷渾脩好帝不聽明年攻鄯廓河芳四州殺略吏及馬牛萬計乃詔周王顯爲洮州道行軍元帥率工部尙

書劉審禮等十二總管以相王輪為涼州道行軍元帥率左衛大將軍契苾何力鴻臚卿蕭嗣業等軍討之二王不克行吐蕃進攻疊州破密恭丹嶺一縣又攻扶州敗守將乃高選尚書左僕射劉仁軌為洮河鎮守使久之無功吐蕃與西突厥連兵攻安西復命中書令李敬玄為洮河道行軍大總管西河鎮撫大使鄯州都督代仁軌下詔募猛士毋限籍役痕負帝自臨遣又敕益州長史李孝逸壽州都督拓王泰益發劍南山南士先戰龍支吐蕃敗敬玄率劉審禮擊吐蕃青海上審禮戰沒敬玄頓承風嶺礙險不得縱吐蕃壓王師屯左領軍將軍黑齒常之率死士五百夜斧其營虜驚自相輔藉而死者甚眾乃引去敬玄僅脫帝既懦仁無遠略見諸將數敗乃博咨近臣求所以禦之之術帝曰朕未始擐甲履軍往者滅高麗百濟比歲用師中國騷然朕至今悔之今吐蕃內侵蓋為我謀中書舍人劉禕之等具對須家給人足可擊也或言賊險黠不可與和或言營田嚴守便惟中書侍郎薛元超謂縱敵生患不如料兵擊之帝顧黃門侍郎來恆曰自李勣亡遂無善將恆即言向洮河兵足以制敵但諸將不用命故無功帝殊不悟因罷議儀鳳四年贊普死子器弩悉弄立欽陵復擅政使大臣來告喪帝遣使者往會葬明年贊婆素和貴率兵三萬攻河源屯良非川敬玄與戰湟川敗績左武衛將軍黑齒常之以精騎三千夜擣其營贊婆懼引去遂擢常之為河源軍經略大使乃嚴烽邏開屯田虜謀稍折初劍南度茂州之西築安戎城以迨其鄙

俄為生羌導虜取之以守因并西洱河諸蠻盡臣羊同党項諸羌其地東與松茂接南極婆羅門西取四鎮北抵突厥幅員餘萬里漢魏諸戎所無也永隆元年文成公主薨遣使者弔祠又歸我陳行焉之喪初行焉使虜論欽陵欲拜己臨以兵不為屈留之十年及是喪還贈睦州刺史贊婆復入良非川常之擊走之武后時與蠻夷同朝賀永昌元年詔文昌右相韋待價為安息道大總管安西大都護閻溫古副之以討吐蕃兵逗留坐死徙明年復詔文昌右相岑長倩為武威道行軍大總管討之兵半道罷又明年大首領曷蘇率貴川部與党項種三十萬降后以右玉鈴衛將軍張玄遇為安撫使率兵二萬迎之次大度水吐蕃曷蘇去而它酋皆插又率羌蠻八千自來玄遇即其部置葉州用皆插為刺史刻石大度山以紀功是歲又詔右鷹揚衛將軍王孝傑為武威道行軍總管率西州都督唐休璟左武衛大將軍阿史那忠節擊吐蕃大破其眾復取四鎮更置安西都護府於龜茲以兵鎮守議者請廢四鎮勿有也右史崔融獻議曰戎狄為中國患尚矣五帝三王所不臣漢以百萬眾困平城其後武帝赫然發憤甘心四夷張騫始通西域列四郡據兩關斷匈奴右臂稍稍度河湟築令居以絕南羌於是障候亭燧出長城數千里傾府庫殫士馬行人使者歲月不絕至作皮幣算緡法稅舟車權酒酤夫豈不懷為長久計然也匈奴於是孤特遠竄遂開西域置使者領護光武中興皆復內屬至於延光三絕三通太宗文皇帝踐漢舊跡並南

山抵葱嶺剖裂府鎮煙火相望吐蕃不敢內侮高宗時有司無狀棄四鎮不能有而吐蕃遂張入焉者之西長鼓右驅踰高昌歷車師鈔常樂絕莫賀延碛以臨燉煌今孝傑一舉而取四鎮還先帝舊封若又棄之是自毀成功而破完策也夫四鎮無守胡兵必臨西域西域震則威憚南羌南羌連衡河西必危且莫賀延碛袤二千里無水草若北接虜唐兵不可度而北則伊西北廷安西諸蕃悉亡議乃格於是首領勃論贊與突厥僞可汗阿史那倭子南侵與孝傑戰冷泉敗走碎葉鎮守使韓思忠破泥孰沒斯城證聖元年欽陵贊婆攻臨洮孝傑以肅邊道大總管戰素羅汗山虜敗還又攻涼州殺都督遣使者請和約罷四鎮兵求分十姓地武后詔通泉尉郭元振往使道與欽陵遇元振曰東贊事朝廷誓好無窮今猥自絕歲擾邊父通之子絕之孝乎父事之子叛之忠乎欽陵曰然然天子許和得罷二國戍使十姓突厥四鎮各建君長俾其國自守若何元振曰唐以十姓四鎮撫西土爲列國主道非有它且諸部與吐蕃異久爲唐編人矣欽陵曰使者意我規削諸部爲唐邊患邪我若貪土地財賦彼青海湟川近矣今舍不爭何哉突厥諸部積漠廣莽去中國遠甚安有爭地萬里外邪且四夷唐皆臣并之雖海外地際靡不磨滅吐蕃適獨在者徒以兄弟小心得相保耳十姓五咄陸近安西於吐蕃遠俟斤距我裁一磧騎士騰突不易旬至是以爲憂也烏海黃河關源阻奧多瘴毒唐必不能入則弱甲辱將易以爲蕃患故我欲得之非關諸部

也甘涼距積石道二千里其廣不數百狹纔百里我若出張掖玉門使大國春不耕秋不穫不五六年可斷其右今棄不爲亦無虞于我矣青海之役黃仁素約和邊守不戒崔知辯徑俟斤掠我牛羊萬計是以求之使使者固請元振固言不可許后從之欽陵專國久常居中制事諸弟皆領方面兵而贊婆專東境幾三十年爲邊患兄弟皆才略沈雄衆憚之器弩悉弄既長欲自得國漸不平乃與大臣論巖等圖去之欽陵方提兵居外贊普託言獵卽勒兵執其親黨二千餘人殺之發使者召欽陵贊婆欽陵不受命贊普自討之未戰欽陵兵潰乃自殺左右殉而死者百餘人贊婆以所部及兒子莽布支等款塞遣羽林飛騎迎勞擢贊婆特進輔國大將軍歸德郡王莽布支左羽林大將軍安國公皆賜鐵券禮尉良厚贊婆卽領部兵戍河源死贈安西大都護又遣左肅政臺御史大夫魏元忠爲隴右諸軍大總管率隴右諸軍大使唐休璟出討方虜攻涼州休璟擊之斬首二千級於是論彌薩來朝請和贊普自將萬騎攻悉州都督陳大慈四戰皆克明年乃獻馬黃金求昏而虜南屬帳皆叛贊普自討死于軍諸子爭立國人立棄隸縮贊爲贊普始七歲使者來告喪且求盟又使大臣悉董熱固求昏未報會監察御史李知古建討姚州蠻削吐蕃鄉導詔發劍南募士擊之蠻酋以情輸虜殺知古尸以祭天進攻蜀漢詔靈武監軍右臺御史唐九微爲姚州道討擊使率兵擊之虜以鐵絙梁漾漫二水通西洱蠻築城戍之九微毀絙夷城建鐵柱於滇

池以勸功中宗景龍二年還其昏使或言彼來逆公主且習聞華言宜勿遣帝以中國當以信結夷狄不許明年吐蕃更遣使者納貢祖母可敦又遣宗俄請昏帝以雍王守禮女爲金城公主妻之吐蕃遣尙贊咄名悉臘等逆公主帝念主幼賜錦繒別數萬雜伎諸工悉從給龜茲樂詔左衛大將軍楊矩持節送帝爲幸始平帳飲引羣臣及虜使者宴酒所帝悲涕歔歔爲赦始平縣罪死皆免賜民繇賦一年改縣爲金城鄉曰鳳池里曰愴別公主至吐蕃自築城以居拜矩鄯州都督吐蕃外雖和而陰銜怒卽厚餉矩請河西九曲爲公主湯沐矩表與其地九曲者水草宜畜牧近與唐接自是虜益張雄易入寇玄宗開元二年其相牟遲延上書宰相請載盟文定境於河源西左散騎常侍解琬泄盟帝令姚崇等報書命琬持神龍誓往吐蕃亦遣尙欽藏御史名悉臘獻辭未及定牟遲延將兵十萬寇臨洮入攻蘭渭掠監馬楊矩懼自殺有詔薛納爲隴右防禦使與王駿等并力擊帝怒下詔自將討之會駿等戰武階斬首萬七千獲馬羊無慮二十萬又戰長子豐安軍使王海賓戰死乘之虜大敗衆奔突不能去相枕藉死洮水爲不流帝乃罷行詔紫微舍人倪若水臨按軍實戰功且弔祭戰亡士敕州縣并瘞吐蕃露齒宰相建言吐蕃本以河爲境以公主故乃橋河築城置獨山九曲二軍距積石二百里今旣負約請毀橋復守河如約詔可遣左驍衛郎將尉遲瓌使吐蕃慰安公主然小小入犯邊無閑歲於是郭知運王君奭相繼節度隴右

河西以扞之吐蕃遣宗俄因子到洮水祭戰死士且請和然恃盛疆求與天子敵國語悖傲使者至臨洮詔不內金城公主上書求聽脩好且言贊普君臣欲與天子共誓誓刻吐蕃又遣使者上書言孝和皇帝嘗賜盟是時唐宰相豆盧欽望魏元忠李嶠紀處訥等凡二十二人及吐蕃君臣同誓孝和皇帝崩太上皇嗣位脩睦如舊然唐宰相在誓刻者皆歿今宰相不及前約故須再盟比使論乞力等前後七輩往未蒙開許且張玄表李知古將兵侵暴甥國故違誓而戰今舅許渝貸前惡歸於大和甥旣堅定然不重盟爲未信要待新誓也甥自總國事不率于下欲使百姓久安舅雖及和而意不專於言何益又言舅責乞力徐集兵且兵以新故相代非集也往者疆場自白水皆爲閑壤昨郭將軍屯兵而城之故甥亦城假令二國利以迎送有如不通因以守境又疑與突厥骨咄祿善者舊與通聘卽日舅甥如初不與交矣因奉寶瓶栝以獻帝謂昔已和親有成言尋前盟可矣不許復誓禮其使而遣且厚賜贊普自是歲朝貢不犯邊十年攻小勃律國其王沒謹忙詒書北廷節度使張孝嵩曰勃律唐西門失之則西方諸國皆憶吐蕃都護圖之孝嵩聽許遣疏勒副使張思禮以步騎四千晝夜馳與謹忙兵夾擊吐蕃死者數萬多取鎧仗馬羊復九城故地始勃律王來朝父事帝還國置綏遠軍以扞吐蕃故歲常戰吐蕃每曰我非利若國我假道攻四鎮爾及是累歲不出兵於是隴右節度使王君奭請深入取償十二年破吐蕃獻俘後二年悉

諾邏兵入大斗拔谷遂攻甘州火鄉聚王君奭勒兵避其銳不戰會大雪吐蕃輒凍如積乃踰積石軍趨西道以歸君奭豫遣謀出塞燒野草皆盡悉諾邏頓大非川無所牧馬死過半君奭率秦州都督張景順約齋窮蹶出青海西方冰合師乘而度于時虜已踰大非山留輜重疲弱濱海君奭縱兵俘以旋時中書令張說以吐蕃出入數十年勝負略相當甘涼河鄯之人奉調發困甚願聽其和帝方寵君奭不聽未幾悉諾邏恭祿燭龍莽布支入陷瓜州毀其城執刺史田元獻及君奭父遂攻玉門軍圍常樂不能拔回寇安西副都護趙頤貞擊却之會君奭爲回紇所殺功不遂帝乃用蕭嵩爲河西節度使左金吾將軍張守珪瓜州刺史復城之嵩縱反間殺悉諾邏恭祿明年大將悉未朗攻瓜州守珪擊走之鄯州都督張志亮又戰青海西破大莫門城焚案它橋隴右節度使杜賓客以疆弩四千射虜破之祁連城下斬副將一上級五千首虜敗慟而走山又明年守珪率伊沙等州兵破虜大同軍又信安王禕出隴西拔石堡城卽之置振武軍獻俘於廟帝以書賜將軍裴旻曰敢有掩戰功不及賞者士自陳將吏皆斬戰有逗留舉隊如軍法能擒其王者授大將軍於是士益奮吐蕃令曩骨委書塞下言論莽熱論泣熱皆萬人將以贊普命謝都督刺史二國有舅甥好昨彌不弄羌項交搆二國故失懽此不聽唐亦不應聽都督遺腹心吏曩骨還議盟事曩骨猶于牛官也於是忠王友皇甫惟明並言約和便帝曰贊普向上書悖慢朕必滅之

毋讓和惟明曰昔贊普幼是必邊將好功之人爲之以激怒陛下且二國交惡必興師師興則隱盜財利詐功級希陛下過賞以甘心焉今河西隴右貲耗力窮陛下幸詔金城公主許贊普約以紓邊患息民之上策也帝采其言敕惟明及中人張元方往聘以書賜公主惟明見贊普言天子意贊普大喜因悉出貞觀以來書詔示惟明厚饋獻使名悉臘隨使者入朝奉表言甥先帝舅顯親也曩爲張玄表李知古交關遂成大覺甥以文成金城公主敢失禮乎特以冲幼枉爲邊將譏亂如蒙澄亮死且萬足千萬歲不敢先負盟且獻怪寶使者至帝御前殿列羽林仗內之悉臘略通華文旣宴與語禮甚厚賜紫服金魚悉臘受服辭魚曰國無是不敢當帝遣御史大夫崔琳報聘吐蕃又請交馬於赤嶺互市於甘松嶺宰相裴光庭曰甘松中國阻不如許赤嶺乃聽以赤嶺爲界表以大碑刻約其上又請五經敕祕書寫賜并遣工部尙書李壽往聘賜物萬計吐蕃遣使謝且言唐吐蕃皆大國今約和爲久長計恐邊吏有妄意者請以使人對相曉敕令昭然具知帝又令金吾將軍李佺監赤嶺樹碑詔張守珪與將軍李行禕吐蕃使者莽布支分諭劍南河西州縣曰自今二國和好無相侵暴乃使悉諾勃海納貢并以幣器徧遺執政明年上寶器數百具制治詭殊詔置提象門示羣臣其後吐蕃西擊勃律勃律告急帝諭令罷兵不聽卒殘其國於是崔希逸爲河西節度使鎮涼州故時疆畔皆樹壁守捉希逸謂虜戍將乞力徐曰兩國約好而守備不廢

云何請皆罷以便人乞力徐曰公忠誠無不可恐朝廷未皆信脫掩吾不備其可悔希逸固邀乃許卽共刑白犬盟而後悉撤障壁虜畜牧被野明年僣史孫誨奏事妄言虜無備可取也帝采之詔內豎趙惠琮共往按狀小人欲微幸至涼州因共矯詔詔希逸發兵襲破吐蕃青海上斬獲不貲乞力徐遁走吐蕃志不朝二十六年大入河西希逸拒破之鄯州都督杜希望又拔新城更號威戎軍希逸顧失信悒悒恨召拜河南尹既而與惠琮俱見犬豕疑而死誨亦及它誅蕭晃代爲河西節度留後杜希望隴右節度留後王昱劍南節度使分道經略碎赤嶺碑希望發鄯州兵奪虜河橋並河築鹽泉城號鎮西軍破吐蕃兵三萬昱以劍南兵入攻安戎城築二小壘左右之兵次蓬婆嶺輸劍南粟餉軍吐蕃悉銳來救昱大敗小壘皆沒士死凡數萬昱貪妄非將選故敗死高要明年吐蕃攻白草安人軍詔臨洮朔方分援虜絕臨洮道白水軍使高東于拒守虜引去見遣將追尾有雲出軍上白兔舞大破吐蕃昱之敗以張宥代節度劍南以章仇兼瓊爲益州司馬宥文吏不知兵委事兼瓊兼瓊因得入奏天子果其議拔兼瓊代宥節度兼瓊謀誘吐蕃安戎城主爲應導官軍入盡殺虜戍以監察御史許遠守之吐蕃圍安戎絕水泉會石裂泉湧虜驚引去復攻維州不得志詔乃改安戎曰平戎云是歲金城公主薨明年爲發哀吐蕃使者朝因請和不許虜乃悉衆四十萬攻承風堡抵河源軍西入長盩橋安仁軍渾崖烽騎將藏希液以銳兵五千

破之吐蕃又襲麻州敗一縣屠吏人攻振武軍石堡城蓋嘉運不能守天寶元年隴右節度使皇甫惟明破虜大嶺軍戰青海破莽布支斬首三萬級明年破洪濟城戰石堡不克副將諸葛嗣死之又明年惟明破虜獻俘京師帝以哥舒翰節度隴右翰攻拔石堡更號神武軍又禽其相兀論樣郭十載安西節度使高仙芝俘大會以獻是時吐蕃與蠻閩羅鳳聯兵攻瀘南劍南節度使楊國忠方以姦罔上自言破蠻衆六萬於雲南拔故洪州等三城獻俘口哥舒翰破洪濟大莫門諸城收九曲故地列郡縣實天寶十二載於是置神策軍於臨洮西澆河郡於積石西及宛秀軍以實河曲後二年蘇毗子悉諾邈來降封懷義王賜姓李氏蘇毗疆部也是歲贊普乞黎蘇籠臘贊死子孛悉籠臘贊嗣遣使者脩好詔京兆少尹崔光遠持節齋冊弔祠還而安祿山亂哥舒翰悉河隴兵東守潼關而諸將各以所鎮兵討難始號行營邊候空虛故吐蕃得乘隙暴掠至德初取嵩州及威武等諸城入屯石堡其明年使使來請討賊且修好肅宗遣給事中南巨川報聘然歲內侵取廓爾岷等州及河源莫門軍使數來請和帝雖審其譎姑務紓患乃詔宰相郭子儀蕭華裴遵慶等與盟寶應元年陷臨洮取秦成渭等州明年使散騎常侍李之芳太子左庶子崔倫往聘吐蕃留不遣破西山合水城明年入大震關取蘭河鄯洮等州於是隴右地盡亡進圍涇州入之降刺史高暉又破邠州入奉天副元帥郭子儀禦之吐蕃以吐谷渾党項兵二十萬東略武功渭北

行營將呂日將戰盤屋西破之又戰終南日將走代宗幸陝子儀退趨商州高暉導虜入長安立廣武王承宏爲帝改元擅作赦令署官吏衣冠皆南奔荆襄或遁棲山谷亂兵因相讓鈔道路梗閉光祿卿殷仲卿率千人壁藍田選二百騎度滄或給虜曰郭令公軍且來吐蕃大震會少將王甫與惡少年伐鼓譟苑中虜驚夜引去子儀入長安高暉東奔至潼關守將李日越殺之吐蕃留京師十五日乃走天子還京吐蕃退圍鳳翔節度使孫志直拒守鎮西節度使馬璘以千騎戰卻之吐蕃屯原會成渭間自如也是歲南入松維保等州及雲山新籠城明年遣使人李之芳等劍南巖武破吐蕃南鄙兵七萬拔當狗城會僕固懷恩反自靈武遣其將范志誠任敷合吐蕃吐谷渾兵攻邠州白孝德郭晞嬰壘守乃入居奉天西子儀入奉天按軍不戰郭晞以銳士夜擣其營斬首數千級奪馬五百取四將吐蕃引去是時巖武拔鹽州又戰西山取其衆八萬虜圍涼州河西節度使楊志烈不能守跳保甘州而涼州亡永泰元年吐蕃請和詔宰相元載杜鴻漸與虜使者同盟懷恩不得志導虜與回紇党項羌渾奴刺犯邊吐蕃大會尙結息贊摩尙恩東贊等衆二十萬至醴泉奉天邠將白孝德不能允任敷以兵略鳳翔盤屋於是京師戒嚴朔方兵馬使渾日進孫守亮屯奉天詔子儀以河中兵屯涇陽李忠臣屯東渭橋李光進屯雲陽馬璘郝廷玉屯便橋駱奉先李日越屯盤屋李抱玉屯鳳翔周智光屯同州杜冕屯坊州天子自率大軍屯于苑吐蕃逼

奉天日進以單騎馳之士二百踵進左右擊刺射皆應弦仆虜大驚辟易日進挾虜一將躍出舉軍望而譟士還無一矢著身者明日虜薄城日進發機石勁弩故兵多死凡三日虜斂軍入壁日進知虜曲折卽夜斫其營斬千餘級生禽五百又戰馬鬼凡七日破賊萬人斬首五千獲馬橐它幟械甚衆帝欲自討賊下詔大撻馬京師始置團練都人震擾鑿垣亡去者十八詔中人戶都門不能止吐蕃游騎四百略武功鎮西節度使馬璘使健士五十擊之殲士氣益奮虜徙營九變之陰掠醴泉居人數萬焚室廬田皆赤地周智光與虜戰澄城破之吐蕃至邠北復與回紇合還攻奉天抵馬鬼任敷以兵五千掠白水殘同州於是城中渭橋鄠以屯兵會懷恩死虜謀無主遂與回紇爭長回紇怒詣子儀請擊吐蕃自效子儀許之使白元光合兵攻吐蕃於靈臺西大破之降僕固名臣帝乃班師

唐書卷二百十六上

唐書卷二百十六下

宋 端 明 殿 學 士 宋 祁 撰

列傳第一百四十一下

吐蕃

承泰大厯間再遣使者來聘於是戶部尚書薛景仙往報詔宰相與吐蕃使者盟俄寇靈州掠宜祿郭子儀精甲三萬戍涇陽入屯奉天靈州兵破虜二萬上級五百首景仙與論泣陵偕來請境鳳林關而路悉等十五人又來三年虜引衆十萬復攻靈州略邠州先是尙悉結自寶應後數入邊以功高請老而贊摩代之爲東面節度使專河隴邠靈馬璘朔方將白元光再破其衆獲馬羊數千劍南亦破虜萬人尙悉摩復來朝天子以虜數入塞詔治守障徙當悉柘靜恭五州皆據險以守八年虜六萬騎侵靈州敗民稼進寇涇邠渾瑊與戰不利副將死略數千戶瑊整卒夜襲其營涇原馬璘以兵掩之潘原射豹皮將死軍中哭乃遁去璘收所俘士及男女而還郭子儀又破其衆十萬九年帝遣諫議大夫吳損脩好虜亦使使者入朝於是子儀屯邠州李抱玉屯高壁馬璘屯原州李忠臣屯涇州李忠誠屯鳳翔希讓屯渭北備虜之入明年西川節度使崔寧破虜於西山虜攻臨涇隴州次普潤焚掠人畜與抱玉戰義寧破之道涇州

璘尾追敗之於百里又明年崔寧破虜故洪節度氏蠻項等兵斬首萬級禽酋領千人牛羊廩糧甚衆獻之朝吐蕃不得志入掠黎雅於是劍南兵合南詔與戰破之禽大籠官論器然又侵坊州取党項牧馬崔寧攻望漢城破之山南西道節度使張獻恭戰岷州吐蕃走寧破西山三路及邛南兵斬首八千級十三年虜大會馬重英以四萬騎寇靈州塞漢御史尙書三渠以擾屯田爲朔方留後常謙光所逐重英殘鹽慶而去乃南合南詔衆二十萬攻茂州略扶文遂侵黎雅時天子已發幽州兵馳拒虜六奔破初虜使數至留不遣所俘虜口悉部送江南德宗卽位先內靖方鎮顧歲與虜碣其亡獲相償欲以德綏懷之遣太常少卿韋倫持節歸其俘五百厚給衣褚切敕邊吏護亭障無輒侵虜地吐蕃始聞未信使者入境乃皆感畏是時乞立贊爲贊普姓戶盧提氏曰我乃有三恨不知天子喪不及弔一也山陵不及賻二也不知舅卽位而發兵攻靈州入扶文侵灌口三也卽發使者隨倫入朝帝又遣倫還蜀俘虜以倫再至歡甚授館作聲樂九日留以論欽明思等五十人從獻方物明年殿中少監崔漢衡往使贊普猥曰我與唐舅甥國詔書乃用臣禮卑我又請雲州西盡賀蘭山爲吐蕃境邀漢衡奏天子乃遣入蕃使判官常魯與論悉諾羅入朝道贊普語且引景龍詔書曰唐使至甥先與盟蕃使至舅亦將親盟贊普曰其禮本均帝許之以獻爲進賜爲寄領取爲領之以前宰相楊炎不通故事爲解并約地於賀蘭其大相尙悉結嗜殺人

以劍南之敗未報不助和議次相尙結贊有謀因請休息邊人贊普卒用結贊爲大相乃講好漢衡與其使區頰贊偕來約盟境上拜漢衡鴻臚卿以都官員外郎樊澤爲計會使與結贊約且告隴右節度使張鎰同盟澤與結贊約盟清水以牛馬爲牲鎰欲末其禮乃給結贊曰唐非牛不田蕃非馬不戰請用犬豕羊結贊聽諾將盟乃除地爲壇約二國各以二千士列壇外冗從立壇下鎰與幕府齊映齊抗鴻臚漢衡計會使于頔及澤魯皆朝服結贊與論悉頰藏論熱論力徐等對升壇刑牲壇北雜其血以進約唐地涇州右盡彈箏峽隴州右極清水鳳州西盡同谷劍南盡西山大度水吐蕃守鎮蘭渭原會西臨洮東成州抵劍南西磨些諸蠻大度水之西南盡大河北自新泉軍抵大磧南極賀蘭臺它嶺其間爲閑田二國所棄戍地毋增兵毋創城堡毋耕邊田旣盟請鎰詣壇西南隅浮屠幄爲誓於是升壇大亨獻酬乃還帝命宰相尙書與虜使者盟長安而清水之約疆場不定復令漢衡決於贊普乃克盟於是宰相李忠臣盧杞關播崔寧工部尙書喬琳御史大夫于頔太府卿張獻恭司農卿段秀實少府監李昌夔京兆尹王勣金吾衛大將軍渾瑊與區頰贊等同盟京城之右郊禮如清水前二月告廟齊三日關播跪讀載書已盟乃大亨詔左僕射李揆爲入蕃會盟使還區頰贊等朱泚之亂吐蕃請助討賊詔右散騎常侍于頔持節慰撫太常少卿沈房爲安西北廷宣慰使以報之渾瑊用論莽羅兵破泚將韓旻於武亭川初與

虜約得長安以涇靈四州界之會大疫虜輒引去及泚平責先約求地天子薄其勞第賜詔書償結贊奔羅等帛萬匹於是虜以爲怨貞元二年詔倉部郎中趙建往使而虜已犯涇隴邠靈掠人畜敗田稼內州皆閉壁游騎至好時左金吾將軍張獻甫神策將李昇曇等屯咸陽河中渾瑊華州駱元光援之以左監門將軍康成使焉尚結贊屯上砦原亦令使論乞陀來請盟鳳翔李晟遣部將王佖以銳兵三千夜入汧陽明日薄其中軍虜驚潰走結贊僅自脫虜衆二萬侵鳳翔李晟擊却之因襲破摧沙堡燒儲廩斬守者吐蕃攻鹽夏刺史杜彥光拓拔乾暉不能守悉其衆南奔虜遂有其地天子以邊人殘沒下詔避正殿痛自咎詔駱元光經略鹽夏三年命左庶子崔瀚李錡踵使結贊得鹽夏皆戍以兵乃自屯鳴沙然饋餉數困於是駱元光韓游瓌濱塞而屯馬燧次石州跨河相犄角結贊大懼屢請盟天子不許卽以貴將論頰熟厚賂乞和於燧燧以爲情身入見天子諸將以燧入皆守壁不戰結贊遽還走馬多死士不能步有饑色瀚始至鳴沙傳詔讓結贊破約陷鹽夏對曰本以武亭功未償乃來又候碑仆疆場不明故行境上涇州乘城自保鳳翔李令不納吾使雖康成等來皆不能致委曲我日望大臣而卒無至者我故引還鹽夏守將懼吾衆以城丐我非我敢攻也若天子復許盟虜之願也唯所命當以鹽夏還唐又言清水盟大臣少故約易壞請悉遣宰相元帥二十一人會盟并言靈鹽節度使杜希全涇原節度使李觀外蕃所信請

主盟帝復使瀚報結贊曰希全守靈州有分地不可以越境觀旣徙官以渾瑊爲盟會使約五月盟清水使先效二州以驗虜信結贊辭清水非吉地請會原州之士黎樹乃歸二州天子從之瑊來受命拜漢衛兵部尚書以副瑊瑊率師二萬待期詔駱元光助之宰相議所盟地左神策將馬有鄰建言土獮樹林蒼巖阻兵易詭伏不如平涼夷漫坦直且近涇緩急可保也乃定盟平涼瑊約結贊主客均以兵三千至壇外誕從四百叩壇以游軍交邈相入將盟結贊伏精騎三萬于西縱邈騎出入瑊軍瑊將梁奉貞亦駭馬入虜軍營陰執之而瑊不知也客請瑊等具冠劍皆就幄更衣從容肆虜忽三伐鼓衆譟而興瑊不知所出走幄後得馬不銜而馳十里始得銜虜追矢若雨不傷也至元光營乃脫裨將辛榮兵數百據北阜與虜戰矢盡乃降判官韓弁監軍宋鳳朝死之漢衡與判官鄭叔矩路泌掌書記袁同直列將扶餘準馬靈孟日華李至言樂演明范澄馬弁中人劉延邕俱文珍李朝清等六十人皆被執士死者五百生獲者千餘人漢衡語虜曰我崔尚書也結贊與我善若殺我結贊亦殺若乃不死人負一木以繩三約之係其髮驅之夜則杙地繫而仆蒙以屬守者寢其上始結贊將劫希全觀急以銳兵直趣京師旣不克又欲禽瑊等擣虛入寇其謀本然旣引去至故原州坐帳中見漢衡等慢言渾瑊戰武功我力也許裂地償我而自食其言吾旣作金枷將必得瑊以見贊普乃今失之徒致公等無益也當使人歸報初漢衡遇亂從史

呂溫身蔽兵溫傷而漢衡脫虜人嘉其義厚給養之結贊屯石門以俱文珍馬靈馬奔歸唐而囚漢衡叔矩河州辛榮廓州扶餘準鄯州帝猶使中人齎詔書賜結贊拒不受虜戍鹽夏涉春疫大興皆思歸結贊以騎三千迎之火二州廬舍頽郭堞而去杜希全分兵保之帝哀漢衡等陷辱下詔賜其子七品官叔矩泌奔日華榮志信澄賈演明一子八品官袁同直而下一子九品官以決勝軍使唐良臣屯潘原神策將蘇太平屯隴州結贊召漢衡日華延邕至石門以五騎送境上遣使者奉表來李觀曰有詔不內吐蕃使者受漢衡等放其使結贊以羌渾衆屯潘口傍青石嶺三分其兵趨龍汧陽間連營數十里中軍距鳳翔一舍詭漢服號邢君牙兵入吳山寶鷄焚聚落略畜牧丁壯殺老孺斷手剔目乃去李晟嘗歷大木塞安化隘處虜過悉焚之詔神策將石季章壁武功良臣移師百里城虜又剽汧陽華亭男女萬人以畀羌渾將出塞令東向辭國衆慟哭投壑谷死者千數吐蕃又入豐義圍華亭絕汲道守將王仙鶴請救於隴州刺史蘇清沔合太平兵赴之虜逆戰太平不勝引還虜日千騎四掠隴兵不敢出虜積薪將焚華亭仙鶴以衆降清沔潛兵大象龕夜半約城中舉火燭天虜衆驚因襲其營乃去更攻連雲堡飛石投市井皆滿爲虛梁絕壑而升守將張明遠降于虜虜分捕山間亡人及牛羊率萬計涇隴邠之民蕩然盡矣諸將曾不能得一俘但賀賊出塞而已連雲堡涇要地也三垂峭絕北据高虜所進退候火易通既失之城下

卽虜境每截稼必陳兵于野故多失時是歲三州不宿麥虜數千騎犯長武城城使韓全義拒之韓游瓌兵不出於是虜安行邠涇間諸屯西門皆閉虜治故原州保之帝取所獲吐蕃生口不二百徇諸市以安京師四年五月虜三萬騎略涇邠靈慶鄜五州之鄙焚吏舍民間係執數萬韓全義以陳許兵戰長武無功初吐蕃盜塞長春夏疾疫常以盛秋及是得唐俘多厚給產質其孥故盛夏入邊尙悉董星論莽羅等又寇靈州張獻甫拒斬裁百級轉剽鄜坊乃去五年韋臯以劍南兵戰臺登殺虜將乞臧遮遮悉多楊朱西南少安不三年盡得嵩州地久之北廷沙陀別部叛吐蕃因是陷北廷都護府安西道絕獨西州人尙爲唐守八年寇靈州陷水口塞營田渠發河東振武兵合神策軍擊之虜引還又寇涇州掠田軍千人守捉使唐朝臣戰不利山南西道節度使嚴震破虜于芳州取黑水壁焚積聚自虜得鹽州塞防無以障遏而靈武軍露鄜坊侵迫寇日以驕數入爲邊患帝復詔城之使涇原劍南山南深入窮討分其兵毋令專向東方詔朔方河中晉絳邠靈兵馬副元帥渾瑊朔方靈鹽豐夏綏銀節度都統杜希全邠靈節度使張獻甫右神策軍行營節度使邢君牙夏綏銀節度使韓潭鄜坊丹延節度使王栖曜振武麟勝節度使范希朝合兵三萬以左神策將軍胡堅右神策將軍張昌爲鹽州行營節度使板築之役者六千人餘皆陳城下九年始裁闕二旬訖功而虜兵不出遂以兼御史大夫紇于遂與兼中丞杜彥光戍之當是時韋臯

功最多破堡壁五十餘所敗其南道元帥論莽熱沒龍乞悉莧又與南詔破之于神川于鐵橋臯俘敵三萬降首領論乞髡湯沒藏悉諾律十二年寇慶州及華池殺略吏人是歲尙結贊死明年贊普死其子足之煎立邢君牙築永信城于隴州以備虜虜使者農桑昔來請脩好朝廷以其無信不受臯取新城虜治劍山馬嶺進寇臺登嶺州刺史曹高仕擊卻之禽籠官斬級三百獲馬糧械數千十四年韓全義破虜于鹽州十六年鹽州破虜于烏蘭橋臯拔末恭驪二城十七年寇鹽州陷麟州殺刺史郭鋒湮隍墮陣係居人掠党項諸部屯橫槽烽虜將徐舍人者語俘道人延素曰我乃司空英公裔孫也武后時家祖以兵尊王室不克子孫奔播絕域今三世矣我雖握兵心未嘗忘歸也顧不能自拔耳陰使延素夜逸又言吾按邊求資糧至麟而守者無備遂入之知郭使君勳巨家欲全安之不幸死亂兵語方已會飛鳥使至召其軍還遂引去飛鳥猶傳騎也臯臯出西山與虜戰破之雅州籠官馬定德本虜之知兵有策慮者周知山川險易每用兵常馳驛計議授諸將以行比年寇黎嶺臯常折其兵定德畏得罪遂來降因定昆明諸蠻吐蕃以下屢叛大侵靈州時臯圍維州贊普使論莽熱沒龍乞悉莧兼松州五道節度兵馬都統羣牧大使引兵十萬援維州臯率南詔兵薄險設伏以待纒使千人嘗敵乞悉莧見兵寡悉眾追墮伏中兵四合急擊遂禽之獻京師明年吐蕃使者論頗熱復來右龍武大將軍薛伾往報二十年贊普死遣工部

侍郎張薦弔祠其弟嗣立再使使者入朝順宗立以左金吾衛將軍田景度庫部員外郎熊執易持節使使永貞元年論乞纒勃藏歸金幣馬牛助崇陵有詔陳太極廷中憲宗初遣使者脩好且還其俘又以使告順宗喪吐蕃亦以論勃藏來後比年來朝然以五萬騎入振武拂鶻泉萬騎至豐州大石谷鈔回鶻還國者五年以祠部郎中徐復往使并賜鉢闍布書鉢闍布者虜浮屠豫國事者也亦曰鉢闍道復至鄯州擅還其副李逢致命贊普復坐貶虜以論思邪熱入謝且歸鄭叔矩路過之極因言願歸秦原安樂州詔宰相杜佑等與議中書論思邪熱拜于廷佑答拜堂上復以鴻臚少卿李錡丹王府長史吳暉報之自是朝貢歲入又歎隴州塞丐耳市詔可十二年贊普死使者論乞髡來以右衛將軍烏重珣殿中侍御史段鈞弔祭之可黎可足立爲贊普重珣以扶餘準李驤偕歸準東明人本朔方騎將驂隴西人貞元初戰沒于虜者使者知不死求之乃得還詔以準爲豐王府司馬驤嘉王友吐蕃使論矩立藏來朝未出境吐蕃寇宥州與靈州兵戰定遠城虜不勝斬首二千級平涼鎮遏使郝玘又破虜兵二萬夏州節度使田緝破其衆三千詔留矩立藏等不遣劍南兵拔峨和栖鷄城十四年乃歸矩立藏等吐蕃節度論二摩宰相尙塔藏中書尙綺心兒總兵十五萬圍鹽州爲飛梯鷲車攻城刺史李文悅拒之城壞輒補夜襲其營畫出戰破虜萬人積三旬不能拔朔方將史敬奉以奇兵繞出虜背大破之解圍去始沙州刺史周鼎爲唐

固守贊普徙帳南山使尙綺心兒攻之鼎請救回鶻踰年不至議焚城郭引衆東奔皆以爲不可鼎遣都知兵馬使閻朝領壯士行視水草晨入謁辭行與鼎親吏周沙奴共射斃弓揖讓射沙奴卽死執鼎而縊殺之自領州事城守者八年出綏一端募麥一斗應者甚衆朝喜曰民且有食可以死守也又二歲糧械皆竭登城而譁曰苟毋徙它境請以城降綺心兒許諾於是出降自攻城至是凡十一年贊普以綺心兒代守後疑朝謀變置毒韉中而死州人皆胡服臣虜每歲時祀父祖衣中國之服號慟而藏之穆宗卽位遣祕書少監田洎往告使者亦來虜引兵入屯靈武靈州兵擊却之又犯青塞烽進寇涇州瀕水而營綿五十里始洎至牙虜欲會盟長武洎含糊應之至是顯言洎許我盟我是以來逼涇一舍止詔右軍中尉梁守謙爲左右神策軍京西北行營都監發卒合八鎮兵援涇州貶洎郴州司戶參軍以太府少卿邵同持節爲和好使初夏州田縉哀沓党項怨之導虜入鈔郝玘與戰多殺其衆李光顏又以邠兵至乃引去復遣使者來南略雅州詔方鎮與虜接者謹備邊長慶元年聞回鶻和親犯清塞堡爲李文悅所逐乃遣使者尙綺力陀思來朝且乞盟詔許之崔植杜元穎王播輔政議欲告廟禮官謂肅宗代宗皆嘗與吐蕃盟不告廟德宗建中之盟將重其約始詔告廟至會平涼不復告殺之也乃止以大理卿劉元鼎爲盟會使右司郎中劉師老副之詔宰相與尙書右僕射韓皋御史中丞牛僧孺吏部尙書李絳兵部尙書蕭俛

戶部尙書楊於陵禮部尙書韋綬太常卿趙宗儒司農卿裴武京兆尹柳公綽右金吾將軍郭縱及吐蕃使者論訥羅盟京師西郊贊普以盟言約二國無相寇讎有禽生問事給服糧歸之詔可大臣豫盟者悉載名於策方盟時吐蕃以壯騎屯魯州靈州節度使李進誠與戰大石山破之虜遣使者趙國章來且致宰相信幣明年請定疆候元鼎與論訥羅就盟其國敕虜大臣亦列名于策元鼎踰成紀武川抵河廣武梁故時城郭未隳蘭州地皆秔稻桃李榆柳岑蔚戶皆唐人見使者塵蓋夾道觀至龍支城耆老千人拜且泣問天子安否言頃從軍沒于此今子孫未忍忘唐服朝廷尙念之乎兵何日來言已皆嗚咽密問之靈州人也過石堡城崖壁峭竪道回屈虜曰鐵刀城右行數十里土石皆赤虜曰赤嶺而信安王禕張守珪所定封石皆仆獨虜所立石猶存赤嶺距長安三千里而羸蓋隴右故地也曰悶恆盧川直邈髮川之南百里臧河所流也河之西南地如砥原野秀沃夾河多檉柳山多柏坡皆巨墓旁作屋頽塗之繪白虎皆虜貴人有戰功者生衣其皮死以旌勇殉死者瘞其旁度悉結羅嶺鑿石通車逆金城公主道也至麋谷就館臧河之北川贊普之夏牙也周以槍纒率十步植百長槊中刺大幟爲三門相距皆百步甲士持門旆祝鳥冠虎帶擊鼓凡入者捺索乃進中有高臺環以寶楯贊普坐帳中以黃金飾蛟螭虎豹身被素襪結朝霞冒首佩金鏤劍鉢聖道立于右宰相列臺下唐使者始至給事中論悉答熱來議盟大享於牙

右飯舉酒行與華制略等樂奏秦王破陣曲又奏涼州胡渭錄要雜曲百伎皆中國人盟壇廣十步高二尺使者與虜大臣十餘對位酋長百餘坐壇下上設巨榻鉢擊通升告盟一人自旁譯授于下已歃血鉢擊通不歃盟畢以浮屠重為誓引鬱金水以飲與使者交慶乃降元鼎還虜元帥尙塔藏館客大夏川集東方節度諸將百餘置盟策臺上徧曉之且戒各保境毋相暴犯策署彝泰七年尙塔藏語元鼎曰回鶻小國我嘗討之距城三日危破會國有喪乃還非我敵也唐何所畏乃厚之元鼎曰回鶻有功且如約未始妄以兵取尺寸地是以厚之塔藏默然元鼎踰湟水至龍泉谷西北望殺胡川哥舒翰故壁多在湟水出蒙古抵龍泉與河合河之上流繇洪濟梁西南行二千里水益狹春可涉秋夏乃勝舟其南三百里三山中高而四下曰紫山直大羊同國古所謂崑崙者也虜曰悶摩黎山東距長安五千里河源其間流澄緩下稍合衆流色赤行益遠宅水井注則濁故世舉謂西戎地曰河湟河源東北直莫賀延磧尾殆五百里磧廣五十里北自沙州西南入吐谷渾寔狹故號磧尾隱測其地蓋劍南之西元鼎所經見大略如此虜遣諭悉諾思等入謝天子命左衛大將軍令狐通太僕少卿杜載蒼之是歲尙綺心兒以兵擊回鶻覺項小尙設塔率衆三萬牧馬木蘭梁比歲使者獻金盜銀冶犀鹿貢犛牛寶厯至太和再遣使者朝五年維州守將悉怛謀挈城以降劍南西川節度使李德裕受之收符章仗鎧更遣將虞藏儉据之州南抵

江陽岷山西北望隴山一面崖三涯江虜號無憂城爲西南要扞會牛僧孺當國謀還悉怛謀歸其城吐蕃夷誅無遺種以怖諸戎自是比五年虜使來必報所貢有玉帶金皿獺褐犛牛尾霞毼馬羊橐它贊普立幾三十年病不事委任大臣故不能抗中國邊候晏然死以弟達磨嗣達磨嗜酒好畋獵喜內且凶悞少恩政益亂開成四年遣太子詹事李景儒往使吐蕃以論集熱來朝獻玉器羊馬自是國中地震裂水泉湧岷山崩洮水逆流三日鼠食稼人饑疫死者相枕藉鄯廓間夜聞鼙鼓聲人相驚會昌二年贊普死論贊熱等來告天子命將作監李璟弔祠無子以妃緝兄尙延力子乞離胡爲贊普始三歲妃共治其國大相結都那見乞離胡不肯拜曰贊普支屬尙多何至立緝氏子邪哭而出用事者共殺之別將尙恐熱爲落門川討擊使姓末名農力熱猶中國號郎也謠詭善幻約三部得萬騎擊鄯州節度使尙婢婢略地至渭州與宰相尙與思羅戰薄寒山思羅敗走松州合蘇毗吐渾羊同兵八萬保洮河自守恐熱謂蘇毗等曰宰相兄弟殺贊普天神使我舉義兵誅不道爾屬乃助逆背國耶蘇毗等疑而不戰恐熱磨輕騎涉河諸部先降并其衆至十餘萬禽思羅縊殺之婢婢姓沒盧名贊心牙羊同國人世爲吐蕃貴相寬厚略通書記不喜仕贊普疆官之三年國人以贊普立非是皆叛去恐熱自號宰相以兵二十萬擊婢婢鼓擊牛馬橐它聯千餘里至鎮西軍大風雷電部將震死者十餘人羊馬橐它亦數百恐熱惡之按軍不進婢

婢聞之厚幣詒書約驩恐熱大喜曰婢婢書生為知軍事我為贊普當以家居宰相處之於是退營大夏川婢婢遣將龐結心莽羅薛呂擊恐熱於河州之南伏兵四萬結心據山射書極罵恐熱怒甚盛兵出鬪結心僞北恐熱追至數十里莽羅薛呂以伏兵衷擊大風雨河溢溺死甚眾恐熱單騎而逃既不得志尤猜忍殺戮部將岌藏豐贊皆降婢婢厚遇之明年恐熱復攻鄯州婢婢分兵五道拒守恐熱保東谷山堅壁不出岌藏緣以重柵斷汲道旬日恐熱走薄寒山募散卒稍至得數千人復戰鷓鴣山再戰南谷皆大敗兵擊仍歲不解大中三年婢婢屯兵河源聞恐熱謀度河急擊之為恐熱所敗婢婢統銳兵扼橋亦不勝焚橋而還恐熱間出鷄頂嶺關馮硤為梁攻婢婢至白土嶺敗其將尙鐸羅楊藏進戰犛牛硤婢婢將燭盧鞏力欲負硤自固以困恐熱大將磨離罷子不從乃辭疾先歸罷子急擊恐熱一戰而死婢婢糧盡引眾趨甘州西境以拓拔懷光居守恐熱麾下多歸之恐熱大略鄯廓瓜肅伊西等州所過捕戮積尸狼籍麾下內怨皆欲圖之乃揚聲將請唐兵五十萬共定其亂保渭州求冊為贊普奉表歸唐宣宗詔太僕卿陸耽持節慰勞命涇原靈武鳳翔邠寧振武等兵迎援恐熱至詔尙書左丞李景讓就問所欲恐熱偃奄自大且求河渭節度使帝不許還過咸陽橋咄歎曰我舉大事覲得濟此河與唐分境於是復趨落門川收散卒將寇邊會久雨糧絕恐熱還奔廓州於是鳳翔節度使李玘復清水涇原節度使康季榮復原

州取石門等六關得人畜幾萬靈武節度使李欽取安樂州詔為威州邠寧節度使張欽緒復蕭關鳳翔收秦州山南西道節度使鄧湜得扶州鳳翔兵與吐蕃戰隴州斬首五百級是歲河隴高年千餘見闕下天子為御延喜樓賜冠帶皆爭解辦易服因詔差賜四道兵錄有勞者三州七關地腴衍者聽民墾蕪貸五歲賦温池委度支權其鹽以贖邊四道兵能營田者為給牛種戍者倍其資饌再歲一代商賈往來於邊者關鎮毋何留兵欲墾田與民同初太宗平薛仁果得隴上地虜李軌得涼州破吐谷渾高昌開四鎮玄宗繼收黃河磧石宛秀等軍中國無斥候警者幾四十年輪臺伊吾屯田禾菽彌望開遠門揭候署曰西極道九千九百里示戍人無萬里行也乾元後隴右劍南西山三州七關軍鎮監牧三百所皆失之憲宗常覽天下圖見河湟奮封赫然思經略之未暇也至是羣臣奏言王者建功立業必有以光表於世者今不勤一卒血一刃而河湟自歸請上天子尊號帝曰憲宗嘗念河湟業未就而殂落今當述祖宗之烈其議上順憲二廟諡號夸顯後世又詔朕姑息民其山外諸州須後經營之明年沙州首領張義潮奉瓜沙伊肅甘等十一州地圖以獻始義潮陰結豪英歸唐一日眾環甲譟州門漢人皆助之虜守者驚走遂攝州事繕甲兵耕且戰悉復餘州以部校十輩皆操挺內表其中東北走天德城防禦使李丕以聞帝嘉其忠命使者齎詔收慰擢義潮沙州防禦使俄號歸義軍遂為節度使其後河渭州虜將尙延心以國破

亡亦獻款秦州刺史高駢誘降延心及渾末部萬帳遂收二州拜延心武衛將軍駢收鳳林關以延心爲河渭等州都游奕使咸通二年義潮奉涼州來歸七年北廷回鶻僕固俊擊取西州收諸部鄯州城使張季暉與尙恐熱戰破之收器鎧以獻吐蕃餘衆犯邠靈節度使薛弘宗郤之會僕固俊與吐蕃大戰斬恐熱首傳京師八年義潮入朝爲右神武統軍賜第及田命族子淮深守歸義十三年卒沙州以長史曹義金領州務遂授歸義節度使後中原多故王命不及甘州爲回鶻所并歸義諸城多沒渾末亦曰嗚末吐蕃奴部也虜法出師必發豪室皆以奴從平居散處耕牧及恐熱亂無所歸共相嘯合數千人以嗚末自號居甘肅瓜沙河渭岷廓疊宕間其近蕃牙者最勇而馬尤良云贊曰唐興四夷有弗率者皆利兵移之蹙其廷而後已惟吐蕃回鶻號強雄爲中國患最久贊普遂盡盜河湟薄王畿爲東境犯京師掠近輔殘馘華人謀夫虜帥圖視共計卒不得要領晚節二姓自亡而唐亦衰焉夫外撫內寧惟聖人不讓玄宗有逸德而拓地太大務遠功忽近虞逆賊一奮中原分裂訖二百年不得復完而至陵夷然則內先自治釋四夷爲外懼守成之良資也

唐書卷二百十六下

唐書卷二百十六下考證

吐蕃傳下馬磷屯原州○舊書作泗中疑誤

貶洎郴州司戶○舊書作柳州

唐書卷二百十六下考證

唐書卷二百十七上

宋 端 明 殿 學 士 宋 祁 撰

列傳第一百四十二上

回鶻

回紇其先匈奴也俗多乘高輪車元魏時亦號高車部或曰敕勒訛為鐵勒其部落曰袁紇薛延陀契苾
 羽都播骨利幹多覽葛僕骨拔野古同羅渾思結斛薛奚結阿跌白霫凡十有五種皆散處磧北袁紇者
 亦曰烏護曰烏紇至隋曰韋紇其人驍彊初無酋長逐水草轉徙善騎射喜盜鈔臣于突厥突厥資其財
 力雄北荒大業中處羅可汗攻脅鐵勒部哀責其財既又恐其怨則集渠豪數百悉阮之韋紇乃并僕骨
 同羅拔野古叛去自為俟斤稱回紇回紇姓藥羅葛氏居薛延陀北娑陵水上距京師七千里衆十萬勝
 兵半之地磧鹵畜多大足羊有時健俟斤者衆始推為君長子曰菩薩材勇有謀嗜獵射戰必身先所向
 輒摧破故下皆畏附為時健所逐時健死部人賢菩薩立之母曰烏羅渾性嚴明能決平部事回紇繇是
 寔盛與薛延陀共攻突厥北邊頡利遣欲谷設領騎十萬討之菩薩身將五千騎破之馬鬣山追北至天
 山大俘其部人聲震北方繇是附薛延陀相脅齒號活頡利發樹牙獨樂水上貞觀三年始來朝獻方物

突厥已亡惟回紇與薛延陀爲最雄彊菩薩死其酋胡祿俟利發吐迷度與諸部攻薛延陀殘之并有其地遂南踰賀蘭山境諸河遣使者獻款太宗爲幸靈州次涇陽受其功於是鐵勒十一部皆來言延陀不事大國以自取亡其下屬駭鳥散不知所之今各有分地願歸命天子請置唐官有詔張飲高會引見渠長等以唐官官之凡數千人明年復入朝乃以回紇部爲瀚海多覽葛部爲燕然僕骨部爲金微拔野古部爲幽陵同羅部爲龜林思結部爲盧山皆號都督府以渾爲阜蘭州斛薛爲高闕州阿跌爲雞田州契苾羽爲榆溪州奚結爲雞鹿州思結爲蹕林州白霽爲賓顏州其西北結骨部爲堅昆府北骨利幹爲玄闕州東北俱羅勃爲燭龍州皆以酋領爲都督刺史長史司馬卽故單于臺置燕然都護府統之六都督七州皆隸屬以李素立爲燕然都護其都督刺史給玄金魚符黃金爲文天子方招寵遠夷作絳黃瑞錦文袍寶刀珍器賜之帝坐祕殿陳十部樂殿前設高坫置朱提瓶其上潛泉浮酒自左閣通坫趾注之瓶轉受百斛釐盞回紇數千人飲畢尙不能半又詔文武五品官以上祖飲尙書省中渠領共言生荒陬地歸身聖化天至尊賜官爵與爲百姓依唐若父母然請於回紇突厥部治大涂號參天至尊道世爲唐臣乃詔磧南鷓鴣泉之陽置過郵六十八所具羣馬渾肉待使客歲內貂皮爲賦乃拜吐迷度爲懷化大將軍瀚海都督然私自號可汗署官吏壹似突厥有外宰相六內宰相三又有都督將軍司馬之號帝更詔

時健俟斤它部爲祁連州隸靈州都督白霽它部爲居延州吐迷度兄子烏紇悉吐迷度之妻遂與俱陸莫賀達干俱羅勃謀亂而歸車鼻可汗二人者皆車鼻塔故烏紇領騎夜劫吐迷度殺之燕然副都護元禮臣遣使給烏紇許白爲都督烏紇不疑卽往謝因斬以徇帝恐諸部攜解命兵部尙書崔敦禮持節臨撫贈吐迷度左衛大將軍賻祭備厚擢其子婆闍左驍衛大將軍襲父所領俱羅勃既入朝帝不遣阿史那賀魯之盜北廷婆闍以騎五萬助契苾何力等破賀魯收北廷又從伊麗道行軍總管任雅相等再破賀魯金山遷右衛大將軍從討高麗有功婆闍死子比栗嗣龍朔中以燕然都督府領回紇更號瀚海都護府以磧爲限大抵北諸蕃悉隸之比栗死子獨解支嗣武后時突厥默啜方彊取鐵勒故地回紇與契苾思結渾三部度磧徙甘涼間然唐嘗取其壯騎佐赤水軍云獨解支死子伏帝卽立明年助唐攻殺默啜於是別部移健頡利發與同羅霽等皆來詔置其部於大武軍北伏帝卽死子承宗立涼州都督王君奭誣暴其罪流死漢州當此時回紇稍不循族子瀚海府司馬護輸乘衆怨共殺君奭梗絕安西諸國朝貢道久之奔突厥死子骨力裴羅立會突厥亂天寶初裴羅與葛邏祿自稱左右葉護助拔悉蜜擊走烏蘇可汗後三年襲破拔悉蜜斬頡跌伊施可汗遣使上狀自稱骨咄祿毗伽闕可汗天子以爲奉義王南居突厥故地徙牙烏德隄山昆河之間南距西城千七百里西城漢高闕塞也北盡磧口三百里悉

有九姓地九姓者曰藥羅葛曰胡咄葛曰囉囉勿曰貊歌息訖曰阿勿喃曰葛薩曰斛嗚素曰藥勿葛曰奚邪勿藥羅葛回紇姓也與僕骨渾拔野古同羅思結契苾六種相等夷不列於數後破有拔悉蜜葛邏祿總十一姓並置都督號十一部落自是戰常以二客部爲先鋒有詔拜爲骨咄祿毗伽闕懷仁可汗前殿列仗中書令內案授册使者使者出門升輅至皇城門降乘馬幡節導以行凡册可汗率用此禮明年裴羅又攻殺突厥白眉可汗遣頓囉達干來上功拜裴羅左驍衛員外大將軍斥地愈廣東極室韋西金山南控大漠盡得古匈奴地裴羅死子磨延啜立號葛勒可汗剽悍善用兵歲遣使者入朝肅宗卽位使者來請助討祿山帝詔燉煌郡王承案與約而令僕固懷恩送王因召其兵可汗喜以可敦妹爲女妻承案遣渠領來請和親帝欲固其心卽封虜女爲毗伽公主於是可汗自將與朔方節度使郭子儀合討同羅諸蕃破之河上與子儀會呼延谷可汗恃其疆陳兵引子儀拜狼羆而後見帝駐彭原使者萬羅支見耻班下帝不欲使鞅鞅引升殿慰而遣俄以大將軍多攬等造朝及太子葉護身將四千騎來惟所命帝因册毗伽公主爲王妃擢承案宗正卿可汗亦封承案爲葉護給四節令與其葉護共將帝命廣平王見葉護約爲昆弟葉護大喜使首領達干等先到扶風見子儀子儀犒飲三日葉護辭曰國多難我助討逆何敢貪固命乃留旣行日賜牛四十角羊八百蹄米四十斛香積之戰陳豐上賊詭伏騎於王師左將

襲我僕固懷恩磨回紇馳之盡翦其伏乃出賊背與鎮西北廷節度使李嗣業夾彆之賊大敗進收長安懷恩率回紇南蠻大食衆緣都而南壁滄東進次陝西戰新店回紇至曲沃葉護使將軍鼻施吐撥裴羅旁南山東出接賊伏谷中殲之營山陰子儀等與賊戰傾軍逐北亂而卻回紇望見卽踰西嶺曳旗趨賊出其後賊反顧遂大潰追奔數十里人馬相騰蹂死者不可計收仗械如丘巖莊挾安慶緒棄東京北度河回紇大掠東都三日姦人導之府庫窮殫廣平王欲止不可而耆老以繒錦萬疋賂回紇止不剽葉護還京師帝遣羣臣勞之長樂帝坐前殿召葉護升階席會領於下宴且勞之人人賜錦繡繒器葉護頓首言留兵沙苑臣歸料馬以收范陽訖除殘盜帝曰爲朕竭義勇成大事卿等力也詔進司空爵忠義王歲給絹二萬疋使至朔方軍受賜乾元元年回紇使者多彥阿波與黑衣大食會閣之等俱朝爭長有司使異門並進又使請昏許之帝以幼女靈國公主下嫁卽册磨延啜爲英武威遠毗伽可汗詔漢中郡王瑒攝御史大夫爲册命使以宗子右司郎中異兼御史中丞爲禮會使并以副瑒尙書右僕射裴冕送諸境帝餞公主因幸咸陽數尉勉主泣曰國方多事死不恨瑒至虜而可汗胡帽赭袍坐帳中儀衛光嚴引瑒立帳外問曰王天可汗何屬瑒曰從昆弟也時中人雷靈俊立瑒上又問立王上者爲誰瑒曰中人也可汗曰中人奴爾願立耶上乎靈俊趨下於是引瑒入瑒不拜可汗曰見國君禮無不拜瑒曰天子願可

汗有功以愛女結好比中國與夷狄昏皆宗室子今蓋國乃帝生女有德容萬里來降可汗天子婿當以禮見安賜受詔邪可汗慙乃起奉詔拜受冊翌日尊主爲可敦瑪所齎賜物可汗盡與其牙下酋領瑪還獻馬五百匹貂裘白氍等乃使王子骨噉特勒宰相帝德等率騎三千助討賊帝因命僕固懷恩總之又遣大首領蓋將軍與三女子謝昏并告破堅昆明年骨噉與九節度戰相州王師潰帝德等奔京師帝厚賜尉其意乃還俄而可汗死國人欲以公主殉主曰中國人婿死朝夕臨喪期三年此終禮也回紇萬里結昏本慕中國吾不可以殉乃止然虜面哭亦從其俗云後以無子得還始葉護太子前得罪死故次子移地健立號牟羽可汗其妻僕固懷恩女也始可汗爲少子請昏帝以妻之至是爲可敦明年使大臣俱錄莫賀達干等入朝并問公主起居使人通謁於延英殿代宗卽位以史朝義未滅復遣中人劉清潭往結好且發其兵比使者至回紇已爲朝義所誅曰唐祚有喪國無主且亂請回紇入收府庫其富不資可汗卽引兵南寶應元年八月也清潭齎詔至其帳可汗曰人言唐已亡安得有使邪清潭爲言先帝雖棄天下廣平王已卽天子位其仁聖英武類先帝故與葉護收二京破安慶緒者是與可汗素厚且唐歲給回紇緡絹豈忘之邪是時回紇已踰三城見州縣榛萊烽障無守有輕唐色乃遣使北收單于府兵倉庫數以語凌斬清潭清潭齎白帝回紇兵十萬向塞朝廷震驚遣殿中監藥子昂迎勞且視軍遇于太原

密識其兵裁四千孱弱萬餘馬四萬與可敦偕來帝令懷恩與回紇會因遣使上書請助天子討賊回紇欲入蒲關徑沙苑而東子昂說曰自寇亂來州縣殘虛供億無所資且賊在東京若入并陘以取邢洛衛懷收賊財帑乃鼓而南上策也不聽子昂曰然則趨懷太行道南據河陽扼賊喉衿又不聽曰食太原倉粟右次陝與潞潞河南懷鄭兵合回紇從之詔以雍王爲天下兵馬元帥進子昂兼御史中丞與右羽林衛將軍魏琚爲左右廂兵馬使中書舍人韋少華爲元帥判官御史中丞李進爲行軍司馬東會回紇救元帥爲諸軍先鋒與諸節度會陝州時可汗壁陝州北王往見之可汗責王不蹈舞子昂辭曰王嫡皇孫二宮在殯禮不可以蹈舞回紇廷詰曰可汗爲唐天子弟於王叔父行也容有不蹈舞乎子昂固拒卽言元帥唐太子也將君中國而可蹈舞見可汗哉回紇君臣度不能屈卽引子昂進少華琚榜之百少華琚一夕死王還營官軍以王見辱將合誅回紇王以賊未滅止之於是懷恩與虜左殺爲先驅朝義使反間左殺執以獻與諸將同擊賊戰橫水走之進收東都可汗使拔賀那賀天子獻朝義旗物雍王還靈寶可汗屯河陽留三月屯旁人困於剽辱僕固瑒率回紇兵與朝義擊戰蹀血二千里梟其首河北悉平懷恩道相州西山崒口還屯可汗出潞潞與懷恩會道太原去初回紇至東京放兵數剽人皆遁保聖善白馬二祠浮屠避之回紇怒火浮屠殺萬餘人及是益橫詬折官吏至以兵夜斫舍光門入鴻臚寺方其時陝

州節度使郭英父留守東都與魚朝恩及朔方軍驕肆因回紇爲暴亦掠汝鄆間鄉不完廬皆蔽紙爲裳
虐于賊矣帝念少華等死故贈少華左散騎常侍瑒揚州大都督賜一子六品官於是册可汗曰謂咄登
里骨吸蜜施合俱錄英義建功毗伽可汗可敦曰娑墨光親麗華毗伽可敦以左散騎常侍王翊使卽其
牙命之自可汗至宰相共賜實封二萬戶又以左殺爲雄朔王右殺靈朔王胡祿都督金河王拔覽將軍
靜漠王十都督皆國公永泰初懷恩反誘回紇吐蕃入寇俄而懷恩死二虜爭長回紇首領潛詣涇陽見
郭子儀請改事子儀率麾下叩回紇營回紇曰願見令公子儀出旗門回紇曰請釋甲子儀易服會長相
顧曰真是公矣時李光進路嗣恭介馬在側子儀示會長曰此渭北節度使某朔方軍糧使某會長下馬
拜子儀亦下見之虜數百環視子儀麾下亦至子儀麾左右使卻且命酒與飲遣以纏頭綵三千召可汗
弟合胡祿等持手因讓曰上念回紇功報爾固厚何負而來今卽與汝戰何遽降也我將獨入爾營雖殺
我吾將士能擊汝會長誓服曰懷恩詭我曰唐天子南走公見廢是以來今天可汗在公無恙吾等願還
擊吐蕃以報厚恩然懷恩子可敦弟也願赦死於是子儀持酒胡祿請盟而飲子儀曰唐天子萬歲回紇
可汗亦萬歲二國將相如之有如負約身死行陳家屠戮方時虜宰相磨咄莫賀達干頓等聞言皆奪氣
酒至其所輒曰無易公誓始虜有二巫言此行必不戰當見大人而還及是相顧笑曰巫不吾給也朔方

先鋒兵馬使白元光回紇兵於靈臺會雪霧嚴晦吐蕃閉營撤備乃縱擊之斬首五萬級生禽萬人獲
馬橐它牛羊收所俘唐戶五千僕固名臣降合胡祿都督等二百人皆來朝賜與不可計子儀以名臣見
名臣懷恩兄子銳將也大厯三年光親可敦卒帝遣右散騎常侍蕭昕持節弔祠明年以懷恩幼女爲崇
徽公主繼室兵部侍郎李涵持節册拜可敦賜綵二萬是時財用屈稅公卿橐它給行宰相餞中涓
橋回紇之留京師者曹輩掠女子於市引騎犯含光門皇城皆闔詔劉清潭慰止復出暴市物奪長安令
邵說馬有司不敢何詰自乾元後益負功每納一馬取直四十緡歲以數萬求售使者相躡留舍鴻臚駘
弱不可用帝厚賜欲以愧之不知也復以萬馬來帝不忍重煩民爲償六千十年回紇殺人橫道京兆尹
黎幹捕之詔貸勿劾又刺人東市縛送萬年獄首領刳取囚殘獄吏去都人厭苦十三年回紇襲振武攻
東陘入寇太原河東節度使鮑防與戰陽曲防敗績殘殺萬人代州都督張光晟又戰羊虎谷破之虜乃
去德宗立使中人告喪且修好時九姓胡勸可汗入寇可汗欲悉師向塞見使者不爲禮宰相頓莫賀達
干曰唐大國無負於我前日入太原取羊馬數萬比及國亡耗略盡今舉國遠鬪有不如捷將安歸可汗
不聽頓莫賀怒因擊殺之并屠其支黨及九姓胡幾二千人卽自立爲合骨咄祿毗伽可汗使長建達干
從使者入朝建中元年詔京兆少尹源休持節册頓莫賀爲武義成功可汗始回紇至中國常參以九姓

胡往往留京師至千人居貨殖產甚厚會會長突董翳蜜施大小梅錄等還國裝案係道留振武三月供擬珍豐費不貲軍使張光晟陰伺之皆盛女子以橐光晟使驛吏刺以長錐然後知之已而聞頓莫賀新立多殺九姓胡人懼不敢歸往往去突董察視嚴亟羣胡獻計於光晟請悉斬回紇光晟許之卽上言回紇非素疆助之者九胡爾今其國亂兵方相加而虜利則往財則合無財與利一亂不振不以此時乘之復歸人與幣是謂借賊兵資盜糧也乃使裨校陽不禮突董果怒鞭之光晟因勒兵盡殺回紇羣胡收橐它馬數千緡錦十萬且告曰回紇挾大將謀取振武謹先誅之部送女子還長安帝召光晟還以彭令方代之遣中人與回紇使聿達干往言其端因欲與虜絕敕源休俟命太原明年乃行因歸突董等四喪突董可汗諸父也源休至可汗令大臣具車馬出迎其大相頡干迦斯踞坐責休等殺突董事休言彼自與張光晟鬪死非天子命又曰使者皆負死罪唐不自戮何假手於我邪良久罷去休等幾死留五旬卒不見可汗可汗傳謂休曰國人皆欲爾死我獨不然突董等已亡今又殺爾猶以血濯血徒益汗吾以水濯血不亦善乎爲我言有司所負馬直一百八十萬可速償我遣散支將軍康赤心等隨休來朝帝隱忍賜以金緡後三年使使者獻方物請和親帝蓄前志未平謂宰相李泌曰和親待子孫圖之朕不能已泌曰陛下豈以陝州故憾乎帝曰然朕方天下多難未能報且毋議和泌曰辱少華等乃牟羽可汗也知陛

下卽位必償怨乃謀先苦邊然兵未出爲今可汗所殺矣今可汗初立遣使來告垂髮不翦待天子命而張光晟殺突董等雖幽止使人然卒完歸則爲無罪矣帝曰卿言則然顧朕不可負少華等奈何泌曰臣謂陛下不負少華少華負陛下且北虜君長身赴難陛下在藩春秋未壯而輕度河入其營所謂冒豺虎之場也爲少華等計當先定會見禮臣猶危之奈何子然赴哉臣昔爲先帝行軍司馬方葉護來先帝祇使宴於府及議征討則不見也葉護邀臣至營帝不許使好謂曰主當勞客客反勞主邪東收京師約曰土地人衆歸我玉帛子女子回紇戰勝葉護欲大掠代宗下馬拜之回紇乃東向洛臣猶恨以元帥拜葉護於馬前爲左右過然先帝曰王仁孝足辦朕事下詔尉勉葉護乃牟羽諸父也牟羽之來陛下以元子不拜於帳下而可汗不敢少有失於陛下則陛下未嘗屈矣先帝拜葉護全城陛下乃不拜可汗固伸威於虜何恨焉然計香積陝州事以屈己爲是乎伸威爲是乎藉令少華等以陛下見可汗閉壁五日與陛下張飲天下豈不寒心哉而天助威神使豺狼馴服牟羽母捧陛下以貂裘叱左右促命騎羽送出營此少華等負陛下也假令牟羽爲有罪則今可汗已殺之立者乃牟羽從父兄是爲有功渠可忘之邪且回紇可汗銘石立國門曰唐使來當使知我前後功云今請和必舉部南望陛下不之答其怨必深願聽昏而約用開元故事如突厥可汗稱臣使來者不過二百市馬不過千不以唐人出塞亦無不可者帝曰

善乃許降公主回紇亦請如約詔咸安公主下嫁又詔使者合闕達干見公主於麟德殿使中謁者齋公主畫圖賜可汗明年可汗遣宰相跌跌都督等衆千餘并遣其妹骨咄祿毗伽公主率大酋之妻五十人逆主且納聘跌跌至振武爲室韋所鈔戰死有詔其下七百皆聽入朝舍鳩臚帝御延喜門見使者是時可汗上書恭甚言昔爲兄弟今婿半子也陛下若患西戎子請以兵除之又請易回紇曰回鶻言捷鷲猶鶻然帝欲饗回鶻公主問禮於李泌對曰肅宗於燉煌王爲從祖兄回鶻妻以女見帝於彭原獨拜廷下帝呼曰婦而不名嫂也當艱虞時方藉其用猶以臣之況今日乎於是引回鶻公主入銀臺門長公主三人候諸內譯史傳導拜必答揖與進帝御祕殿長公主先入侍回鶻公主入拜謁已內司賓導至長公主所又譯史傳問乃與俱入至宴所賢妃降階俟回鶻公主拜賢妃答拜又拜召已由西階升乃坐有賜則降拜非帝賜則避席拜妃公主皆答拜訖歸凡再饗帝又盡建咸安公主官屬視王府以嗣勝王湛然爲昏禮使右僕射關播護送且將冊書拜可汗爲汨咄祿長壽天親毗伽可汗公主爲智惠端正長壽孝順可敦貞元五年可汗死子多邏斯立國人號泮官特勒以鴻臚卿郭鋒持節冊拜愛登里邏汨沒蜜施俱錄毗伽忠貞可汗初安西北廷自天寶末失關隴朝貢道隔伊西北廷節度使李元忠四鎮節度留後郭昕數遣使奉表皆不至貞元二年元忠等所遣假道回鶻乃得至長安帝進元忠爲北廷大都護昕爲安

西大都護自是道雖通而虜求取無淡沙陀別部六千帳與北廷相依亦厭虜哀索至三萬祿白眼突厥素臣回鶻者尤怨苦皆密附吐蕃故吐蕃因沙陀共寇北廷頡干迦斯與戰不勝北廷陷於是都護楊襲古引兵奔西州回鶻以壯卒數萬召襲古將還取北廷爲吐蕃所擊大敗士死大半迦斯奔還襲古挾餘衆將入西州迦斯給曰第與我俱歸當使公還唐襲古至帳殺之萬祿又取深圖川回鶻大恐稍南其部落以避之是歲可汗爲少可敦葉公主所毒死可敦亦僕固懷恩之孫懷恩子爲回鶻葉護故女號葉公主云可汗之弟乃自立迦斯方攻吐蕃其大臣率國人共殺篡者以可汗幼子阿啜嗣迦斯還可汗等出勞皆俯伏言廢立狀惟大相生死之悉發郭鋒所賜器幣餉迦斯可汗拜且泣曰今幸得繼絕仰食於父也迦斯以其柔屈乃相持哭遂臣事之以器幣悉給將士無所私其國遂安遣達北特勒梅錄將軍來告且聽命詔鴻臚少卿庾鋌冊阿啜爲奉誠可汗俄以律支達干來告少靈國公主之喪主榮王女也始靈國下嫁又以媵之靈國後歸因留回鶻中爲可敦號少靈國歷配英武英義二可汗至天親可汗時始居外其配英義生二子皆爲天親所殺是歲回鶻擊吐蕃萬祿於北廷勝之且獻俘明年使藥羅萬昆來朝見本唐人呂氏爲可汗養子遂從可汗姓帝以其用事賜資殊優拜檢校尚書右僕射十一年可汗死無子國人立其相骨咄祿爲可汗以使者來詔祕書監張薦持節冊拜愛勝里邏羽錄沒蜜施合胡祿毗伽

懷信可汗骨咄祿本跌跌氏少孤爲大首領所養辯敏材武當天親時數主兵諸酋畏至是以藥羅葛氏世有功不敢自名其族而盡取可汗子孫內之朝廷永貞元年可汗死詔鴻臚少卿孫杲臨弔冊所嗣爲滕里野合俱錄毗伽可汗元和初再朝獻始以摩尼至其法日宴食飲水茹葷屏湮酪可汗常與共國者也摩尼至京師歲往來西市商賈頗與囊橐爲姦三年來告咸安公主喪主歷四可汗居回鶻凡二十一年無幾可汗亦死憲宗使宗正少卿李孝誠冊拜愛登里羅汨蜜施合毗伽保義可汗閱三歲使者再朝遣伊難珠再請昏未報可汗以三千騎至鴨鵝泉於是振武以兵屯黑山治天德城備虜禮部尙書李絳奏言回鶻盛疆北邊空虛一爲風塵則弱卒非抗敵之夫孤城爲不守之地儻陛下懷此增甲兵飭城壘中夏長策生人大幸也臣觀今日處置未得其要夫邊憂有五請歷言之北狄貪沒唯利是視比進馬規直再歲不至豈厭繒帛利哉殆欲風高馬肥而肆侵軼故外壤內備必煩朝廷一可憂兵力未完斥候未明戈甲未備城池未固節天德則虜必疑虛西城則磧道無倚二可憂夫城保要害攻守險易當謀之邊將今乃規河塞之外裁廟堂之上虜猝犯塞應接失便三可憂自修好以來山川形勝兵戍滿虛虜皆悉之賊掠諸州調發在旬朔外其係累人畜在旦夕內比王師至則虜已歸寇能久留役亦轉廣四可憂北狄西戎素相攻討故邊無虞今回鶻不市馬若與吐蕃結約解讐則將臣閉壁憚戰邊人拱手受禍五

可憂又淮西吳少陽垂死可乘其變諸道興發役且十倍臣謂宜聽其昏使守蕃禮所謂三利也和魏趙烽燧不驚城堞可治盛兵以畜力積粟以固軍一也既無北顧憂可南事准右申令於垂盡之寇二都大虜恃我威則西戎怨愈深內不得寧國家坐受其安寇掠長息三也今舍三利取五憂甚非計或曰降主費多臣謂不然我三分天下賦以一事邊今東南大縣賦歲二十萬糴以一縣賦爲昏費非損寡得大乎今惜昏費不與假如王師北征兵非三萬騎五千不能扞且馳也又如保十全之勝一歲輒罷其饋餉供擬豈止一縣賦哉帝不聽

唐書卷二百十七上

唐書卷二百十七上考證

國朝傳上契苾羽為榆溪州○榆溪州舊書作榆林溪州

比粟詞○舊書作妹比粟毒

唐書卷二百七下

宋 端 明 殿 學 士 宋 祁 撰

列傳第一百四十二下

回鶻

回鶻之請昏有司度費當五百萬帝方內討疆節度故遣宗正少卿李誠太常博士殷侗往諭不可穆宗立回鶻又使合達干等來固求昏許之俄而可汗死使者臨册所嗣為登囉羽錄沒密施句主毗伽崇德可汗可汗已立遣伊難珠句錄都督思結等以葉護公主來逆女部渠二千人納馬二萬橐它千四夷之使中國其衆未嘗多此詔許五百人至長安餘留太原詔以太和公主下降主憲宗女也帝為主建府以左金吾衛大將軍胡証光祿卿李憲持節護送太府卿李說為昏禮使册拜主為仁孝端麗明智上壽可敦告于廟天子御通化門餞主羣臣班辭于道公主出塞距回鶻牙百里可汗欲先與主由間道私見胡証不可虜人曰昔咸安公主行之証曰天子詔我送公主授可汗今未見不可先也乃止於是可汗升樓坐東向下設羣帳以居公主請襲胡衣以一姆侍出西向拜已退即次被可敦服絳通裾大襦冠金冠前後銳復出拜已乃升曲輿九相分負右旋于廷者九降輿升樓與可汗聯坐東向羣臣以次謁可敦亦自

建牙以二相出入帳中証等歸可敦大宴悲啼眷慕可汗厚贈使者是時裴度方伐幽鎮回鶻使渠將李義節以兵三千佐天子平河北議者懲艾前患不聽兵已及豐州使者厚賜乃去敬宗卽位之年可汗死其弟曷薩特勒立遣使者冊爲愛登里囉汨沒蜜施合毗伽昭禮可汗賜幣十二車文宗初又賜馬直絹五十萬太和六年可汗爲其下所殺從子胡特勒立使者來告明年遣左驍衛將軍唐弘寶與嗣澤王溶持節冊爲愛登里囉汨沒蜜施合句錄毗伽彰信可汗開成四年其相掘羅勿作難引沙陀共攻可汗可汗自殺國人立廬駭特勒爲可汗方歲飢遂疫又大雪羊馬多死未及命武宗卽位以嗣澤王溶臨告乃知其國亂俄而渠長句錄莫賀與黠曼斯合騎十萬攻回鶻城殺可汗誅掘羅勿焚其牙諸部潰其相駭職與龐特勒十五部奔葛邏祿殘衆入吐蕃安西於是可汗牙部十三姓奉烏介特勒爲可汗南保錯子山黠曼斯已破回鶻得太和公主又自以李陵後與唐同宗故遣使者達干奉主來歸烏介怒追擊達干殺之劫主南度磧邊人大恐進攻天德城振武節度使劉沔屯雲伽關拒卻之宰相李德裕建言回鶻曩有功今飢且亂可汗無歸不可擊宜遣使者贍安之帝用兵部郎中李拭行邊刺狀於是其相赤心與王子嚠沒斯特勒那頡頏將其部欲自歸而公主亦遣使者來言烏介已立因請命又大臣頡干伽思等表假振武居公主可汗帝乃詔右金吾衛大將軍王會持節慰撫其衆輸糧二萬斛不許借振武令十人好

爾開諭又詔使者持冊往潛稽其行須變明年回鶻奉主至漠南入雲朔剽橫水殺掠甚衆轉側天德振武間盜畜牧自如乃召諸道兵合討嚠沒斯以赤心奸桀難得要領卽密約天德戍將田牟誘赤心斬帳下那頡頏收赤心衆七千帳東走振武大同因室韋黑沙南闕幽州節度使張仲武破之悉得其衆那頡頏走烏介執而殺之然烏介兵尙彊號十萬駐牙大同北閭門山而特勒廕俱遮阿敦寧等凡四部及將軍曹磨你衆三萬因仲武降嚠沒斯亦附使者送款帝欲使助可汗復國而可汗已攻雲州劉沔與戰敗續嚠沒斯率三部及特勒大會二千騎詣振武降詔拜嚠沒斯爲右金吾衛大將軍爵懷化郡王以天德爲歸義軍卽拜歸義軍使阿歷支寧邊郡公習勿嚠昌化郡公烏羅思寧朔郡公並爲冠軍大將軍左威衛大將軍愛邪勿寧塞郡公爲右領軍大將軍加賜嚠沒斯牙旗豹尾刀器諸物給其屬冠帶詔宰相德裕采秦漢以來興殊俗忠效卓異者凡三十人爲異域歸忠傳寵賜之嚠沒斯請留族太原率昆弟爲天子扞邊帝命劉沔爲列舍雲朔間處其家可汗遣使者藉兵欲還故廷且假天德城帝不許可汗恚進略大同川轉戰攻雲州刺史嬰壁不敢出詔益發諸鎮兵屯太原以北嚠沒斯等旣朝皆賜李氏名嚠沒斯曰思忠阿歷支曰思貞習勿嚠曰思義烏羅思曰思禮愛邪勿曰弘順卽拜歸義軍副使於是詔劉沔爲回鶻南面招撫使張仲武東面招撫使思忠爲西党項都將西南面招討使沔營鴈門又詔銀州刺史何

清朝蔚州刺史契苾通以蕃渾兵出振武與河仲武合稍逼回鶻思忠數深入諭降其下河分沙陀兵益思忠河中軍以騎五百益弘順河進次雲州思忠屯保大柵率河中陳許兵與回鶻戰敗之明年又爲弘順所破河與天德行營副使石雄料勁騎及沙陀契苾等雜虜夜出雲州走馬邑抵安衆塞逢虜與戰破之烏介方薄振武雄馳入夜穴壘出塵兵烏介驚引去雄追北至殺胡山烏介被創走雄過公主奉主還降特勒以下衆數萬盡收輜帑及所賜詔書可汗收所餘往依黑車子詔弘順清朝窮躡弘順厚啗黑車子以利募殺烏介初從可汗亾者旣不能軍往往詣幽州降留者皆飢寒痕夷裁數千黑車子幸其殘卽殺烏介其下又奉其弟遏捻特勒爲可汗帝詔德裕紀功銘石于幽州以夸後世思忠等以國亾皆願入朝見聽遂罷歸義軍擢思忠左監門衛上將軍兼撫王傳兩稟其奉賜第永樂坊分其兵賜諸節度虜人憚隸食諸道據滹沱河叛劉沔坑殺三千人詔回鶻營功德使在二京者悉冠帶之有司收摩尼書若象燒于道產貨入之官遏捻可汗真殘部五千仰食於奚大會碩舍朗大中初仲武討奚破之回鶻寢耗滅所存名王貴臣五百餘轉依室韋仲武諭令羈致可汗等遏捻懼挾妻葛祿子特勒毒斯馳九騎夜委衆西走部人皆慟哭室韋七姓析回鶻隸之黠戛斯怒與其相阿播將兵七萬擊室韋悉收回鶻遺積北遺帳伏山林間狙盜諸蕃自給稍歸鹿特勒是時特勒已自稱可汗居甘州有積西諸城宣宗務綏柔荒遠

遣使者抵靈州省其酋長回鶻因遣人隨使者來京師帝卽册拜温祿登里邇汨沒蜜施合俱錄毗伽懷建可汗後十餘年一再獻方物懿宗時大會僕固俊自北廷擊吐蕃斬論尙熱盡取西州輪臺等城使達干米懷玉朝且獻俘因請命詔可其後王室亂貢會不常史亾其傳昭宗幸鳳翔靈州節度使韓遜表回鶻請率兵赴難翰林學士韓偓曰虜爲國讐舊矣自會昌時伺邊羽翼未成不得逞今乘我危以冀幸不可開也遂格不報然其國卒不振時時以玉馬與邊州相市云薛延陀者先與薛種雜居後滅延陀部有之號薛延陀姓一利唃氏在鐵勒諸部最雄張風俗大抵與突厥同西突厥處羅可汗之殺鐵勒諸酋也其下往往相率叛去推契苾哥楞爲易勿真莫賀可汗據食汗山泰薛延陀乙失鉢爲野唃可汗保燕末山而突厥射匱可汗復彊二部黜可汗號往臣之回紇拔野古阿跌同羅僕骨白霫在鬱督軍山者東附始畢可汗乙失鉢在金山者西役葉護可汗貞觀二年葉護死其國亂乙失鉢孫曰夷男率部帳七萬附頡利可汗後突厥衰夷男反攻頡利弱之於是諸姓多叛頡利歸之者共推爲主夷男不敢當明年太宗方圖頡利遣遊擊將軍喬師望僂路齋詔書鼓舞册拜夷男爲眞珠毗伽可汗夷男已受命遣使謝歸方物乃樹牙鬱督軍山直京師西北六千里東躡鞞西葉護突厥南沙磧北俱倫水地大衆附於是回紇等諸部莫不伏屬其弟統特勒入朝帝以精刀寶鞭賜之曰下有

大過者以吾鞭鞭之夷男以爲寵頡利可汗之滅塞隧空荒夷男率其部稍東保都尉橐山獨避水之陰
達京師纔三千里而羸東室韋西金山南突厥北瀚海蓋古匈奴地也勝兵二十萬以二子大度設突利
失分將之號南北部七年間使者入朝帝恐後疆大爲患欲產其禍乃下詔拜其二子皆爲小可汗十五
年帝以李思摩爲可汗始度河牙於漠南夷男惡之未發方帝幸洛陽將遂封泰山夷男與其下謀曰天
子封泰山萬國皆助兵悉會行在邊障空軍思摩可取也乃使大度設勒兵二十萬南絕漠壁白道川率
一兵得四馬擊思摩思摩走朔州言狀且請師於是詔營州都督張儉統所部與奚霫契丹乘其東朔州
道行軍總管李勣衆六萬騎三千營朔州靈州道行軍總管李大亮衆四萬騎五千屯靈武慶州道行軍
總管張士貴衆萬七千出雲中涼州道行軍總管李襲譽經略之帝敕諸將曰延陀度漠馬已疲夫用兵
者見利疾進不利亟去今虜不急擊思摩又不速還勢必敗卿等勿與戰須其歸可擊也旣而延陀使者
來求與突厥平帝曰我約漠以北延陀制之漠以南突厥專之有輒相掠誅不赦延陀父事我而首違詔
得非亂邪而曰與突厥和乃故約也尙何請不報大度設次長城思摩已南走大度設度不可得乃遣人
乘長城罵之適會勣兵至行璫屬天遠率衆走赤柯度青山然道回遠勣選敢死士與突騎徑臘河趣白
道及大度設尾之不置大度設顧不脫度諾真水陳以待先是延陀擊沙鉢羅及阿史那社尒皆以徒戰

勝至是却騎不用率五人爲伍一執馬四前關令曰勝則騎而逐負者死沒其家以償戰士及戰突厥兵
進延陀騰逐勣救之延陀縱射馬輒死勣乃以步士百人爲隊擣其罽虜潰部將薛萬徹率勁騎先收執
馬者故延陀不能去斬首數千級獲馬萬五千大度設亾去萬徹追弗及殘卒奔漠北會雪甚衆輒踏死
者十八始延陀能以術禱神致雪冀困勣師及是及自倣云勣還入定襄天子遣使者齎璽書勞問賞功
卹死延陀之使留待命者帝悉還之曰歸語爾可汗爾自負其盟以突厥爲弱厚誅斂之又取首領以爲
質且我爲天下主渠嘗賦發於爾邪後有利害當謹思毋違也延陀乃遣使謝罪又遣其仲父沙鉢羅獻
馬三千因請昏帝曰延陀本一俟斤我則立之度其力孰與頡利比而敢撓邊乎不許昏明年以使來益
獻馬牛羊橐它固求昏帝與大臣計曰延陀屈疆朕策顧有二選士十萬擊之使無遺種百年計也絕昏
羈縻使無邊憂三十年計也然則孰利房玄齡曰今大亂餘氓瘵破未完戰雖勝猶危道也不如和親帝
曰善許以新興公主下嫁召突利失大享羣臣侍陳寶器奏慶善破陳盛樂及十部伎突利失頓首上千
萬歲壽詔夷男親迎帝將幸靈州以成昏事夷男大喜詔曰我鐵勒部人耳上以我爲可汗公主以女我
乘輿爲我幸邊誰與我榮乃攬賦諸下羊馬爲賞或設夷男曰可汗與唐皆一國主奈何往朝有如見執
尙可悔夷男曰不然吾聞唐天子有德四方共臣之藉獨留我磧北亦須有主然舍我而求它非計也下

乃不敢冒時帝詔有司受所獻延陀無府庫調斂於下不亟集又度磧水草乏馬羊多死納貢後期帝亦止行畜口耗死僅半議者謂夷狄嘗爲中國患今禮不具而與昏恐後有輕中國心乃下詔絕昏謝其使或曰既許之信不可失帝曰公等計非也昔漢匈奴強中國不抗故飾子女嫁單于今北狄弱我能制之而延陀方謹事我者顧新立倚我以服衆彼同羅僕骨力足制延陀而不發懼我也我又妻之固中國塔名重而援堅諸部將歸之戎狄野心能自立則叛矣今絕昏使諸姓聞之將爭擊延陀亾可待也李思摩果侵掠之延陀遣突利失寇定襄詔李勣逐出塞俄遣使請率師助伐高麗以刺帝意帝引使者謂曰歸語爾可汗我父子東征能寇邊者可卽來夷男沮縮不敢謀以使謝固請助軍帝嘉答高麗莫離支令赫勒以厚利啗夷男欲與連和夷男氣素索不發亦會病死帝爲祭于行始延陀請以庶子曳莽爲突利失可汗統東方嫡子拔灼爲肆葉護可汗統西方白道之役曳莽實爲之謀國人多怨及會葬曳莽亟還部拔灼分兵襲殺之自立爲頡利俱利失薛沙多彌可汗方是時王師猶在遼因卽寇邊帝遣江夏王道宗屯明州代州都督薛萬徹左驍衛大將軍阿史那社尒屯勝州左武侯大將軍薩孤吳仁屯靈州執失思力與突厥倚角塞下唐書卷一百一十七下唐兵至矣衆大擾諸部遂潰多彌可汗以十餘騎遁去依唐使者遇於靺鞨東鄙小戰不利還怖國人

阿史那時健俄爲回紇所殺盡屠其宗衆五六萬奔西城立眞珠毗伽可汗昆弟子咄摩支號伊特勿失可汗遣使者上言願保鬱督軍山帝詔兵部尙書崔敦禮與李勣慰安之俾定其國鐵勒諸部素服延陀而咄摩支雖衰子尙臣畏之帝恐卒爲患詔勣等曰降則撫之叛則擊之勣至咄摩支大駭陰欲拒戰外好言乞降勣知之縱兵擊斬五千餘級係老孺三萬遂滅其國咄摩支聞天子使者蕭嗣業在回紇身詣嗣業丐降入朝拜右武衛將軍賜田宅初延陀將滅有丐食於其部者延客帳下妻視客人而狼首主不覺客已食妻語部人共追之至鬱督軍山見二人焉曰我神也薛延陀且滅追者懼却走遂失之至是果敗此山下帝以延陀滅欲并契苾等降之復遣道宗率阿史那社尒等分部窮討帝幸靈州節度諸將於是鐵勒十一部皆歸命天子請吏內屬道宗等徑磧擊延陀餘衆阿波達干斬首千餘級逐北二百里萬徹抵北道諭降回紇諸酋虜所遣使踵及帝行在凡數千人上言天至尊爲可汗世世以奴事死不恨帝剖其地爲州縣北荒遂平諸姓有來朝者帝勞曰爾來若鼠得穴魚得泉我爲爾深廣之又曰我在天下四夷有不安安之不樂樂之如驢尾受蒼蠅可使日千里也於是告功太廟賜民三日醕後三年餘部叛以右領軍大將軍執失思力討平之至永徽時延陀部亾散者悉還高宗爲置嶠彈州處安之拔野古一曰拔野固或爲拔曳固漫散磧北地千里直僕骨東隣于靺鞨帳戶六萬兵萬人地有薦草產

夏馬精鐵有川曰康干河斷松投之三年輒化爲石色蒼繳然節理猶在世謂康干石者俗嗜獵射少耕獲乘木逐鹿冰上風俗大抵鐵勒也言語少異貞觀三年與僕骨同羅奚霫同入朝二十一年大俟利發屈利失舉部內屬置幽陵都督府拜屈利失右武衛大將軍卽爲都督顯慶時與思結僕固同羅叛以左武衛大將軍鄭仁泰擊之斬其渠首至天寶間能自來朝

僕骨亦曰僕固在多覽葛之東帳戶三萬兵萬人地最北俗梗鶩難召率始臣突厥後附薛延陀延陀滅其酋婆旬俟利發歌濫拔延始內屬以其地爲金微州拜歌濫拔延爲右武衛大將軍徽州都督開元初爲首領僕固所殺詣朔方降有司誅之子曰懷恩至德時以功至朔方節度使自有傳

同羅在薛延陀北多覽葛之東距京師七千里而羸勝兵三萬貞觀二年遣使者入朝久之請內屬置龜林都督府拜酋俟利發時健啜爲左領軍大將軍卽授都督安祿山反劫其兵用之號曳落河者也曳落河猶言健兒云

渾在諸部最南者突厥頡利敗時有俟利發阿食支款塞薛延陀之滅大俟利發渾汪舉部內向以其地爲卑蘭都督府後分東西州太宗以阿食支於汪屬尊遣譯者諷汪汪欣然避位帝嘉其讓以阿食支爲右領軍衛大將軍卑蘭州刺史汪雲磨將軍兼俟利發爲之副阿食支死子回貴嗣回貴死子大壽嗣大

壽死子釋之嗣釋之驚勇不凡從哥舒翰拔石堡城遷右武衛大將軍封汝南郡公李光弼保河陽釋之以朔方都知兵馬使爲裨將進靈朔郡王知朔方節度留後僕固懷恩之走聲爲歸鎮釋之曰是必衆潰將拒之其甥張韶曰彼如悔禍還鎮渠可不納釋之信之乃納懷恩懷恩已入使韶殺釋之收其軍已而惡韶罵曰若負舅肯忠於我折其脛囚死彌峨城釋之子域建中功臣也自有傳

契苾亦曰契苾羽在焉耆西北鷹娑川多覽葛之南其酋哥楞自號易勿直莫賀可汗弟莫賀咄特勒皆有勇莫賀咄死子何力尙紐率其部來歸時貞觀六年也詔處之甘涼間以其地爲榆溪州永徽四年以其部爲賀蘭都督府隸燕然都護何力有戰功忠節臣也太和中其種帳附於振武云

多覽葛亦曰多濫在薛延陀東濱同羅水勝兵萬人延陀已滅其酋俟斤多濫葛末與回紇皆朝以其地爲燕然都督府授右衛大將軍卽爲府都督死以多濫葛塞匱爲大俟利發繼爲都督

阿跌亦曰訶哩或爲跌跌始與拔野古等皆朝以其地爲雞田州開元初跌跌思泰自突厥默啜所來降其後光進光顏皆以戰功至大官賜李氏附屬籍自有傳

葛邏祿本突厥諸族在北廷西北金山之西跨僕固振水包多怛嶺與車鼻部接有三族一謀落或爲謀刺二熾俟或爲婆旬三踏實力永徽初高侃之伐車鼻可汗三族皆內屬顯慶二年以謀部落爲陰山都

督府熾俟部爲大漠都督府踏實力部爲玄池都督府卽用其酋長爲都督後分熾俟部置金附州三族當東西突厥間常視其興衰附叛不常也後稍南徙自號三姓葉護兵疆甘於闐延州以西諸突厥皆畏之開元初再來朝天寶時與回紇拔悉蜜共攻殺烏蘇米施可汗又與回紇擊拔悉蜜走其可汗阿史那施於北廷奔京師葛祿與九姓復立回紇葉護所謂懷仁可汗者也於是葛祿之處烏德隄山者臣回紇在金山北廷者自立葉護歲來朝久之葉讓頓毗伽縛突厥叛酋阿布思進封金山郡王天寶間凡五朝至德後葛邏祿寔盛與回紇爭疆徙十姓可汗故地盡有碎葉怛邏斯諸城然限回紇故朝會不能自達于朝

拔悉蜜貞觀二十三年始來朝天寶初與回紇葉護擊殺突厥可汗立拔悉蜜大會阿史那施爲賀臘毗伽可汗遣使者入謝玄宗賜紫文袍金鈿帶魚袋不三歲爲葛邏祿回紇所破奔北廷後朝京師拜左武衛將軍地與衆歸回紇

都播亦曰都波其地北瀕小海西望昆南回紇分三部皆自統制其俗無歲時結草爲廬無畜牧不知稼穡土多百合草掇其根以飯捕魚鳥獸食之衣貂鹿皮貧者緝鳥羽爲服其昏姻富者納馬貧者效鹿皮草根死以木匱斂置山中或系于樹送葬哭泣與突厥同無刑罰盜者倍輸其贓貞觀二十一年因骨利

幹入朝亦以使通中國

骨利幹處瀚海北勝兵五千草多百合產良馬首似橐它筋骼壯大日中馳數百里其地北距海去京師最遠又北度海則晝長夜短日久烹羊腓熟東方已明蓋近日出處也旣入朝詔遣雲麾將軍康蘇蜜勞答以其地爲玄闕州其大會俟斤因使者獻馬帝取其異者號十驥皆爲美名曰騰霜白曰皎雪驄曰凝露驄曰縣光驄曰決波驄曰飛霞驄曰發電赤曰流金驄曰翔麟紫曰奔虹赤厚禮其使龍朔中以玄闕州更爲余吾州隸瀚海都督府延載初亦來朝

白靄居鮮卑故地直京師東北五千里與同羅僕骨接避薛延陀保奧支水冷陁山南契丹北烏羅渾東赫靺西拔野古地圓袤二千里山緣其外勝兵萬人業射獵以赤皮緣衣婦貫銅釧以子鈴綴襟其部有三曰居延曰無若沒曰潢水其君長臣突厥頡利可汗爲俟斤貞觀中再來朝後列其地爲賓州以別部爲居延州卽用俟斤爲刺史顯慶五年授酋長李含珠爲居延都督含珠死弟厥都繼之後無聞焉斛薛處多濫葛北勝兵萬人奚結處同羅北思結在延陀故牙二部合兵凡二萬旣來朝列其地州縣之太宗時北狄能自通者又有烏羅渾或曰烏洛侯曰烏羅護直京師東北六千里而羸東赫靺西突厥南契丹北烏丸大抵風俗皆赫靺也烏丸或曰古丸又有鞠或曰穢居拔野古東北有木無草地多苦無羊

馬人象鹿若牛馬惟食苔俗以駕車又以鹿皮爲衣聚木作屋尊卑共居又有兪折者地差大俗與拔野古相埒少羊馬多貂鼠又有駁馬者或曰弊刺曰渴羅支直突厥之北距京師萬四千里隨水草然喜居山勝兵三萬地常積雪木不凋以馬耕田馬色皆駁因以名國云北極於海雖畜馬而不乘資漚酪以食好與結骨戰人貌多似結骨而語不通皆鬪髮樺皮帽構木類并幹覆樺爲室各有小君長不能相臣也大漢者處鞠之北饒羊馬人物碩大故以自名與鞠俱隣於黠戛斯劍海之瀕此皆古所未賓者當貞觀逮永徽奉貂馬入朝或一再至

黠戛斯古堅昆國也地當伊吾之西焉耆北白山之旁或曰居勿曰結骨其種雜丁零乃匈奴西鄙也匈奴封漢降將李陵爲右賢王衛律爲丁零王後鄧支單于破堅昆于時東距單于廷七千里南車師五千里鄧支留都之故後世得其地者訛爲結骨稍號紇骨亦曰紇圻斯云衆數十萬勝兵八萬直回紇西北三千里南依貪漫山地夏沮洳冬積雪人皆長大赤髮皙面綠瞳以黑髮爲不祥黑瞳者必曰陵苗裔也男少女多以環貫耳俗趨仇男子有勇黥其手女已嫁黥項雜居多淫佚謂歲首爲茂師哀以三哀爲一時以十二物紀年如歲在寅則曰虎年氣多寒雖大河亦半冰稼有禾粟大小麥青稞步禮以爲麩糜糲以二月種九月穫以飯以釀酒而無果蔬畜馬至壯大以善鬪者爲頭馬有窠它牛羊牛爲多富農至數

千其獸有野馬骨咄黃羊羆羆鹿黑尾黑尾者似麋尾大而黑魚有殘者長七八尺莫癩者無骨口咄頤下鳥鴈鷺烏鵲鷹隼木松樺榆柳蒲松高者仰射不能及顛而樺尤多有金鐵錫每兩俗必得鐵號迦沙爲兵絕犀利常以輪突厥其戰有弓矢旗幟其騎士析木爲盾蔽股足又以圓盾傅肩可捍矢刃其君曰阿熱遂姓阿熱氏建一纛下皆尙赤餘以部落爲之號服貴貂豹阿熱冬帽貂夏帽金釧銳頂而卷末諸下皆帽白氈喜佩刀礪賤者衣皮不帽女衣氈毼錦屬綾蓋安西北廷大食所買售也阿熱駐牙青山周柵代垣聯甍爲帳號密的支它首領居小帳凡調兵諸部役屬者悉行內貂鼠青鼠爲賦其官宰相都督職使長史將軍達干六等宰相七都督三職使十皆典兵長史十五將軍達干無員諸部食肉及馬酪惟阿熱設餅餌樂有笛鼓笙箏盤鈴戲有弄駝師子馬伎繩伎祠神惟主水草祭無時呼巫爲甘昏嫁納羊馬以聘富者或百千計喪不斃面三環尸哭乃火之收其骨歲而乃墓然後哭泣有節冬處室木皮爲覆其文字言語與回鶻正同法最嚴臨陳檮杌使不稱妄議國若盜者皆斷首子爲盜以首著父頸非死不脫阿熱牙至回鶻牙所窠它四十日行使者道出天德右二百里許抵西受降城北三百里許至鶻鶻泉泉西北至回鶻牙千五百里許而有東西二道泉之北東道也回鶻牙北六百里得仙娥河河東北曰雪山地多水泉青山之東有水曰劍河偶艇以度水悉東北流經其國合而北入于海東至木馬突厥三

部落曰都播彌列哥俄支其酋長皆爲頡斤樺皮覆室多善馬俗乘木馬馳冰上以板藉足屈木支腋蹶輒百步勢迅激夜鈔盜晝伏匿堅昆之人得以役屬之堅昆本疆國也地與突厥等突厥以女妻其酋豪東至骨利幹南吐蕃西南葛邏祿始隸薛延陀延陀以頡利發一人監國其酋長三人曰訖悉輩曰居沙波輩曰阿米輩共治其國未始與中國通貞觀二十二年聞鐵勒等已入臣卽遣使者獻方物其酋長俟利發失鉢屈阿棧身入朝太宗勞享之謂羣臣曰往渭橋斬三突厥自謂功多今俟利發在席更覺過之俟利發酒酣奏願得持笏帝以其地爲堅昆府拜俟利發左屯衛大將軍卽爲都督隸燕然都護高宗世再來朝景龍中獻方物中宗引使者勞之曰而國與我同宗非它蕃比屬以酒使者頓首玄宗世四朝獻乾元中爲回紇所破自是不能通中國後狄語訛爲黠戛斯蓋回鶻謂之若曰黃赤面云又訛爲戛戛斯然常與大食吐蕃葛祿相依仗吐蕃之往來者畏回鶻剽鈔必住葛祿以待黠戛斯護送大食有重錦其載二十囊它乃勝旣不可兼負故裁爲二十四每三歲一餉黠戛斯而回鶻授其君長阿熱官爲毗伽頡斤回鶻稍衰阿熱卽自稱可汗其母突厥施女也爲母可敦妻葛祿葉護女爲可敦回鶻遣宰相伐之不勝擊闕二十年不解阿熱恃勝乃肆言曰爾運盡矣我將收爾金帳於爾帳前馳我馬植我旗爾能抗匪來卽不能當疾去回鶻不能討其將句錄莫賀導阿熱破殺回鶻可汗諸特勒皆潰阿熱身自將焚其

牙及公主所廬金帳者回鶻可汗常坐也乃悉收其寶貲并得太和公主遂徙牙牢山之南牢山亦曰賭蒲距回鶻舊牙度馬行十五日阿熱以公主唐貴女遣使者衛送公主還朝爲回鶻烏介可汗邀取之并殺使者會昌中阿熱以使者見殺無以通于朝復遣注吾合素上書言狀注吾虜姓也合言猛素者左也謂武猛善左射者行三歲至京師武宗大悅班渤海使者上以其處窮遠能修職貢命太僕卿趙蕃持節臨慰其國詔宰相卽鴻臚寺見使者使譯官考山川國風宰相德裕上言貞觀時遼國皆來中書侍郎顏師古請如周史臣集四夷朝事爲王會篇今黠戛斯大通中國宜爲王會圖以示後世有詔以鴻臚所得續著之又詔阿熱著宗正屬籍是時烏介可汗餘衆託黑車子阿熱願乘秋馬肥擊取之表天子請師帝令給事中劉濛爲巡邊使朝廷亦以河隴四鎮十八州久淪戎狄幸回鶻破弱吐蕃亂相殘齧可乘其衰乃以右散騎常侍李拭使黠戛斯册君長爲宗英雄武誠明可汗未行而武宗崩宣宗嗣位欲如先帝意或謂黠戛斯小種不足與唐抗詔宰相與臺省四品以上官議皆曰回鶻盛時有册號今幸衰亾又加黠戛斯後且生患乃止至大中元年卒詔鴻臚卿李業持節册黠戛斯爲英武誠明可汗逮咸通間三來朝然卒不能取回鶻後之朝聘册命史臣失傳

贊曰夷狄資悍貪人外而獸內惟剽奪是視故湯武之興未嘗與共功蓋疏而不戚也太宗初興嘗用突

厥矣不勝其暴卒縛而臣之肅宗用回紇矣至略華人辱太子管殺近臣求索無倪德宗又用吐蕃矣劫平涼敗上將空破西陲所謂引外禍平內亂者也夫用之以權制之以謀惟太宗能之若二主懦昏狃而狎之烏勝其弊哉彼親之則責償也多嫌而不滿則滋怨化以仁義則頑示以法則忿熟我險易則爲患也博而慘療餒以野葛何時可哉故春秋許夷狄者不一而足信矣

唐書卷二百十七下

唐書卷二百十七下考證

回鶻傳下敬宗卽位之年○臣酉按敬宗紀在寶曆元年五月

思忠思貞思義思禮○舊書作思恩思愛無思義思禮

唐書卷二百七下考證

唐書卷二百十八

宋 端 明 殿 學 士 宋 祁 撰

列傳第一百四十三

沙陀

沙陀西突厥別部處月種也始突厥東西部分治烏孫故地與處月處蜜雜居貞觀七年太宗以鼓露立
 利鄰咄陸可汗而族人步真缺望謀并其弟彌射乃自立彌射懼率處月等入朝而步真勢窮亦歸國具
 留者咄陸以射匱特勒劫越之子賀魯統之西突厥寢疆內相攻其大會乙毗咄陸可汗建廷鐵昌山之
 西號北廷而處月等又隸屬之處月居金娑山之陽蒲類之東有大磧名沙陀故號沙陀突厥云咄陸寇
 伊州引二部兵圍天山安西都護郭孝恪擊走之拔處月俟斤之城後乙毗可汗敗奔吐火羅賀魯來降
 詔拜瑤池都督徙其部廷州之莫賀城處月朱邪闕俟斤阿厥亦請內屬永徽初賀魯反而朱邪孤注亦
 殺招慰使連和引兵據牢山於是射脾俟斤沙陀那速不肯從高宗以賀魯所領授之明年弓月道總管
 梁建方契苾何力引兵斬孤注俘九千人又明年廢瑤池都督府即處月地置金滿沙陀二州皆領都督
 賀魯亡安撫大使阿史那彌射次伊麗水而處月來歸乃置崑陵都護府統咄陸部以彌射為都護龍朔

乾隆四年校刊

唐書卷二百十八列傳

初以處月酋沙陀金山從武衛將軍薛仁貴討鐵勒授墨離軍討擊使長安二年進爲金滿州都督累封張掖郡公金山死子輔國嗣先天初避吐蕃徙部北廷率其下入朝開元二年復領金滿州都督封其母鼠尼施爲鄯國夫人輔國累爵永壽郡王死子骨咄支嗣天寶初回紇內附以骨咄支兼回紇副都護從肅宗平安祿山拜特進驍衛上將軍死子盡忠嗣累遷金吾衛大將軍酒泉縣公至德寶應間中國多故北廷西州閉不通朝奏使皆道出回紇而虜多漁獵尤苦之雖沙陀之倚北廷者亦因其暴斂貞元中沙陀部七千帳附吐蕃與共寇北廷陷之吐蕃徙其部甘州以盡忠爲軍大論吐蕃寇邊常以沙陀爲前鋒久之回鶻取涼州吐蕃疑盡忠持兩端議徙沙陀于河外舉部愁恐盡忠與朱邪執宜謀曰我世爲唐臣不幸陷汚今若走蕭關自歸不愈於絕種乎盡忠曰善元和三年悉衆三萬落循烏德鞬山而東吐蕃追之行且戰旁洮水奏石門轉鬪不解部衆略盡盡忠死之執宜哀癡傷士裁二千騎七百雜畜橐它千計歎靈州塞節度使范希朝以聞詔處其部鹽州置陰山府以執宜爲府兵馬使沙陀素健鬪希朝欲藉以捍虜爲市牛羊廣畜牧休養之其童羣自鳳翔興元太原道歸者皆還其部盡忠弟葛勒阿波率殘部七百叩振武降授左武衛大將軍兼陰山府都督執宜朝長安賜金幣袍馬萬計授特進金吾衛將軍然葛勒以靈武迫吐蕃恐後反覆生變又瀕邊益口則食翔價頃之希朝鎮太原因詔沙陀舉軍從之希朝乃

料其勁騎千二百號沙陀軍置軍使而處餘衆于定襄川執宜乃保神武川之黃花堆更號陰山北沙陀是時天子伐鎮州執宜以軍七百爲前鋒王承宗衆數萬伏木刀溝與執宜遇飛矢雨集執宜提軍橫貫賊陳慶闢李光顏等乘之斬首萬級鎮兵解進蔚州刺史王鐔節度太原建言朱邪族孽熾散居北川恐敢野心願析其族隸諸州勢分易弱也遂建十府以處沙陀八年回鶻過磧南取西城柳谷詔執宜屯天德明年伐吳元濟又詔執宜隸李光顏破蔡人時曲拔凌雲柵元濟平授檢校刑部尚書猶隸光顏軍長慶初伐鎮州悉發沙陀與易定軍犄角破賊深州執宜入朝留宿衛拜金吾衛將軍太和中柳公綽領河東奏陞北沙陀素爲九姓六州所畏請委執宜治雲朔塞下廢府十一料部人三千禦北邊號代北行營授執宜陰山府都督代北行營招撫使隸河東節度執宜死子赤心嗣開成四年回鶻徑磧口抵榆林塞宰相掘羅勿以良馬三百遺赤心約共攻彰信可汗可汗死節度使劉沔以沙陀擊回鶻于殺胡山久之伐潞誅劉稹詔赤心率代北騎軍三千隸石雄爲前軍破石會關助王宰下天井合太原軍次榆社與監軍使呂義忠禽楊弁潞州平遷朔州刺史仍爲代北軍使大中初吐蕃合党項及回鶻殘衆寇河西太原王宰統代北諸軍進討沙陀常深入寇諸軍赤心所向虜輒披靡曰吾見赤馬將軍火生頭上始沙陀臣吐蕃其左右壯溷男女略與同而馳射趨悍過之虜倚其兵常苦邊及歸國吐蕃繇此亦衰宣宗已復

三州七關征西戍皆罷乃遷赤心蔚州刺史雲州守捉使龐勛亂詔義成康承訓爲行營招討使赤心以突騎三千從承訓兵絕渙水遇伏墮圍中幾沒赤心以騎五百撤出之勛欲速戰衆八萬短兵接赤心勒勁騎突賊與官軍夾擊敗之其弟赤衷以千騎追之毫東勛平進大同軍節度使賜氏李名國昌預鄭王屬籍賜親仁里甲第回鶻叩榆林擾靈鹽詔國昌爲鄜延節度使又寇天德乃徙節振武進檢校司徒王仙芝陷荆襄朝廷發諸州兵討捕國昌遣劉遷統雲中突騎逐賊數有功乾符三年段文楚爲代北水陸發運雲州防禦使是時無年文楚股損用度下皆怨邊校程懷信王行審蓋寓李存璋薛鐵山康君立等曹議曰世多難丈夫當投罅立功段公乃儒者難共計沙陀雄勁李振武父子勇冠軍我若推之無不應則代北唾手可定拾取富貴若何咸曰善乃夜謁國昌子雲中守捉使克用曰歲艱粟食削吾等不忍餓死公家威德著聞請誅虐帥安部內克用許之募得士萬人趨雲州次鬪鷄臺城中執文楚至殺之據州以聞共丐克用爲大同防禦留後不許發諸道兵進捕諸道不甚力而黃巢方引度江朝廷度未能制乃赦之以國昌爲大同軍防禦使國昌不受命詔河東節度使崔彥昭幽州張公素共擊之無功國昌與党項戰未決大同川吐渾赫連鐸振武盡取其貲械國昌窮挈騎五百還雲州州不納鐸遂取之克用轉側蔚朔間裒兵纔三千屯新城鐸引萬人圍之隧而攻三日不拔鐸兵殺傷甚國昌自蔚州來鐸引去僊

宗以鐸領大同節度畀討國昌六年詔昭義李鈞爲北面招討使督潞太原兵屯代州幽州李可舉會鐸攻蔚州國昌以一隊當之克用分兵抵遮虜城拒鈞天大雪士瘁仆鈞衆潰還代州軍遂亂鈞死于兵廣明元年以李琢爲蔚朔招討都統率兵數萬屯代州克用使傅文達調蔚朔兵朔州刺史高文集縛以送琢琢進攻蔚州國昌敗與克用舉宗奔達祖鐸密畱長圖之克用得其計因豪筴大會馳射百步外針芒木葉無不中部人大驚卽倡言今黃巢北寇爲中原患一日天子赦我願與公等南向定天下庸能終老沙磧哉達韜知不留乃止巢攻潼關入京師詔河東監軍陳景思發代北軍時沙陀都督李友金屯興唐軍薩葛首領米海萬安慶都督史敬存屯感義軍克用客塞下衆數千無所屬景思聞天子西乃與友金料騎五千入居絳兵擅劫帑自私還代州益募士三萬屯隴西士嚮縱友金不能制謀曰今合大眾不得威名宿將且無功吾兄司徒父子材而雄衆所推畏比得罪于朝僑戍北部不敢還今若召之使將兵代北豪英一呼可集整行伍鼓而南賊不足平也景思曰善乃丐赦國昌使討賊贖罪有詔拜克用代州刺史忻代兵馬留後促本軍討賊克用募遠韜萬人趨代州將南道太原節度使鄭從讜塞石嶺關不得前克用僂道至太原營城下五日邀糧從讜不答乃大略還屯代州中和二年蔚州刺史蘇祐會赫連鐸兵將攻代州克用率騎五百先襲蔚州下之祐屯美女谷鐸與幽州李可舉衆七萬攻蔚州譙柵相屬

克用直擣營人蔚州燔府庫棄而去屯鴈門國昌自達鞞率兵歸代州擾汾并樓煩不釋鎧帝詔克用還軍朔州於是義武節度使王處存河中節度使王重榮傳詔招克用同討巢克用喜即大閱鴈門得忻代蔚朔達鞞衆三萬騎五千而南於是國昌守代州鄭從讜不肯假道克用軍傳太原而營奉幣馬遣從讜身從數騎呼曰我且西願與公一言從讜升陴慰勉歸貨幣饗饋克用乃自陰地趨晉會河中帝聞擢克用鴈門節度神策天靈軍鎮遏忻代觀察使明年宰相王鐸承制授克用東北面行營都統河東監軍陳景思爲監軍使克用使弟克脩領數騎五百度河克用自夏陽濟留薛阿檀扼津口次同州壁乾阮與賊戰梁田坡敗之進壁渭橋遂收京師功第一進同中書門下平章事隴西郡公國昌爲代北軍節度使未幾以克用領河東節度黃巢與秦宗權合寇河南四年克用率河東代北兵將自澤潞下天井關河陽諸葛爽堙井以拒克用乃繇河中濟趨許州合徐汴兵破尙讓于太康戰西華又破之賊走河南平追北曹州還過汴宋全忠邀之克用留兵于郊入舍上源館夜帳飲全忠自佐饗進貨寶握手諄勞是時全忠忌克用桀邁難制則連車外環陳兵道左右克用醉乃攻館下拒戰親將郭景銖滅燭扶克用徐告之尙被酒乃引弓射會煙囪四合大震電克用與薛志勤等間關升南譙門縋走營部下死者數百人所獲賊乘輿物盡亡之克用整衆歸太原益訓兵將報讐使弟克勤以萬騎屯河中乃請擊全忠使者八返內外震

恐帝使內謁慰解尋進位檢校太傅隴西郡王光啟元年幽州李可舉鎮州王景崇言易定故燕趙境請取分之於是可舉攻易州下之景崇攻無極易定節度使王處存求救於克用克用自將救無極敗鎮人攻馬頭固新城鎮兵走處存復取易州鳳翔李昌符邠盜朱玫與全忠連和觀軍容使田令孜惡克用與王重榮合建言不可處近輔請授王處存河中而徙重榮於易定則克用孤矣帝從之重榮以告克用怒曰我當從公提鼓出汜水關誅全忠迴殲穴鼠耳重榮計曰公兵朝出關則邠岐兵夕傳吾堞願先治邠岐克用乃表言玫昌符連全忠爲亂請以兵十五萬度河梟二豎然後平汴雪大恥願陛下戒嚴無爲賊所播帝遣使慰止背相望也克用不奉詔攻亦引邠鳳兵營沙苑克用薄戰攻敗夜亡去克用還河中天子出趣鳳翔道傳兵且至即趨寶雞克用與重榮聯章請還宮願留兵衛京師卽還鎮帝懼走大散關駐輿元克用引歸嗣襄王熿僞詔至太原克用燔之執其使問道奉表興元始朝廷意玫結克用迫乘輿及表至示羣臣因騰曉山南諸鎮行在少安王行瑜斬玫克用以千騎經略京畿三年國昌卒俄而昭宗卽位進克用檢校太師兼侍中大順初克用自攻赫連鐸於雲州拔東鄆幽州李匡威以兵三萬救之殺其將安金俊克用走鐸與匡威共建言山南亂克用實首之今乘其敗可伐而取也全忠亦請與河北三鎮共討之宰相張浚是其計乃下制削克用官爵屬籍以浚爲兵馬招討制置宣慰使京兆尹孫揆副之樞

憲使略全誣爲行營都監華州節度使韓建爲行營馬步都虞候兼供軍糧料使王鎔領河東東面全忠南面李匡威北面並爲行營招討使鐸副匡威先薄戰克用追潞兵不肯行共殺守將李克恭送款于汴獻首闕下更詔揆爲昭義節度使克用將李存孝邀揆長子殺之匡威鐸并吐蕃黠戛斯衆十萬攻遼虜軍殺其將劉胡子克用乃屯渾河川存孝與鐸戰樂安鐸敗走潛入陰地關壁汾隰薛鐵山李承嗣營洪洞迎戰存孝次趙城韓建夜出壯士三百乘其營存孝伏以待建兵大奔存孝攻絳州未下晉州刺史張行恭棄城走建與潛遁明年克用奉表自陳乃復拜檢校太師守中書令隴西郡王克用悉兵攻鐸雲州以騎將薛阿檀爲前軍設伏河上鐸縱騎追阿檀遇伏而奔鐸亡入吐渾克用取雲州以部將石善友爲刺史大同軍防禦使景福初鎮州王鎔攻堯山克用使李嗣勳擊之斬級三萬克用遂拔天長略常山度薄沱燔其郭徇地至趙取鼓藁二城赫連鐸衆八萬攻天城軍克用飛檄發軍太原匡威已壁雲州北郊克用自神堆引軍夜入雲州死戰走之乾寧元年克用次新城鐸膝行詣軍門降克用鞭而縱之進下武州攻新州李匡壽引步騎七萬救之克用迎戰斬首萬級俘少將三百徇城下新州降取媯州匡壽棄幽州走明年幽州降克用以劉仁恭爲留後乃旋王行瑜韓建李茂貞連兵南關下殺李谿克用盡調北部兵度河拔絳州斬刺史王瑤次河中王珂謁于道同州王行約奔京師圍韓建于華州京師震動帝爲

幸石門蒞城遣內謁都延昱慰勞且言茂貞屯豎屋行瑜屯興平克用乃進營渭橋帝以嗣廷王戒丕嗣丹王允詔克用擊邠鳳克用奉詔屯渭北遣史儼以驃騎三千護石門且令王珂輸河中粟備行在帝以赤詔嘉咎進克用諸道兵馬都招討使命二嗣王兄事之令促討行瑜克用請帝還京師以二千騎衛乘輿時宮室煨殘駐尙書省百官喪馬克用進乘輿金貝裝二駟又上百乘給從官進太師兼中書令邠靈四面行營都統行瑜壁黎園茂貞自率師三萬逼咸陽而屯克用請帝責茂貞罷兵因削官爵願與河中共討之帝詔第事行瑜貸茂貞俸結好朱詔賜魏國夫人陳氏陳襄陽人也善書帝所愛欲急平賊故予之茂貞以兵援龍泉克用使李罕之李存審夜引兵劫其餉援兵亡行瑜潰而走追殺萬計行瑜入邠州丐歸款克用使史儼入其城行瑜死慶州傳首京師帝悉論幕府官屬及諸子功封爵之克用賜號忠貞平難功臣進封晉王克用屯雲陽遣李習吉入朝且請與王珂悉力討茂貞帝不許克用私於使者曰叛根不除憂未艾也天子發度支錢三十萬緡勞其軍時鄆州朱宣兄弟爲全忠所困使來告克用請道于魏救之兵解復關克用自將而往使李存信率兵三萬與史儼等次于莘爲魏兵所破克用怒大略相魏去始茂貞畏克用見討脩貢獻如藩臣及克用還絕貢獻與韓建謀以兵入朝帝懼詔克用進衛京師帝謀度河幸太原遣延王入克用軍促迎天子既次渭北建固請幸華州克用謂王曰患本於不斷願上

自爲之李存信攻魏葛從周引衆三萬來援戰洹水上汴人夜坎諸野開合克用子落落馬墮而顛克用救之亦顛追兵迫射之乃免存信已傳魏城克用并力羅弘信以捉生逆戰爲克用所敗追及郛叩關而還於是陝州王珙攻河中李嗣昭援珂再戰再勝珙圍解帝使延王持節至太原謂克用曰不用卿計故速此無可言者今我寄於華百司羣官無所託非卿尙誰與憂不則不復見宗廟矣王至太原克用留累月每大張飲王必以舞屬克用因陳國事涕數行下冀感動之時劉仁恭據幽州貳于克用數召兵不應克用以書讓之仁恭得書抵于地遂顯絕故克用內憂幽州以好辭謝王不復有西意俄自將屯蔚州會農大冢冥仁恭來薄戰克用大敗走太原大將多死全忠奪邢磁洛三州茂貞度克用沮撓無能出師乃與韓建謀好致書言帝暴露累年請共治宮室迎天子初長安自石門之奔宮殿焚圯及岐人再逆火闔里皆盡宮城昏夜狐狸鳴啼無人跡帝幸華西溪望舊京必泣然流涕左右悽塞不得語王建方盜兩川茂貞欲披其鄙私之數南師不暇東而全忠繕治洛陽茂貞因約克用共其勞克用辭窮乃出貲爲助光化初帝還京師詔克用與全忠解備宰相徐彥若崔胤皆勸之克用勢已折然尙以功高位全忠上恥先下之時王鎔方睦於汴乃遺書鎔使爲己倡全忠卽遣使奉書幣恭甚克用亦報之然汴日益張窮關不置王珙請汴兵攻河中克用使李嗣昭張漢瑜援之汴兵走葛從周取承天軍氏叔琮取遼州樂平進壁

榆次克用使周德威逐出之李嗣昭以步騎三萬下太行略河內拔懷州進攻河陽汴人闕寶救之嗣昭退保懷天復元年全忠取晉絳逼河中王珂告急使相望汴人扼空道晉兵不得前進虜珂妻克用女不能救全忠遂有河中克用朝貢道亦梗全忠知克用迫不振乃大舉攻太原分遣銳將氏叔琮等率魏博兗鄆邢洛義武晉絳兵環入之晉城邑多下會大雨汴兵糧乏士瘡痍遂解克用雖內憤悒憚全忠疆難與爭乃厚致幣馬謝復請脩好全忠遂取同華屯渭上帝如鳳翔李茂貞韓全誨請召克用入衛克用間道遣使者奔問并詒書全忠勸還汴全忠不答克用率兵趨平陽攻吉上堡破汴軍於晉州李嗣昭周德威下慈隰進屯河中汴將朱友靈以兵十萬壁其南全忠自屯晉州晉人聞全忠至皆失色時有虹貫德威營氏叔琮薄壘疾鬪晉兵大敗仗械輜儲皆盡友靈長驅略汾慈隰州皆下遂圍太原攻西門德威嗣昭循山挈餘衆得歸克用大恐身荷版築率士拒守陰與嗣昭德威謀奔雲州李存信曰不如依北蕃國昌妻劉語克用曰聞王欲委城入蕃審乎計誰出曰存信等爲此劉曰彼牧羊奴安辦遠計王常笑王行瑜失城走而死若何傲之且王頃居達艱危不免必一朝去此禍不旋踵渠能及北虜哉克用悟乃止居數日散士復集嗣昭夜擾友靈營汴人驚引去德威追之抵白壁關復收慈隰汾三州三年克用攻晉州聞帝自鳳翔還京師乃去雲州都將王敬暉殺刺史劉再立以地予劉仁恭李嗣昭討之仁恭援敬暉

嗣昭壁樂安欲戰仁恭取敬暉棄城去帝東遷詔至太原克用泣謂其下曰乘輿不復西矣遣使者奔問行在俄加號協盟同力功臣李茂貞王建與邠州楊崇本遣使者來約義舉克用顧藩鎮皆附汴不可與共功惟契丹阿保機尙可用乃卑辭召之保機身到雲中與克用會約爲兄弟留十日去遣馬千匹牛羊萬計期冬大舉度河會昭宗弒而止四年王建李茂貞約克用大舉建將康晏步騎二萬與克用監軍張承業會鳳翔是時汴將王重師守長安劉知俊守同州與戰長安西建兵敗遂不振唐亡建與淮南楊渥請克用自王一方須賊平訪唐宗室立之建請悉蜀工制乘輿御物克用答曰自王非吾志也建又勸茂貞王岐茂貞孱弱亦不敢當但侈府第僭宮禁而已建渥乃自王是歲克用有疾城門自壞明年卒贊曰沙陀始歸命天子仰哺于邊世喋血助征討常爲邊英雄至克用逢王室亂遂有太原虜性惇固少它腸自負材果欲經營天下而不克也兵雖勝然數敗地雖得輒復失故熟視帝劫遷縮頸羞汗偷景待儂不亦鄙乎賴其子儂銳抑而復振是時提兵託勤王者五族然卒亡朱氏爲唐滌恥者沙陀也使克用稍知古今能如齊桓晉文唐遽亡乎哉

唐書卷二百十八

唐書卷二百十九

宋 端 明 殿 學 士 宋 祁 撰

列傳第一百四十四

北狄

契丹本東胡種其先爲匈奴所破保鮮卑山魏青龍中部酋比能稍桀驁爲幽州刺史王雄所殺衆遂微逃潢水之南黃龍之北至元魏自號曰契丹地直京師東北五千里而羸東距高麗西奚南營州北靺鞨室韋阻冷陁山以自固射獵居處無常其君大賀氏有勝兵四萬析八部臣于突厥以爲俟斤凡調發攻戰則諸部畢會獵則部得自行與奚不平每鬪不利輒遁保鮮卑山風俗與突厥大抵略侔死不墓以馬車載尸入山置於樹顛子孫死父母旦夕哭父母死則否亦無喪期武德中其大酋孫敖曹與靺鞨長突地稽俱遣人來朝而君長或小入寇邊後二年君長乃遣使者上名馬豐貂貞觀二年摩會來降突厥詔利可汗不欲外夷與唐合乃請以梁師都易契丹太宗曰契丹突厥不同類今已降我尙可索邪師都唐編戶盜我州部突厥輒爲助我將禽之誼不可易降者明年摩會復入朝賜鼓纛由是有常貢帝伐高麗悉發酋長與奚首領從軍帝還過營州盡召其長窟哥及老人差賜繒綵以窟哥爲左武衛將軍大會辱

紇主曲據又率衆歸卽其部爲玄州拜曲據刺史隸營州都督府未幾窟哥舉部內屬乃置松漠都督府以窟哥爲使持節十州諸軍事松漠都督封無極男賜氏李以達稽部爲峭落州紇便部爲彈汗州獨活部爲無逢州芬間部爲羽陵州突便部爲日連州芮奚部爲徒河州墜斤部爲萬丹州伏部爲匹黎赤山二州俱隸松漠府卽以辱紇主爲之刺史窟哥死與奚連叛行軍總管阿史德樞賓等執松漠都督阿卜固獻東都窟哥有二孫曰枯莫離爲左衛將軍彈汗州刺史封歸順郡王曰盡忠爲武衛大將軍松漠都督而敖曹有孫曰萬榮爲歸誠州刺史於是營州都督趙文翽驕奢數侵侮其下盡忠等皆怨望萬榮本以待于入朝知中國險易挾亂不疑卽共舉兵殺文翽盜營州反盡忠自號無上可汗以萬榮爲將縱兵四略所向輒下不重挾衆數萬妄言十萬攻崇州執討擊副使許欽寂武后怒詔鷹揚將軍曹仁師金吾大將軍張玄遇右武威大將軍李多祚司農少卿麻仁節等二十八將擊之以梁王武三思爲榆關道安撫大使納言姚璿爲之副更號萬榮曰萬斬盡忠曰盡滅諸將戰西碓石黃鷹谷王師敗績玄遇仁節皆爲虜禽進攻平州不克敗書聞后乃以右武衛大將軍建安王武攸宜爲清邊道大總管擊契丹募天下人奴有勇者官昇主直悉發以擊虜萬榮銜枚夜襲檀州清邊道副總管張九節募死亡數百薄戰萬榮敗而走山俄而盡忠死突厥默啜襲破其部萬榮收散兵復振使別將略務整何阿小入冀州殺刺史陸

寶積掠數千人武后聞盡忠死更詔夏官尙書王孝傑羽林衛將軍蘇宏暉率兵十七萬討契丹戰東碓石師敗孝傑死之萬榮席已勝遂屠幽州攸宜遣將討捕不能克乃命右金吾衛大將軍河內郡王武懿宗爲神兵道大總管右肅政臺御史大夫冀師德爲清邊道大總管右武威衛大將軍沙吒忠義爲清邊中道前軍管總兵凡二十萬擊賊萬榮銳甚鼓而南殘瀛州屬縣恣肆無所憚於是神兵道總管楊玄基率奚軍掩其尾契丹大敗獲何阿小降別將李楷固略務整收仗械如積萬榮委軍走殘隊復合與奚搏奚四面攻乃大潰萬榮左馳張九節爲三伏伺之萬榮窮與家奴輕騎走潞河東憊甚臥林下奴斬其首九節傳之東都餘衆潰攸宜凱而還后喜爲赦天下改元爲神功契丹不能立遂附突厥久視元年詔左玉鈐衛大將軍李楷固右武威衛將軍略務整討契丹破之此兩人皆虜善將嘗犯邊數窘官軍者也及是有功開元二年盡忠從父弟都督失活以默啜攻衰率部落與頡利發伊健啜來歸玄宗賜丹書鐵券後二年與奚長李大酺皆來詔復置松漠府以失活爲都督封松漠郡王授左金吾衛大將軍仍其府置靜析軍以失活爲經略大使所統八部皆擢其酋爲刺史詔將軍薛泰爲押蕃落使督軍鎮撫帝以東平王外孫楊元嗣女爲永樂公主妻失活明年失活死贈特進帝遣使弔祠以其弟中郎將娑固襲封及所領明年娑固與公主來朝宴賚有加有可突于者爲靜析軍副使悍勇得衆娑固欲去之未決而突于反

攻娑固娑固奔營州都督許欽澹以州甲五百合奚君長李大酺兵共攻可突于不勝娑固大酺皆死欽澹懼徙軍入榆關可突于奉娑固從父弟鬱于爲君遣使者謝罪有詔卽拜鬱于松漠郡王而赦可突于鬱于來朝授率更令以宗室所出女慕容爲燕郡公主妻之可突于亦來朝擢左羽林衛將軍鬱于死弟吐于嗣與可突于有隙不能定其下攜公主來奔封遼陽郡王留宿衛可突于奉盡忠弟邵固統衆詔許襲王天子封禪邵固與諸蕃長皆從行在明年拜左羽林衛大將軍徙王廣化郡以宗室出女陳爲東華公主妻邵固詔官其部酋長百餘人邵固以子入侍可突于復來不爲宰相李元紘所禮鞅鞅去張說曰彼獸心者唯利是向且方持國下所附也不假以禮不來矣後三年可突于殺邵固立屈烈爲王脅奚衆共降突厥公主走平盧軍詔幽州長史知范陽節度事趙含章擊之遣中書舍人裴寬給事中薛偁大募壯士拜忠王浚河北道行軍元帥以御史大夫李朝隱京兆尹裴佖先副之帥程伯獻張文儼宋之悌李東蒙趙萬功郭英傑等八總管兵擊契丹既又以忠王兼河東道諸軍元帥王不行以禮部尚書信安郡王禕持節河北道行軍副元帥與含章出塞捕虜大破之可突于走奚衆降王以二蕃俘級告諸廟明年可突于盜邊幽州長史薛楚玉副總管郭英傑吳克勤烏知義羅守忠率萬騎及奚擊之戰都山下可突于以突厥兵來奚懼持兩端衆走險知義守忠敗英傑克勤死之殺唐兵萬人帝擢張守珪爲幽州長史

經略之守珪旣善將可突于恐陽請臣而稍趨西北倚突厥其衙官李過折與可突于內不平守珪使客王悔陰邀之以兵圍可突于過折卽夜斬可突于屈烈及支黨數十人自歸守珪使過折統其部函可突于等首傳東都拜過折北平郡王爲松漠都督可突于殘黨擊殺過折屠其家一子刺乾走安東拜左驍衛將軍二十五年守珪討契丹再破之有詔自今戰有功必告廟天寶四載契丹大會李懷秀降拜松漠都督封崇順王以宗室出女獨孤爲靜樂公主妻之是歲殺公主叛去范陽節度使安祿山討破之更封其酋楷落爲恭仁王代板渚都督祿山方幸表討契丹以向帝意發幽州雲中平盧河東兵十餘萬以奚爲鄉導大戰潢水南祿山敗死者數千自是祿山與相侵掠未嘗解至其反乃已契丹在開元天寶間使朝獻者無慮二十故事以范陽節度爲押奚契丹使自至德後藩鎮擅地務自安障戍斥候益謹不生事于邊奚契丹亦鮮入寇歲遣酋豪數十入長安朝會每引見賜與有秩其下率數百皆駐館幽州至德寶應時再朝獻大厯中十三貞元間三元和中七太和開成間凡四然天子惡其外附回鶻不復官爵渠長會昌二年回鶻破契丹酋屈戌始復內附拜雲麾將軍守右武衛將軍於是幽州節度使張仲武爲易回鶻所與舊印賜唐新印曰奉國契丹之印咸通中其王習爾之再遣使者入朝部落復習爾之死族人欽德嗣光啟時方天下盜興北疆多故乃鈔奚室韋小小部種皆役服之因入寇幽薊劉仁恭窮師踰摘

星山討之歲燬塞下草使不得留牧馬多死契丹乃乞盟獻良馬求牧地仁恭許之復敗約入寇劉守光
戍平州契丹以萬騎入守光僞與和帳飲具于野伏發禽其大將羣胡慟願納馬五千以贖不許欽德輸
重賂求之乃與盟十年不敢近邊欽德晚節政不競其八部大人法常三歲代時耶律阿保機建鼓旗爲
一部不肯代自號爲王而有國大賀氏遂亡。

奚亦東胡種爲匈奴所破保烏丸山漢曹操斬其帥蹋頓蓋其後也元魏時自號庫真奚居鮮卑故地直
京師東北四千里其地東北接契丹西突厥南白狼河北靺鞨與突厥同俗逐水草畜牧居氈廬環車爲營
其君長常以五百人持兵衛牙中餘部散山谷間無賦入以射獵爲資稼多稼已獲窖山下斷木爲四瓦
鼎爲軒雜寒水而食喜戰鬪兵有五部部一俟斤主之其國西抵大洛泊距回紇牙三千里多依土護真
水其馬善登其羊黑盛夏必徙保冷陁山山直媯州西北至隋始去庫真但曰奚武德中高開道借其兵
再寇幽州長史王誵擊破之太宗貞觀三年始來朝閏十七歲凡四朝貢帝伐高麗大會蘇支從戰有功
不數年其長可度者內附帝爲置饒樂都督府拜可度者使持節六州諸軍事饒樂都督封樓煩縣公賜
李氏以阿會部爲弱水州處和部爲都黎州與失部爲洛瓌州度稽部爲大魯州元俟折部爲渴野州各
以酋領辱紇主爲刺史隸饒樂府復置東夷都護府於營州兼統松漠饒樂地置東夷校尉顯慶間可度

者死奚遂叛五年以定襄都督阿史德樞賓左武侯將軍延陀梯真居延州都督李含珠爲冷陁道行軍
總管明年詔尙書右丞崔餘慶持節總護定襄等三都督討之奚懼乞降斬其王匹帝萬歲通天中契丹
反奚亦叛與突厥相表裏號兩蕃延和元年以左羽林衛大將軍幽州都督孫佺左驍衛將軍李楷洛左
威衛將軍周以梯帥兵十二萬爲三軍襲擊其部次冷陁前軍楷洛與奚酋李大酺戰不利佺懼歛軍詐
大酺曰我奉詔來慰撫若等而楷洛違節度輒戰非天子意方戮以徇大酺曰誠慰撫我有所賜乎佺出
軍中繒帛袍帶與之大酺謝請佺還帥舉軍得脫爭先無部伍大酺兵躡之遂大敗殺傷數萬佺以梯皆
爲虜禽送默啜害之朝廷方多故不暇討玄宗開元二年使奧蘇梅落丐降封饒樂郡王左金吾衛大將
軍饒樂都督詔宗室出女辛爲固安公主妻大酺明年身入朝成昏始復營州都督府遣右領軍將軍李
濟持節護送大酺後與契丹可突于鬪死弟魯蘇領其部襲王詔兼保塞軍經略大使牙官塞默羯謀叛
公主置酒誘殺之帝嘉其功賜主累萬會與其母相告許得罪更以盛安公主女韋爲東光公主妻之後
三年封魯蘇奉誠郡王右羽林衛將軍擢其首領無慮二百人皆位郎將久之契丹可突于反魯奚衆并
附突厥魯蘇不能制奔榆關公主奔平盧幽州長史趙含章發清夷軍討破之衆稍自歸明年信安王禕
降其酋李詩鎖高等部落五千帳以其地爲歸義州因以王詩拜左羽林軍大將軍本州都督賜帛十萬

置其部幽州之偏李詩死子延寵嗣與契丹又叛爲幽州張守珪所困延寵降復拜饒樂都督懷信王以宗室出女楊爲宜芳公主妻之延寵殺公主復叛詔立宅曾婆固爲昭信王饒樂都督以定其部安祿山節度范陽詭邊功數與盛闕盛飾俘以獻誅其君李日越料所俘驍壯戍雲南終帝世凡八入朝獻至德大曆間十二貞元四年與室韋攻振武後七年幽州殘其衆六萬德宗時兩朝獻元和元年君梅落身入朝拜檢校司空歸誠郡王以部酋索氏爲左威衛將軍檀薊州游弈兵馬使沒辱孤平州游弈兵馬使皆賜李氏然陰結回鶻室韋兵犯西城振武大抵憲宗世四朝獻太和四年復盜邊盧龍李載義破之執大將二百餘人縛其帥茹羯來獻文宗賜冠帶授右驍衛將軍後五年大首領匿會朗來朝大中元年北部諸山奚悉叛盧龍張仲武禽酋渠燒帳落二十萬取其刺史以下面耳三百羊牛七萬糶貯五百乘獻京師咸通九年其王突董蘇使大都督薩葛入朝是後契丹方疆奚不敢亢而舉部役屬虜政苛奚怨之其酋去諸引別部內附保媯州北山遂爲東西奚

室韋契丹別種東胡之北邊蓋丁零苗裔也地據黃龍北傍猗越河直京師東北七千里東黑水靺鞨西突厥南契丹北瀕海其國無君長惟大會皆號莫賀咄攝楚其部而附于突厥小或千戶大數千戶潰散川谷逐水草而處不稅歛每弋獵卽相嘯聚事畢去不相臣制故雖猛悍喜戰而卒不能爲疆國刻木爲

犁人挽以耕田獲甚福其氣候多寒夏霖雨冬霜霰其俗富人以五色珠垂領婚嫁則男先備女家三歲而後分以產與婦共載鼓舞而還夫死不再嫁每部共構大棚死者實尸其上喪期三年土少金鐵率資於高麗器有角弓楛矢人尤善射每海夏西保資勃次對二山多草木鳥獸然苦飛蚊則巢居以避酋死以子弟繼無則推豪傑立之率乘牛車遶蔭爲室度水則束薪爲桴或以皮爲舟馬皆草韉繩羈鞞所居或皮蒙室或屈木以遶蔭覆徙則載而行其畜無羊少馬有牛不用有巨豕食之韋其皮爲服若席其語言靺鞨也分部凡二十餘曰嶺西部山北部黃頭部疆部也大如者部小如者部婆高部訥北部略丹部悉處柳城東北近者三千遠六千里而羸最西有烏素固部與回紇接當俱倫泊之西南自泊而東有移塞沒部稍東有塞曷支部最疆部也居噶河之陰亦曰燕支河益東有和解部烏羅護部那禮部嶺西部直北曰納北支部北有大山山外曰大室韋瀕於室建河河出俱倫池而東河南有蒙瓦部其北落坦部水東合那河忽汗河又東貫黑水靺鞨故靺鞨跨水有南北部而東注於海猗越河東南亦與那河合其北有東室韋蓋烏丸東南鄙餘人也貞觀五年始來貢豐貂後再入朝長壽二年叛將軍李多祚擊定之景龍初復朝獻請討突厥開元天寶間凡十朝獻大曆中十一貞元四年與奚共寇振武節度使唐朝臣方郊勞天子使者驚而走軍室韋執詔使大殺掠而去明年使者來謝太和朝獻大中朝獻

來咸通時大會恒烈與奚皆遣使至京師然非顯夷後史官失傳

黑水靺鞨居肅慎地亦曰挹婁元魏時曰勿吉直京師東北六千里東瀕海西屬突厥南高麗北室韋
爲數十部會各自治其著者曰粟末部居最南抵太白山亦曰徒太山與高麗接依粟末水以居水源於
山西北注它漏河稍東北曰汨咄部又次曰安居骨部益東曰拂涅部居骨之西北曰黑水部粟末之東
曰白山部部間遠者三四百里近二百里白山本臣高麗王師取平壤其衆多入唐汨咄安居骨等皆奔
散寢微無聞焉遣人迸入渤海唯黑水完疆分十六落以南北稱蓋其居最北方者也人勁健善步戰常
能患它部俗編髮綴野豕牙插雉尾爲冠飾自別於諸部性忍悍善射獵無憂戚貴壯賤老居無室廬負
山水坎地梁木其上覆以土如丘冢然夏出隨水草冬入處以溺盪面於夷狄最濶穢死者埋之無棺槨
殺所乘馬以祭其酋曰大莫拂瞞咄世相承爲長無書契其矢石鏃長二寸蓋楷弩遺法畜多豕無牛羊
有車馬田耦以耕車則步推有粟麥土多貂鼠白兔白鷹有鹽泉氣蒸薄鹽凝樹顛武德五年渠長阿固
郎始來太宗貞觀二年乃臣附所獻有常以其地爲燕州帝伐高麗其北部反與高麗合高惠真等率衆
據安市每戰靺鞨常居前帝破安市執惠真收靺鞨兵三千餘悉坑之開元十年其酋倪屬利稽來朝玄
宗卽拜勃利州刺史於是安東都護薛泰請置黑水府以部長爲都督刺史朝廷爲置長史監之賜府都

督姓李氏名曰獻誠以雲麾將軍領黑水經略使隸幽州都督訖帝世朝獻者十五大厯世凡七貞元一
來元和中再初黑水西北又有思慕部益北行十日得郡利部東北行十日得窟說部亦號屈說稍東南
行十日得莫曳皆部又有拂涅虞婁越喜鐵利等部其地南距渤海北東際於海西抵室韋南北袤二千
里東西千里拂涅鐵利虞婁越喜時通中國而郡利屈說莫曳皆不能自通今存其朝京師者附左方
拂涅亦稱大拂涅開元天寶間八來獻鯨睛貂鼠白兔皮鐵利開元中大來正元中一來虞婁貞觀間再
來貞元一來後渤海盛靺鞨皆役屬之不復與王會矣

渤海本粟末靺鞨附高麗者姓大氏高麗滅率衆保挹婁之東牟山地直營州東二千里南北新羅以泥
河爲境東窮海西契丹築城郭以居高麗遺殘稍歸之萬歲通天中契丹盡忠殺營州都督趙麟反有舍
利乞乞仲象者與靺鞨會乞乞比羽及高麗餘種東走遼水保太白山之東北阻與婁河樹壁自固武
后封乞乞比羽爲許國公乞乞仲象爲震國公赦其罪比羽不受命后詔玉鈐衛大將軍李楷固中郎將
索仇擊斬之是時仲象已死其子祚榮引殘夷遁去楷固窮躡度天門嶺祚榮因高麗靺鞨兵拒楷固楷
固敗還於是契丹附突厥王師道絕不克討祚榮卽并比羽之衆恃荒遠乃建國自號震國王遣使交突
厥地方五千里戶十餘萬勝兵數萬頗知書契盡得扶餘沃沮弁韓朝鮮海北諸國中宗時使侍御史張

行茂招慰祚榮遣子入侍睿宗先天中遣使拜祚榮爲左驍衛大將軍渤海郡王以所統爲忽汗州領忽汗州都督自是始去靺鞨號專稱渤海玄宗開元七年祚榮死其國私諡爲高王子武藝立斥大土宇東北諸夷畏臣之私改年曰仁安帝賜典冊襲王并所領未幾黑水靺鞨使者入朝帝以其地建黑水州置長史臨總武藝召其下謀曰黑水始假道於我與唐通異時請吐屯於突厥皆先告我今請唐官不吾告是必與唐腹背攻我也乃遣弟門藝及舅任雅相發兵擊黑水門藝嘗質京師知利害謂武藝曰黑水請吏而我擊之是背唐也唐大國兵萬倍我與之產怨我且亡昔高麗盛時士三十萬抗唐爲敵可謂雄疆唐兵一臨掃地盡矣今我衆比高麗三之一王將違之不可武藝不從兵至境又以書固諫武藝怒遣從兄壹夏代將召門藝將殺之門藝懼僞路自歸詔拜左驍衛將軍武藝使使暴門藝罪惡請誅之有詔處之安西好報曰門藝窮來歸我誼不可殺已投之惡地并留使者不遣別詔鴻臚少卿李道邃源復諭旨武藝知之上書斥言陛下不當以妄示天下意必殺門藝帝怒道邃復漏言國事皆左除而陽斥門藝以報後十年武藝遣大將張文休率海賊攻登州帝馳遣門藝發幽州兵擊之使太常卿金思蘭使新羅督兵攻其南會大寒雪表丈士凍死過半無功而還武藝望其弟不已募客入東都狙刺於道門藝格之得不死河南捕刺客悉殺之武藝死其國私諡武王子欽茂立改年大興有詔嗣王及所領欽茂因是赦境

內天寶末欽茂徙上京直舊國三百里忽汗河之東訖帝世朝獻者二十九寶應元年詔以渤海爲國欽茂王之進檢校太尉大厯中二十五來以日本舞女十一獻諸朝貞元時東南徙東京欽茂死私諡文王子宏臨早死族弟元義立一歲猜虐國人殺之推宏臨子華璵爲王復還上京改年中興死諡曰成王欽茂少子嵩鄰立改年正歷有詔授右驍衛大將軍嗣王建中貞元間凡四來死諡康王子元瑜立改年永德死諡定王弟言義立改年朱雀並襲王如故事死諡僖王弟明忠立改年太始立一歲死諡簡王從父仁秀立改年建興其四世祖野勃祚榮弟也仁秀頗能討伐海北諸部開大境宇有功詔檢校司空襲王元和中凡十六朝獻長慶四寶厯凡再大和四年仁秀死諡宣王子新德蚤死孫彝震立改年咸和明年詔襲爵終文宗世來朝十二會昌凡四彝震死弟虔晃立死玄錫立咸通時三朝獻初其王數遣諸生詣京師太學習識古今制度至是遂爲海東盛國地有五京十五府六十二州以肅慎故地爲上京曰龍泉府領龍湖渤三州其南爲中京曰顯德府領盧顯鐵湯榮興六州獺狍故地爲東京曰龍原府亦曰柵城府領慶鹽穆賀四州沃沮故地爲南京曰南海府領沃睛椒三州高麗故地爲西京曰鴨綠府領神桓豐正四州曰長嶺府領瓊河二州扶餘故地爲扶餘府常屯勁兵并契丹領扶仙二州鄭誦府領鄭高二州挹婁故地爲定理府領定濬二州安邊府領安瓊二州率賓故地爲率賓府領華益建三州拂涅故地爲

東平府領伊蒙沱黑比五州鐵利故地爲鐵利府領廣汾蒲海義歸六州越喜故地爲懷遠府領達越懷
紀富美福邪芝九州安遠府領靈郡慕常四州又郢銅凍三州爲獨奏州凍州以其近凍沫江蓋所謂粟
末水也龍原東南瀕海口本道也南海新羅道也鴨渌朝貢道也長嶺營州道也扶餘契丹道也俗謂王
曰可毒夫曰聖主曰基下其命爲教王之父已老王母太妃妻貴妃長子曰副王諸子曰王子官有宣詔
省左相左平章事侍中左常侍諫議居之中臺省右相右平章事內史詔誥舍人居之政堂省大內相一
人居左右相上左右司政各二居左右平章事之下以比僕射左右允比二丞左六司忠仁義部各一卿
居司政下支司儲倉膳部部有郎中員外右六司智禮信部支司戎計水部卿郎準左以比六官中正臺
大中正一比御史大夫居司政下少正一又有殿中寺宗屬寺有大令文籍院有監令監皆有少太常司
賓大農寺寺有卿司藏司膳寺寺有令丞胄子監有監長巷伯局有常侍等官其武員有左右猛賁熊衛
熊衛南左右衛北左右衛各大將軍一將軍一大抵憲象中國制度如此以品爲秩三秩以上服紫牙笏
金魚五秩以上服緋牙笏銀魚六秩七秩淺緋衣八秩綠衣皆木笏俗所貴者曰太白山之菟南海之昆
布柵城之豉扶餘之鹿鄭頡之豕率賓之馬顯州之布沃州之綿龍州之軸位城之鐵盧城之稻湄沱湖
之鱸果有九都之李樂游之黎餘俗與高麗契丹略等幽州節度府與相聘問自營平距京師蓋八千里

而遠後朝實至否史家失傳故叛附無考焉

贊曰唐之德大矣際天所覆悉臣而屬之薄海內外無不州縣遂尊天子曰天可汗三王以來未有以過
之至荒區君長待唐璽纛乃能國一爲不賓隨輒夷縛故蠻琛夷寶踵相逮于廷極熾而衰厥禍內移天
寶之後區夏夷破王官之威北不踰河西止秦邪凌夷百年逮於亡顧不痛哉故曰治己治人惟聖人能
之

唐書卷二百十九

唐書卷二百十九考證

北狄傳鬱于來朝授率更令○沈炳震曰諸夷大會入朝無授東宮官者臣酉按舊書下文云上封從妹夫率更令慕容嘉賓女為燕郡公主以妻之而新書下文止云以宗室所出女慕容為燕郡公主妻之刪嘉賓名而以率更令移上誤矣

孫儉○佺舊書作儉

居噉河之陰○陰舊書作南

及舅任雅相○臣酉按任雅相武后時人不應夷人亦有同姓名者舊書作任雅疑得其實

唐書卷二百十九考證

唐書卷二百二十

宋 端 明 殿 學 士 宋 祁 撰

列傳第一百四十五

東夷

高麗本扶餘別種也地東跨海距新羅南亦跨海距百濟西北度遼水與營州接北靺鞨其君居平壤城亦謂長安城漢樂浪郡也去京師五千里而遼隨山屈緣為郭南涯浪水王築宮其左又有國內城漢城號別都水有大遼少遼大遼出靺鞨西南山南歷安市城少遼出遼山西亦南流有梁水出塞外西行與之合有馬訾水出靺鞨之白山色若鴨頭號鴨淥水歷國內城西與鹽難水合又西南至安市入于海而平壤在鴨淥東南以巨臚濟人因恃以為塹官凡十二級曰大對盧或曰吐掉曰鬱折主圖簿者曰太大使者曰帛衣頭大兄所謂帛衣者先人也秉國政三歲一易善職則否凡代日有不服則相攻王為閉宮守勝者聽為之曰大使者曰大兄曰上位使者曰諸兄曰小使者曰過節曰先人曰古鄒大加其州縣六十大城置倂薩一比都督餘城置處閭近支亦號道使比刺史有參佐分幹有大模達比衛將軍末客比中郎將分五部曰內部即漢桂婁部也亦號黃部曰北部即絕奴部也或號後部曰東部即順奴部也或

乾隆四年校刊

唐書卷二百一十列傳

號左部曰南部卽灌奴部也亦號前部曰西部卽消奴部也王服五采以白羅製冠革帶皆金釧大臣青羅冠次絳羅珥兩鳥羽金銀雜釧衫箭褱袴大口白韋帶黃革履庶人衣褐戴弁女子首巾幅俗喜弈投壺蹙鞠食用籩豆簋簠洗居依山谷以草茨屋惟王宮官府佛廬以瓦甍民盛冬作長坑爇火以取煖其治峭法以繩下故少犯叛者叢炬灼體乃斬之籍入其家降殺殺人及剽劫者斬盜者十倍取償殺牛馬者沒爲奴婢故道不掇遺婚娶不用幣有受者恥之服父母喪三年兄弟踰月除俗多淫祠祀靈星及日箕子可汗等神國左有大穴曰神隧每月十月王皆自祭人喜學至窮里廝家亦相矜勉衢側悉構嚴屋號扁堂子弟未婚者曹處誦經習射隋末其王高元死異母弟建武嗣武德初再遣使入朝高祖下書修好約高麗人在中國者護送中國人在高麗者赦遣還於是建武悉搜亡命歸有司且萬人後三年遣使者拜爲上柱國遼東郡王高麗王命道士以像法往爲講老子建武大悅率國人共聽之日數千人帝謂左右曰名實須相副高麗雖臣於隋而終拒煬帝何臣之爲朕務安人何必受其臣裴矩溫彥博諫曰遼東本箕子國魏晉時故封內不可不臣中國與夷狄猶太陽於列星不可以降乃止明年新羅百濟上書言建武閉道使不得朝且數侵入有詔散騎侍郎朱子奢持節諭和建武謝罪乃請與二國平太宗已禽突厥頡利建武遣使者賀井上封城圖帝詔廣州司馬長孫師臨瘞隋士戰皆毀高麗所立京觀建武懼

乃築長城千里東北首扶餘西南屬之海久之遣太子桓權入朝獻方物帝厚賜資詔使者陳大德持節答勞且觀魯大德入其國厚餉官守悉得其織曲見華人流客者爲道親戚存亡人人垂涕故所至士女夾道觀建武盛陳兵見使者大德還奏帝悅大德又言聞高昌滅其大對盧三至館有加禮焉帝曰高麗地止四郡我發卒數萬攻遼東諸城必救我以舟師自東萊颶海趨平壤固易然天下甫平不欲勞人耳有蓋蘇文者或號蓋金姓泉氏自云生水中以惑衆性忍暴父爲東部大人對盧死蓋蘇文當祠國人惡之不得立頓首謝衆請攝職有不可雖廢無悔衆哀之遂祠位殘凶不道諸大臣與建武議誅之蓋蘇文覺悉召諸部給云大閱兵列饌具請大臣臨視賓至盡殺之凡百餘人馳入宮殺建武殘其尸投諸溝更立建武弟之子藏爲王自爲莫離支專國猶唐兵部尚書中書令職云貌魁秀美鬚冠服皆飾以金佩五刀左右莫敢仰視使貴人伏諸地踐以升馬出入陳兵長呼禁切行人畏竄至投坑谷帝聞建武爲下所殺惻然遣使者持節弔祭或勸帝可遂討之帝不欲因喪伐罪乃拜藏爲遼東郡王高麗王帝曰蓋蘇文殺君攘國朕取之易耳不願勞人若何司空房玄齡曰陛下士勇而力有餘戢不用所謂止戈爲武者司徒長孫無忌曰高麗無一介告難宜賜書安慰之隱其患撫其存彼當聽命帝曰善會新羅遣使者上書言高麗百濟聯和將見討謹歸命天子帝問若何而免使者曰計窮矣惟陛下哀憐帝曰我以偏兵

率契丹鞬鞞入遼東而國可紓一歲一策也我以絳袍丹幟數千賜而國至建以陣二國見謂我師至必走二策也百濟恃海不修戎械我以舟師數萬襲之而國女君故爲鄰侮我以宗室主而國待安則自守之三策也使者計孰取使者不能對於是遣司農丞相里玄獎以璽書讓高麗且使止勿攻使未至而蓋蘇文已取新羅二城玄獎諭帝旨答曰往隋見侵新羅乘釁奪我地五百里今非盡反地兵不止玄獎曰往事烏足論邪遼東故中國郡縣天子且不取高麗焉得違詔不從玄獎還奏帝曰莫離支殺君虐用其下如搜奪怨痛溢道我出師無名哉諫議大夫褚遂良曰陛下之兵度遼而克固善萬分一不得還且再用師再用師安危不可億兵部尚書李勣曰不然曩薛延陀盜邊陛下欲追擊魏徵苦諫而止向若擊之一馬不生返復畔擾至今爲恨帝曰誠然但一慮之失而尤之後誰爲我計者新羅數請援乃下吳船四百椀輸糧詔營州都督張儉等發幽營兵及契丹奚靺鞨等出討會遼溢師還莫離支懼遣使者內金帝不納使者又言莫離支遣官五十八宿衛帝怒責使者曰而等委質高武而不仗節死義又爲逆子謀不可赦悉下之獄於是帝欲自將討之召長安耆老勞曰遼東故中國地而莫離支賊殺其主朕將自行經略之故與父老約子若孫從我行我能拊循之毋庸卹也卽厚賜布粟羣臣皆勸帝母行帝曰吾知之矣去本而就末捨高以取下釋近而之遠三者爲不祥伐高麗是也然蓋蘇文弑君又戮大臣以逞一

國之人延頸待救議者顧未亮耳於是北輪粟營州東儲粟古大人城帝幸洛陽乃以張亮爲平壤道行軍大總管常何左難當副之冉仁德劉英行張文幹龐孝泰程名振爲總管帥江吳京洛募兵凡四萬吳艘五百泛海趨平壤以李勣爲遼東道行軍大總管江夏王道宗副之張士貴張儉執失思力契苾何力阿史那彌射姜德本鞠智盛吳黑闥爲行軍總管隸之帥騎士六萬趨遼東詔曰朕所過營頓毋飭食毋豐怪水可涉者勿作橋梁行在非近州縣不得令學生耆老迎謁朕昔提戈撥亂無盈月儲猶所嚮風靡今幸家給人足祗恐勞於轉餉故驅牛羊以飼軍且朕必勝有五以我大擊彼小以我順討彼逆以我安乘彼亂以我逸敵彼勞以我悅當彼怨渠憂不克邪又發契丹奚新羅百濟諸君長兵悉會十九年二月帝自洛陽次定州謂左右曰今天下大定唯遼東未賓後嗣因士馬盛疆謀臣導以征討喪亂方始朕故自取之不遺後世憂也帝坐城門過兵人人撫慰疾病者親視之敕州縣治療士大悅長孫無忌白奏天下符魚悉從而官官止十人天下以爲輕神器帝曰士度遼十萬皆去家室朕以十人從尙慮其多公止勿言帝身屬囊房結兩籠於鞍四月勣濟遼水高麗皆嬰城守帝大鑿士帳幽州之南詔長孫無忌誓師乃引而東勣攻蓋牟城拔之得戶二萬糧十萬石以其地爲蓋州程名振攻沙卑城夜入其西城潰虜其口八千兵游鴨綠上勣遂圍遼東城帝次遼澤詔瘞隋戰士露骼高麗發新城國內城騎四萬救遼東道

宗率張君父逆戰君父却道宗以騎馳之虜兵辟易奪其梁收散卒乘高以望見高麗陣急擊破之斬首千餘級誅君父以徇帝度遼水徹杠杓堅士心營馬首山身到城下見士填塹分負之重者馬上持之羣臣震懼爭挾塊以進城有朱蒙祠祠有鎖甲鉞矛妄言前燕世天所降方圍急飾美女以婦神巫言朱蒙悅城必完勦列拋車飛大石過三百步所當輒潰虜積木爲樓結縲罔不能拒以衝車撞陣屋碎之時百濟上金鬃鎧又以玄金爲山五文鎧士被以從帝與勦會甲光炫日會南風急士縱火焚西南燔延城中屋幾盡人死于燬者萬餘衆登陴虜蒙盾以拒士舉長矛春之藺石如雨城遂潰獲勝兵萬戶四萬糧五十萬石以其地爲遼州初帝自太子所屬行在舍置一烽約下遼東舉烽是日傳燬入塞進攻白崖城城負山崖水險甚帝壁西北虜酋孫伐音陰丐降然城中不能一帝賜幟曰若降建于堞以信俄而舉幟城人皆以唐兵登矣乃降初伐音中悔帝怒約以虜口界諸將及是李勣曰士奮而先貪虜獲也今城危拔不可許降以孤士心帝曰將軍言是也然縱兵殺戮略人妻孥朕不忍將軍麾下有功者朕能以庫物賞之庶因將軍贖一城乎獲男女凡萬兵二千以其地爲巖州拜伐音爲刺史莫離支以加尸人七百戍蓋牟勣俘之請自効帝曰而家加尸乃爲我戰將盡戮矣夷一姓求一人力不可稟而縱之次安市於是高麗北部倂薩高延壽南部倂薩高惠真引兵及靺鞨衆十五萬來援帝曰彼若勒兵連安市而壁據高

山取城中粟食之縱靺鞨略吾牛馬攻之不可下此上策也拔城夜去中策也與吾爭鋒則禽矣有大對盧爲延壽計曰吾聞中國亂豪雄並奮秦王神武敵無堅戰無前遂定天下南面而帝北狄西戎罔不臣今掃地而來謀臣重將皆在其鋒不可校今莫若頓兵曠日陰遣奇兵絕其饑道不旬月糧盡欲戰不得歸則無路乃可取也延壽不從引軍距安市四十里而屯帝曰虜墮吾策中矣命左衛大將軍阿史那社爾以突厥千騎嘗之虜常以靺鞨銳兵居前社爾兵接而北延壽曰唐易與耳進一舍倚麓而陣帝詔延壽曰我以爾有疆臣賊殺其主來問罪卽交戰非我意延壽謂然按甲俟帝夜召諸將使李勣率步騎萬五千陣西嶺當賊長孫無忌牛進達精兵萬人出虜背狹谷帝以騎四千偃幟趨虜北山上令諸軍曰聞鼓聲而縱張幄朝堂曰明日日中納降虜於此是夜流星墮延壽營旦日虜視勦軍少卽戰帝望無忌軍塵上命鼓角作兵幟四合虜惶惑將分兵禦之衆已囂勦以步槩擊敗之無忌乘其後帝自山馳下虜大亂斬首二萬級延壽收餘衆負山自固無忌勦合圍之徹川梁斷歸路帝按轡觀虜營壘曰高麗傾國來一麾而破天贊我也下馬再拜謝況于天延壽等度勢窮卽舉衆降入轅門膝而行拜手請命帝曰後敢與天子戰乎惶汗不得對帝料酋長二千五百人悉官之許內徙餘衆三萬縱還之誅靺鞨三千餘人獲馬牛十萬明光鎧萬領高麗震駭后黃銀二城自拔去數百里無舍煙乃驛報太子并賜諸臣書曰朕自

將若此云何因號所幸山爲駐蹕山圖破陣狀勒石紀功拜延壽鴻臚卿惠真司農卿候騎獲胡人帝解其縛自言不食且三日命飼之賜以屬道曰歸語莫離支若須軍中進退可遣人至吾所帝每營不作壘壘謹斥候而已而士運糧雖單騎虜不敢鈔帝與勸議所攻帝曰吾聞安市地險而衆悍莫離支擊不能下因與之建安恃險絕粟多而士少若出其不意攻之不相救矣建安得則安市在吾腹中勸曰不然積糧遼東而西擊建安賊將梗我歸路不如先攻安市帝曰善遂攻之未能下延壽惠真謀曰烏骨城傳薩已羣朝攻而夕可下烏骨拔則平壤舉矣羣臣亦以張亮軍在沙城召之一昔至若取烏骨度鴨綠迫其腹心計之善者無忌曰天子行師不徼幸安市衆十萬在吾後不如先破之乃驅而南萬全勢也乃止城中見帝旌麾輒乘陴諫帝怒勸請破日男子盡誅虜聞故死戰江夏王道宗築距闕攻東南虜增陴以守勦攻其西撞車所壞隨輒串柵爲樓帝聞城中鷄羸聲曰圍久突無黔煙今鷄羸鳴必殺以饜士虜且夜出詔嚴兵丙夜虜數百人縋而下悉禽之道宗以樹枝裹土積之距闕成迫城不數丈果毅都尉傅伏愛守之自高而排其城城且頽伏愛私去所部虜兵得自頽城出據而塹斷之積火縈盾固守帝怒斬伏愛敕諸將擊之三日不克有詔班師拔遼蓋二州之人以歸兵過城下城中屏息偃旗會長登城再拜帝嘉其守賜網百匹遼東粟尙十萬斛士取不能盡帝至渤海水阻淖八十里車騎不通長孫無忌楊師道等

率萬人斬樵築道聯車爲梁帝負薪馬上助役十月兵畢度雪甚詔屬煖以待濟始行士十萬馬萬匹遺遺物故裁千餘馬死十八船師七萬物故亦數百詔集戰骸葬柳城祭以太牢帝臨哭從臣皆流涕帝總飛騎入臨渝關皇太子迎道左初帝與太子別御褐袍曰俟見爾乃更袍歷二時弗易至穿穴羣臣請更服帝曰士皆敝衣吾可新服邪及是太子進潔衣乃御遼降口萬四千當沒爲奴婢前集幽州將分賞士帝以父子夫婦離析詔有司以布帛贖之原爲民列拜謹舞三日不息延壽既降以憂死獨惠真至長安明年春藏遣使者上方物且謝罪獻二妹口帝敕還之謂使者曰色者人所重然愍其去親戚以傷乃心我不取也初師還帝以弓服賜蓋蘇文受之不道使者謝於是下詔削棄朝貢又明年三月詔左武衛大將軍牛進達爲青丘道行軍大總管右武衛將軍李海岸副之自萊州度海李勣爲遼東道行軍大總管右武衛將軍孫貳朗右屯衛大將軍鄭仁泰副之率營州都督兵繇新城道以進次南蘇木底虜兵戰不勝焚其郭七月進達等取石城進攻積利城斬級數千乃皆還藏遣子莫離支高任武來朝因謝罪二十二年詔右武衛大將軍薛萬徹爲青丘道行軍大總管右衛將軍裴行方副之自海道入部將古神感與虜戰曷山虜潰虜乘暝襲我舟伏兵破之萬徹度鴨綠次泊灼城拒四十里而舍虜懼皆棄邑居去大會所夫孫拒戰萬徹擊斬之遂圍城破其援兵三萬乃還帝與長孫無忌計曰高麗困吾師之入戶亡耗田

歲不收蓋蘇文築城增障下肌臥死溝壑不勝敵矣明年以三十萬衆公爲大總管一舉可滅也乃詔劍南大治船蜀人願輸財江南計直作舟舟取縑千二百巴蜀大驢叩眉雅三州獠皆反發隴西峽內兵二萬擊定之始帝決取虜故詔陝州刺史孫伏伽萊州刺史李道裕儲糧械於三山浦烏胡島越州都督治大艦備舫以待會帝崩乃皆罷藏遣使者奉慰永徽五年藏以靺鞨兵攻契丹戰新城大風矢皆還激爲契丹所乘大敗契丹火野復戰人死相藉積尸而冢之遣使者告捷高宗爲露布于朝六年新羅訴高麗靺鞨奪三十六城惟天子哀救有詔營州都督程名振左衛中郎將蘇定方率師討之至新城敗高麗兵火外郛及墟落引還顯慶三年復遣名振率薛仁貴攻之未能克後二年天子已平百濟乃以左驍衛大將軍契苾何力右武衛大將軍蘇定方左驍衛將軍劉伯英率諸將出浪江遼東平壤道討之龍朔元年大募兵拜置諸將天子欲自行蔚州刺史李君球建言高麗小醜何至傾中國事之有如高麗旣滅必發兵以守少發則威不振多發人不安是天下疲於轉戍臣謂征之未如勿征滅之未如勿滅亦會武后苦邀帝乃止八月定方破虜兵於浪江奪馬邑山遂圍平壤明年龐孝泰以嶺南兵壁蛇水蓋蘇文攻之舉軍沒定方解而歸乾封元年藏遣子男福從天子封泰山還而蓋蘇文死子男生代爲莫離支與弟男建男產相怨男生據國內城遣子獻誠入朝求救蓋蘇文弟淨土亦請割地降乃詔契苾何力爲遼東道安

撫大使左金吾衛將軍龐同善營州都督高偏爲行軍總管左武衛將軍薛仁貴左監門將軍李謹行殿而行九月同善破高麗兵男生率師來會詔拜同善特進遼東大都督兼平壤道安撫大使封玄菟郡公又以李勣爲遼東道行軍大總管兼安撫大使與契苾何力龐同善并力詔獨孤卿雲由鴨綠道郭待封積利道劉仁願畢列道金待問海道並爲行軍總管受勣節度轉燕趙食廩遼東明年正月勣引道次新城合諸將謀曰新城賊西鄙不先圖餘城未易下遂壁西南山臨城城人縛戍酋出降勣進拔城十有六郭待封以舟師濟海趨平壤三年二月勣率仁貴拔扶餘城它城三十皆納款同善保守新城男建遣兵襲之仁貴救偏戰金山不勝高麗鼓而進銳甚仁貴橫擊大破之斬首五萬級拔南蘇木底蒼岩三城引兵略地與勣會侍御史賈言忠計事還帝問軍中云何對曰必克昔先帝問罪所以不得志者虜未有豐也諺云軍無媒中道回今男生兄弟鬩狼爲我鄉導虜之情僞我盡知之將忠士力臣故曰必克且高麗秘記曰不及九百年當有八十大將滅之高氏自漢有國今九百年勣年八十矣虜仍荐飢人相掠賣地震裂狼狐入城蚘穴於門人心危駭是行不再舉矣男建以兵五萬襲扶餘勣破之薩賀水上斬首五千級俘口三萬器械牛馬稱之進拔大行城劉仁願與勣會後期召還當誅赦流姚州契苾何力會勣軍于鴨綠拔辱夷城悉師圍平壤九月藏遣男產率首領百人樹素幡降且請入朝勣以禮見而男建猶固

守出戰數北大將浮屠信誠遣諜約內應五日闔啟兵譟而入火其門鬱燄四興男建窘急自刺不殊執藏男建等收凡五部百七十六城戶六十九萬詔勸便道獻俘昭陵凱而還十二月帝坐含元殿引見勸等數俘于廷以藏素脅制赦爲司平太常伯男產司宰少卿投男建黔州百濟王扶餘隆嶺外以獻誠爲司衛卿信誠爲銀青光祿大夫男生右衛大將軍何力行左衛大將軍勣兼太子太師仁貴威衛大將軍剖其地爲都督府者九州四十二縣百復置安東都護府擢曾豪有功者授都督刺史令與華官參治仁貴爲都護總兵鎮之是歲郊祭以高麗平謝成于天總章二年徙高麗民三萬於江淮山南大長鉗半岑率衆反立藏外孫安舜爲王詔高侃東州道李謹行燕山道並爲行軍總管討之遣司平太常伯楊昉綏納亡餘舜殺鉗半岑走新羅侃徙都護府治遼東州破叛兵於安市又敗之泉山俘新羅援兵二千李謹行破之于發盧河再戰俘馘萬計於是平壤瘡殘不能軍相率奔新羅凡四年乃平始謹行留妻劉守伐奴城虜攻之劉擐甲勒兵守賊引去帝嘉之封燕郡夫人儀鳳二年授藏遼東都督封朝鮮郡王還遼東以安餘民先編僑內州者皆原遣徙安東都護府於新城藏與靺鞨謀反未及發召還放邛州廝其人于河南隴右弱寔者留安東藏以永淳初死贈衛尉卿葬頤利墓左樹碑其阡舊城往往入新羅遣人散靺鞨靺鞨由是高氏君長皆絕垂拱中以藏孫寶元爲朝鮮郡王聖曆初進左鷹揚衛大將軍更封忠誠

國王使統安東舊部不行明年以藏子德武爲安東都督後稍自國至元和末遣使者獻樂工云百濟扶餘別種也直京師東六千里而羸瀆海之陽西界越州南倭北高麗皆踰海乃至其東新羅也王居東西二城官有內臣佐平者宣納號令內頭佐平主幣聚內法佐平主禮衛士佐平典衛兵朝廷佐平主獄兵官佐平掌外兵有六萬方統十郡大姓有八沙氏燕氏勿氏解氏貞氏國民木氏苜氏其法反逆者誅籍其家殺人者輸奴婢三贖罪吏受賕及盜三倍償錮終身俗與高麗同有三島生黃漆六月刺取瀋色若金玉服大襲紫袍青錦袴素皮帶烏革履烏羅冠飾以金繡羣臣絳衣飾冠以銀繡禁民衣絳紫有文籍紀時月如華人武德四年王扶餘璋始遣使獻果下馬自是數朝貢高祖冊爲帶方郡王百濟王後五年獻明光鏡且訟高麗梗貢道太宗貞觀初詔使者平其怨又與新羅世仇數相侵帝賜璽書曰新羅朕藩臣王之鄰國聞數相侵暴朕已詔高麗新羅申和王宜忘前怨識朕本懷璋奉表謝然兵亦不止再遣使朝上鐵甲雕斧帝優勞之賜帛段三千十五年璋死使者素服奉表曰君外臣百濟王扶餘璋卒帝爲舉哀立武門贈光祿大夫贈賜甚厚命祠部郎中鄭文表冊其子義慈爲柱國紹王義慈事親孝與兄弟友時號海東曾子明年與高麗連和伐新羅取四十餘城發兵守之又謀取黨項城絕貢道新羅告急帝遣司農丞相里玄獎齋詔書諭解開帝新討高麗乃間取新羅七城久之又奪十餘城因不朝貢高

宗立乃遣使者來帝詔義慈曰海東三國開基舊矣地固犬牙比者隙爭侵校無寧歲新羅高城重鎮皆爲王并歸窮于朕丐王歸地昔齊桓一諸侯尙存亡國况朕萬方主可不卹其危邪王所兼城宜還之新羅所俘亦昇還王不如詔者任王決戰朕將發契丹諸國度遼深入王可思之無後悔永徽六年新羅訴百濟高麗靺鞨取北境三十城顯慶五年乃詔左衛大將軍蘇定方爲神丘道行軍大總管率左衛將軍劉伯英右武衛將軍馮士貴左驍衛將軍龐孝泰發新羅兵討之自城山濟海百濟守熊津口定方縱擊虜大敗王師乘潮帆以進趨真都城一舍止虜悉衆拒復破之斬首萬餘級拔其城義慈挾太子隆走北鄙定方圍之次子泰自立爲王率衆固守義慈孫文思曰王太子固在叔乃自王若唐兵解去如我父子何與左右繼而出民皆從之泰不能止定方令士超堞立幟秦開門降定方執義慈隆及小王孝演會長五十八人送京師平其國五部三十七郡二百城戶七十六萬乃析置熊津馬韓東明金漣德安五都督府擢會渠長治之命郎將劉仁願守百濟城左衛郎將王文度爲熊津都督九月定方以所俘見詔釋不誅義慈病死贈衛尉卿許舊臣赴臨詔葬孫皓陳叔寶墓左授隆司稼卿文度濟海卒以劉仁軌代之璋從子福信嘗將兵乃與浮屠道琛據周留城反迎故王子扶餘豐於倭立爲王西部皆應引兵圍仁願龍朔元年仁軌發新羅兵往救道琛立一壁熊津江仁軌與新羅兵夾擊之奔入壁爭梁墮溺者萬人新羅

兵還道琛保任孝城自稱領軍將軍福信稱霜岑將軍告仁軌曰聞唐與新羅約破百濟無老孺皆殺之昇以國我與受死不若戰仁軌遣使齎書答說道琛倨甚館使者于外嫚報曰使人官小我國大將禮不當見徒遣之仁軌以衆少乃休軍養威請合新羅圖之福信俄殺道琛并其兵豐不能制二年七月仁願等破之熊津拔支羅城夜薄真峴比明入之斬首八百級新羅餉道乃開仁願請濟師詔右威衛將軍孫仁師爲熊津道行軍總管發齊兵七千往福信願國謀殺豐豐率親信斬福信與高麗倭連和仁願已得齊兵士氣振乃與新羅王金法敏率步騎而遣劉仁軌率舟師自熊津江偕進趨周留城豐衆屯白江口四遇皆克火四百艘豐走不知所在僞王子扶餘忠勝忠志率殘衆及倭人請命諸城皆復仁願勒軍還留仁軌代守帝以扶餘隆爲熊津都督俾歸國平新羅故憾招還遣人麟德二年與新羅王會熊津城刑白馬以盟仁軌爲盟辭曰往百濟先王罔顧逆順不敦鄰不睦親與高麗倭共侵削新羅破邑屠城天子憐百姓無辜命行人修好先王負險恃遐侮慢弗恭皇赫斯怒是伐是夷但興亡繼絕王者通制故立前太子隆爲熊津都督守其祭祀附杖新羅長爲與國結好除怨恭天子命永爲藩服右威衛將軍魯城縣公仁願親臨厥盟有貳其德興兵動衆明神監之百殃是降子孫不育社稷無守世世毋敢犯乃作金書鐵契藏新羅廟中仁願等還隆畏衆攜散亦歸京師儀鳳時進帶方郡王遣歸藩是時新羅疆隆不敢入

舊國寄治高麗死武后又以其孫敬襲王而其地已爲新羅渤海靺鞨所分百濟遂絕

新羅弁韓苗裔也居漢樂浪地橫千里縱二千里東距長人東南日本西百濟南瀕海北高麗而王居金城環八里所衛兵三千人謂城爲侵牟羅邑在內曰喙評外曰邑勒有喙評六邑勒五十二朝服尙白好祠山神八月望日大宴資官吏射其建官以親屬爲上其族名第一骨第二骨以自別兄弟女姑姨從姊妹皆聘爲妻王族爲第一骨妻亦其族生子皆爲第一骨不娶第二骨女雖娶常爲妾媵官有宰相侍中司農卿太府令凡十有七等第二骨得爲之事必與衆議號和白一人異則罷宰相家不絕祿奴僮三千人甲兵牛馬猪稱之畜牧海中山須食乃射息穀米於人償不滿庸爲奴婢王姓金貴人姓朴民無氏有名食用柳栝若銅瓦元日相慶是日拜日月神男子褐袴婦長襦見人必跪則以手据地爲恭不粉黛率美髮以線首以珠綵飾之男子剪髮鬻以黑巾市皆婦女買販冬則作竈堂中夏以食置冰上畜無羊少驢羸多馬馬雖高大不善行長人者人類長三丈鋸牙鉤爪黑毛覆身不火食噬禽獸或搏人以食得婦人以治衣服其國連山數十里有峽固以鐵闔號關門新羅常屯弩士數千守之初百濟伐高麗來請救悉兵往破之自是相攻不置後獲百濟王殺之滋結怨武德四年王眞平遣使者入朝高祖詔通直散騎侍郎庾文素持節答賚後三年拜柱國封樂浪郡王新羅王眞觀五年獻女樂二太宗曰比林邑獻鸚

鷓言思鄉巧還況於人乎使者歸之是歲眞平死無子立女善德爲王大臣乙祭柄國詔贈眞平左光祿大夫贈物段二百九年遣使者册善德襲父封國人號聖祖皇姑十七年爲高麗百濟所攻使者來乞師亦會帝親伐高麗詔率兵以披虜勢善德使兵五萬入高麗南鄙拔水口城以聞二十一年善德死贈光祿大夫而妹眞德襲王明年遣子文王及弟伊贊子春秋來朝拜文王左武衛將軍春秋特進因請改章服從中國制內出珍服賜之又詣國學觀釋奠講論帝賜所製晉書辭歸敕三品以上郊饒高宗永徽元年攻百濟破之遣春秋子法敏入朝眞德織錦爲頌以獻曰巨唐開洪業巍巍皇猷昌止戈成大定興文繼百王統天崇雨施治物體含章深仁諧日月撫運邁時康幡旆旣赫赫鉦鼓何鏗鏗外夷違命者翦覆被天殃溘風凝幽顯遐邇競呈祥四時和玉燭七耀巡萬方維嶽降宰輔維帝任忠良三五成一德昭我唐家光帝美其意擢法敏大府卿五年眞德死帝爲舉哀贈開府儀同三司賜綵段三百命太常丞張文收持節弔祭以春秋襲王明年百濟高麗靺鞨共伐取其三十城使者來請救帝命蘇定方討之以春秋爲岫夷道行軍總管遂平百濟龍朔元年死法敏襲王以其國爲鷄林州大都督府授法敏都督咸亨五年納高麗叛衆略百濟地守之帝怒詔削官爵以其弟右驍衛員外大將軍臨海郡公仁問爲新羅王自京師歸國詔劉仁軌爲鷄林道大總管衛尉卿李弼右領軍大將軍謹行副之發兵窮討上元二年二

月仁軌破其衆於七重城以靺鞨兵浮海略南境斬獲甚衆詔李謹行爲安東鎮撫大使屯買肖城三戰虜皆北法敏遣使入朝謝罪貢篚相望仁問乃還辭王詔復法敏官爵然多取百濟地遂抵高麗南境矣置尙良康熊全武漢朔溟九州州有都督統郡十或二十郡有大守縣有小守開耀元年死子政明襲王遣使者朝丐唐禮及它文辭武后賜吉凶禮并文辭五十篇死子理洪襲王死弟興光襲王玄宗開元中數入朝獻果下馬朝霞紬魚牙紬海豹皮又獻二女帝曰女皆王姑姊妹違本俗別所親朕不忍留厚賜還之又遣子弟入太學學經術帝問賜興光瑞文錦五色羅紫繡紋袍金銀精器興光亦上異狗馬黃金美鬣諸物初渤海靺鞨掠登州興光擊走之帝進興光靈海軍大使使攻靺鞨二十五年死帝尤悼之贈太子太保命邢璣以鴻臚少卿弔祭子承慶襲王詔璣曰新羅號君子國知詩書以卿惇儒故持節往宜演經誼使知大國之盛又以國人善棋詔率府兵曹參軍楊季鷹爲副國高弈皆出其下於是厚遣使者金寶俄冊其妻朴爲妃承慶死詔使者臨弔以其弟憲英嗣王帝在蜀遣使浙江至成都朝正月大厯初憲英死子乾運立甫邕遣金隱居入朝待命詔倉部郎中歸崇敬往弔監察御史陸瑒顧愔爲副冊授之并母金爲太妃會其宰相爭權相攻國大亂三歲乃定於是歲朝獻建中四年死無子國人共立宰相金貞相嗣貞元元年遣戶部郎中蓋瓊持節命之是年死立貞相從父弟敬信襲王十四年死無子立鱗孫

俊遂明年遣司封郎中韋丹持冊未至俊豈死丹還子重興立永貞元年詔兵部郎中元季方冊命後三年使者金力奇來謝且言往歲冊故主俊豈爲王母申太妃妻淑妃而俊豈不幸冊今留省中臣請授以歸又爲其宰相金彥昇金仲恭王之弟蘇金漆明丐門戟詔皆可凡再朝貢七年死彥昇立來告喪命職方員外郎崔廷弔且命新王以妻貞爲妃長慶寶厯間再遣使者來朝留宿衛彥昇死子景徽立太和五年以太子左諭德源寂冊弔如儀開成初遣子義琮謝願留衛見聽明年遣之五年鴻臚寺籍質子及學生歲滿者一百五人皆還之有張保臯鄭年者皆善鬪戰工用槍年復能沒海履其地五十里不啗角其勇健保臯不及也年以兄呼保臯保臯以齒年以藝常不相下自其國皆來爲武靈軍小將後保臯歸新羅謁其王曰遍中國以新羅人爲奴婢願得鎮清海使賊不得掠人西去清海海路之要也王與保臯萬人守之自太和後海上無鬻新羅人者保臯既貴於其國年飢寒客澠水一日謂戍主馮元規曰我欲東歸乞食於張保臯元規曰若與保臯所負何如奈何取死其手年曰飢寒死不如兵死快況死故鄉邪年遂去至謁保臯飲之極歡飲未卒聞大臣殺其王國亂無主保臯分兵五千人與年持年泣曰非子不能平禍難年至其國誅反者立王以報王遂召保臯爲相以年代守清海會昌後朝貢不復至贊曰杜牧稱安思順爲朔方節度時郭汾陽李臨淮俱爲牙門都將二人不相能雖同盤飲食常睚相視

不交一言及汾陽代思順臨淮欲亡去計未決旬日詔臨淮分汾陽半兵東出趙魏臨淮入請曰一死固甘乞免妻子汾陽趨下持手上堂曰今國亂主遷非公不能東伐豈懷私忿時邪及別執手泣涕相勉以忠義訖平劇盜實二公之力知其心不叛知其心難也忿必見短知其材益難也此保阜與汾陽之賢等耳年投保阜必曰彼貴我賤我降下之不宜以舊忿殺我保阜果不殺人之常情也臨淮請死於汾陽亦人之常情也保阜任年事出於己年且寒飢易爲感動汾陽臨淮平生允立臨淮之命出於天子權於保阜汾陽爲優此乃聖賢遲疑成敗之際也世稱周邵爲百代之師周公擁孺子而邵公疑之以周公之聖邵公之賢少事文王老佐武王能平天下周公之心邵公且不知之苟有仁義之心不資以明雖邵公尙爾況其下哉嗟乎不以怨毒相憚而先國家之憂晉有祈奚唐有汾陽保阜孰請夷無人哉

日本古倭奴也去京師萬四千里直新羅東南在海中島而居東西五月行南北三月行國無城郭聯木爲柵落以草茨屋左右小島五十餘皆自名國而臣附之置本率一人檢察諸部其俗多女少男有文字尙浮屠法其官十有二等其王姓阿每氏自言初主號天御中主至彥瀲凡三十二世皆以尊爲號居筑紫城彥瀲子神武立更以天皇爲號徙治大和州次曰綏靖次安寧次懿德次孝昭次天安次孝靈次孝元次開化次崇神次垂仁次景行次成務次仲哀仲哀死以開化曾孫女神功爲主次應神次仁德次履

中次反正次允恭次安康次雄略次清寧次顯宗次仁賢次武烈次繼體次安閑次宣化次欽明欽明之十一年直梁承聖元年年次海達次用明亦曰目多利思比孤直隋開皇末始與中國通次崇峻崇峻死欽明之孫女稚古立次舒明次皇極其俗椎髻無冠帶跣以行幅巾蔽後貴者冒錦婦人衣純色裙長腰襦結髮于後至煬帝賜其民錦綵冠飾以金玉文布爲衣左右佩銀釵長八寸以多少明貴賤太宗貞觀五年遣使者入朝帝矜其遠詔有司毋拘歲貢遣新州刺史高仁表往諭與王爭禮不平不肯宣天子命而還久之更附新羅使者上書永徽初其王孝德卽位改元曰白雉獻虎魄大如斗碼瑙若五升器時新羅爲高麗百濟所暴高宗賜璽書令出兵援新羅未幾孝德死其子天豐財立死子天智立明年使者與蝦蟇人皆朝蝦蟇亦居海島中其使者鬚長四尺許珥箭於首令人載瓠立數十步射無不中天智死子天武立死子總持立咸亨元年遣使賀平高麗後稍習夏音惡倭名更號日本使者自言國近日所出以爲名或云日本乃小國爲倭所并故冒其號使者不以情故疑焉又妄夸其國都方數千里南西盡海東北限大山山外卽毛人云長安元年其王文武立改元曰大寶遣朝臣真人粟田貢方物朝臣真人者猶唐尙書也冠進德冠頂有華籙四披紫袍帛帶真人好學能屬文進止有容武后宴之麟德殿授司膳卿還之文武死子阿用立死子聖武立改元曰白龜開元初粟田復朝請從諸儒授經詔四門助教趙玄默卽

鴻臚寺爲師獻大幅布爲贊悉賞物賀書以歸其副朝臣仲滿慕華不肯去易姓名曰朝衡歷左補闕儀王友多所該識久乃還聖武死女孝明立改元曰天平勝寶天寶十二載朝衡復入朝上元中擢左散騎常侍安南都護新羅梗海道更繇明越州朝貢孝明死大炊立死以聖武女高野姬爲王死白壁立建中元年使者真人興能獻百物真人蓋因官而氏者也興能善書其紙似繭而澤人莫識貞元末其王曰桓武遣使者朝其學子橘免勢浮屠空海願留肄業歷二十餘年使者高階真人來請免勢等俱還詔可次諸樂立次峨嵋次浮和次仁明仁明直開成四年復入貢次文德次清和次陽成次光孝直光啟元年其東海嶼中又有邪古波邪多尼三小王北距新羅西北百濟西南直越州有絲絮珍怪云

流鬼去京師萬五千里直黑水靺鞨東北少海之北三面皆阻海其北莫知所窮人依嶼散居多沮澤有魚鹽之利地蚤寒多霜雪以木廣六寸長七尺系其上以踐冰逐走獸土多狗以皮爲裘俗被髮粟似莠而小無蔬蔬它穀勝兵萬人南與莫曳靺鞨鄰東南航海十五日行乃至貞觀十四年其王遣子可也余莫貂皮更三譯來朝授騎都尉遣之龍朔初有僧羅者其王儒李都羅遣使入朝國居新羅武州南島上俗朴陋衣犬豕皮夏居草屋冬窟室地生五穀耕不知用牛以鐵齒杷土初附百濟麟德中酋長來朝從帝至太山後附新羅開元十一年又有達末婁達姑二部首領朝貢達末婁自言北扶餘之裔高麗滅其

國遣人度那河因居之或曰他漏河東北流入黑水達姑室韋種也在那河陰凍末河之東西接黃頭室韋東北距達末婁云

唐書卷二百二十

唐書卷二百二十考證

高麗傳男生率師來會詔拜同善特進遼東大都督兼平壤道安撫大使封元菟郡公○舊書作授男生特進遼東大都督兼平壤道安撫大使封元菟郡公

唐書卷二百二十考證

唐書卷二百二十一上

宋 端 明 殿 學 士 宋 祁 撰

列傳第一百四十六上

西域

泥婆羅直吐蕃之西樂陵川土多赤銅犛牛俗翦髮連眉穿耳植以簞若角緩至肩者為姣好無七筋攪而食其器皆用銅其居版屋畫壁俗不知牛耕故少田作習商賈一幅布蔽身日數盥浴重博戲通推步麻術祀天神鑄石為象日浴之烹羊以祭鑄銅為錢面文人形背牛馬形其君服珠頗黎車渠珊瑚虎魄垂纓耳金鉤玉璫佩寶伏突御師子大牀燎香布花於堂而大臣坐地不藉左右持兵數百列侍宮中有七重樓覆銅瓦楹極皆大排雜寶四隅置銅槽下有金龍口激水仰注槽中初王那陵提婆之父為其叔所殺提婆出奔吐蕃納之遂臣吐蕃貞觀中遣使者李義表到天竺道其國提婆大喜延使者同觀阿耨耨婆捺池池廣數十丈水常溢沸共傳旱潦未始耗溢或抵以物則生煙釜其上少選可熟二十一年遣使入獻波稜酢菜渾提葱永微時其王尸利那連陀羅又遣使入貢

党項漢西羌別種魏晉後微甚周滅宕昌鄧至而党項始疆其地古析支也東距松州西葉護南春桑迷

乾隆四年校刊

唐書卷二百二十一上列傳

桑等羌北吐谷渾處山谷崎嶇大抵三千里以姓別爲部一姓又分爲小部落大者萬騎小數千不能相統故有細封氏費聽氏往利氏頗超氏野辭氏房當氏米禽氏拓拔氏而拓拔最疆土著有棟宇織葦尾羊毛覆屋歲一易俗尙武無法令賦役人壽多過百歲然好爲盜更相剽斂尤重復讎未得所欲者蓬首垢顛跣足草食殺已乃復男女衣裘褐被氈畜犛牛馬驢羊以食不耕稼地寒五月草生八月霜降無文字候草木記歲三年一相聚殺牛羊祭天取麥他國以釀酒妻其庶母伯叔母兄嫂子弟婦惟不娶同姓老而死子孫不哭少死則曰天枉乃悲貞觀三年南會州都督鄭元璿鑄諭其酋細封步賴舉部降太宗詔慰撫步賴因入朝宴錫特異以其地爲軌州卽授刺史步賴請率兵討吐谷渾其後諸酋長悉內屬以其地爲囿奉嚴遠四州卽首領拜刺史有拓拔赤辭者初臣吐谷渾慕容伏允待之厚與結婚諸羌已歸獨不至李靖擊吐谷渾赤辭屯狼道峽抗王師廓州刺史久且洛生欲諭降之辭曰渾主以腹心待我不知其佗若速去且汗吾刀洛生怒引輕騎破之肅遠山斬首數百級虜雜畜六千帝因其勝又令約降赤辭從子思頭潛納款其下拓拔細豆亦降赤辭知宗族攜沮稍欲自歸岷州都督劉師立復誘之卽與思頭俱內屬以其地爲懿嗟麟可三十二州以松州爲都督府擢赤辭西戎州都督賜氏李貢職遂不絕於是自河首積石山而東皆爲中國地後吐蕃寔盛拓拔畏偁請內徙始詔慶州置靜邊等州處之地乃

入吐蕃其處者皆爲吐蕃役屬更號弭藥又有黑黨項者居赤水西其長號敦善王慕容伏允之走也依之及吐谷渾款附敦善王亦納貢居雪山者曰破丑氏又有白蘭羌吐蕃謂之丁零左屬黨項右與多彌接勝兵萬人勇戰鬪善作兵俗與黨項同武德六年使者入朝明年以其地爲維恭二州貞觀六年與契苾數十萬內屬永徽時特浪生羌卜樓大首領凍就率衆來屬以其地爲劍州龍朔後白蘭春桑及白狗羌爲吐蕃所臣藉其兵爲前驅白狗與東會州接勝兵纔千人在西北者天授中內附戶凡二十萬以其地爲朝吳浮歸十州散居靈夏間至德末爲吐蕃所誘使爲鄉導鈔邊俄悔悟更來朝願助靈州饋輓乾元間中國數亂因寇邠寧二州肅宗詔郭子儀都統朔方邠寧鄜坊節度事以鄜州刺史杜冕邠州刺史桑如珪分二隊出討子儀至黨項潰去上元元年在涇隴部落十萬衆詣鳳翔節度使崔光遠降二年與渾奴刺連和寇寶鷄殺吏民掠財珍焚大散關入鳳州殺刺史蕭懷節度使李鼎追擊走之明年又攻梁州刺史李勉走進寇奉天大掠華原同官去詔臧希讓代勉爲刺史於是歸順乾封歸義順化和寧和義保善寧定羅雲朝鳳凡十州部落詣希讓獻款丐節印詔可僕固懷恩之叛誘黨項渾奴刺入寇衆數萬掠鳳翔整屋大會鄜廷郝德入同州刺史韋勝走節度使周智光破之澄城閏月又入同州焚官私室虜壁馬蘭山郭子儀遣兵襲之退保三堡子儀遣慕容休明諭降廷德子儀以黨項吐谷渾部落散處鹽慶

等州其地與吐蕃濱近易相脅即表徙靜邊州都督夏州樂容等六府党項于銀州之北夏州之東靈朔州吐谷渾住夏西以離沮之召靜邊州大首領左羽林大將軍拓拔朝光等五刺史入朝厚賜資使還綏其部先是慶州有破丑氏族三野利氏族五把利氏族一與吐蕃姻援贊普悉王之因是擾邊凡十年子儀表工部尚書路嗣恭為朔方留後將作少監梁進用為押党項部落使置行慶州且言党項陰結吐蕃為變可遣使者招慰其反謀因令進用為慶州刺史嚴邏以絕吐蕃往來道代宗然之又表置靜邊芳池相與五州都督長史永平旭定清靈靈保忠順靜塞萬言等七州都督府於是破丑野利把利三部及思樂州刺史拓拔乞梅等皆入朝宜定州刺史折磨布落芳池州野利部並徙綏延州大麻末野利禿羅都與吐蕃叛招餘族不應子儀擊之斬禿羅都而野利景庭野利剛以其部數千人入附雞子川大州部落曰野利越詩野利龍兒野利厥律兒黃野海野宰等居慶州者號東山部夏州者號平夏部永泰後稍徙石州後為永安將阿史那思暎賦索無極遂亡走河西元和時復置宥州護党項至大和中寢疆數寇掠然器械鈍苦畏唐兵精則以善馬購鎧善羊買弓矢鄜坊道軍糧使李石表禁商人不得以旗幟甲冑五兵入部落告者舉罪人財畀之至開成末種落愈繁富賈人齎繒寶鬻羊馬藩鎮乘其利疆市之或不

得直部人怨相率為亂至靈鹽道不通武宗以侍御史為使招定分三印以邪靈延屬崔彥曾鹽夏長屬李鄆靈武麟勝屬鄆賀皆緋衣銀魚而功不克宣宗大中四年內掠邪靈詔鳳翔李業河東李拭合節度兵討之宰相白敏中為都統帝出近苑或以竹一箇植舍外見纒尺許遠且百步帝屬二矢曰党羌窮寇仍歲暴吾鄙今我約射竹中則彼當自亡不中我且索天下兵翦之終不以此賊遺子孫左右注目帝一發竹分矢徹諸外左右呼萬歲不閱月羌果破殄餘種竄南山始天寶末平夏部有戰功擢容州刺史天柱軍使其裔孫拓拔思恭咸通末竊據宥州稱刺史黃巢入長安與鄜州李孝昌壇而坎牲誓討賊僖宗賢之以為左武衛將軍權知夏綏銀節度事次王橋為巢所敗更與鄭畋四節度盟屯渭橋中和二年詔為京城西面都統檢校司空中書門下平章事俄進四面都統權知京兆尹賊平兼太子太傅封夏國公賜姓李嗣襄王愠之亂詔思恭討賊兵不出卒以弟思諫代為定難節度使思孝為保大節度鄜坊丹翟等州觀察使並檢校司徒同中書門下平章事王行瑜反以思孝為北面招討使思諫東北面招討使思孝亦因亂取鄜州遂為節度使累兼侍中以老薦弟思敬為保大軍兵馬留後俄為節度使東女亦曰蘇伐刺擊瞿咀羅羌別種也西海亦有女自王故稱東別之東與吐蕃党項茂州接西屬三波訶北距于闐東南屬雅州羅女蠻白狼夷東西行盡九日南北行盡二十日有八十城以女為君居康延川巖險四緣有弱水南流縵草為船戶四萬勝兵萬人王號賓就官曰高霸黎猶言宰相也官在外者率

男子爲之凡號令女官自內傳男官受而行王侍女數百五日一聽政王死國人以金錢數萬納王族求
淑女二立之次爲小王王死因以爲嗣或姑死婦繼無算奪所居皆重屋王九層國人六層王服青毛綾
裙被青衾袖委於地冬羔裘飾以文錦爲小鬟髻耳垂瓏足曳鞵鞵鞵履也俗輕男子女貴者咸有侍
男被髮以青塗面惟務戰與耕而已子從母姓地寒宜麥畜羊馬出黃金風俗大抵與天竺同以十一月
爲正巫者以十月詣山中布糟麥呪呼羣鳥俄有鳥來如雞狀剖視之有穀者豐歲否則有災名曰鳥卜
居喪三年不易服不櫛沐貴人死剝藏其皮內骨甕中糝金屑瘞之王之葬殉死至數十人武德時王湯
滂氏始遣使入貢高祖厚報爲突厥所掠不得通貞觀中使復至太宗墾制慰撫顯慶初遣使高霸黎文
與王子三盧來朝授右監門中郎將其王欽臂使大臣來請官號武后冊拜欽臂左玉鈐衛員外將軍賜
瑞錦服天授開元間王及子再來朝詔與宰相宴曲江封王曳夫爲歸昌王左金吾衛大將軍後乃以男
子爲王貞元九年其王湯立悉與白狗君及哥隣君董臥庭進租君鄧吉知南水君薛尙悉囊弱水君董
避和悉董君湯息贊清遠君蘇唐磨咄霸君董藐逢皆詣劍南草阜求內附其種散居西山弱水雖自謂
主蓋小小部落耳自失河隴悉爲吐蕃羈屬部數千戶輒置令歲督絲絮至是猶上天寶所賜詔書阜處
其衆於維霸等州賜牛糧治生業立悉等入朝差賜官祿於是松州羌二萬口相踵入附立悉等官刺史

皆得世襲然陰附吐蕃故謂兩面羌

高昌直京師西四千里而羸其橫八百里縱五百里凡二十一城王都交河城漢車師前王廷也田地城
戊己校尉所治也勝兵萬人士沃麥禾皆再熟有草名白疊擷花可織爲布俗辨髻垂後其王彌伯雅陪
時嘗妻以威屬宇文氏女號華容公主武德初伯雅死子文泰立遣使來告高祖命使者臨弔後五年獻
狗高六寸長尺能曳馬銜燭云出拂菻中國始有拂菻狗太宗卽位獻玄狐裘帝賜妻宇文華鑿一具字
文亦上玉盤几諸國施爲輒以聞貞觀四年文泰遂來朝禮賜厚甚宇文求預宗籍有詔賜氏李更封常
樂公主久之文泰與西突厥通凡西域朝貢道其國咸見獲掠伊吾嘗臣西突厥至是內屬文泰與葉護
共擊之帝下詔讓其反覆召大臣冠軍阿史那矩計事文泰不遣使長史鞠雍來謝罪初大業末華民多
奔突厥及頡利敗有逃入高昌者有詔護送文泰苛留之又與西突厥乙毗設破焉耆三城虜其人焉耆
王訴諸朝帝遣虞部郎中李道裕問狀復遣使謝帝引責曰而主數年朝貢不入無藩臣禮擅置官儼效
百僚今歲首萬君長悉來而主不至日我使人往文泰猥曰鷹飛于天雉竄于蒿猫遊于堂鼠安于穴各
得其所豈不快邪西域使者入貢而主悉拘梗之又諭薛延陀曰旣自爲可汗爲唐天子等何事拜謁其
使明年我當發兵虜而國歸謂而君善自圖時薛延陀可汗請爲軍向導故民部尙書唐儉至延陀堅約

帝復下璽書示文泰禍福促使入朝文泰遂稱疾不至乃拜侯君集爲交河道大總管左屯衛大將軍薛萬均薩孤吳仁副之契苾何力爲蔥山道副大總管武衛將軍牛進達爲行軍總管率突厥契苾騎數萬討之羣臣諫以行萬里兵難得志且天界絕域雖得之不可守帝不聽文泰謂左右曰曩吾入朝見秦隴北城邑蕭條非有隋比今伐我兵多則糧餉不逮若下三萬我能制之度磧疲鈍以逸待勞臥收其敵耳十四年聞王師至磧口悸駭無它計發病死子智盛立君集奄攻田地城契苾何力以前軍鏖戰是夜星墜城中明日拔其城虜七千餘人中郎將辛獠兒以勁騎夜逼其都智盛以書遣君集曰得罪於天子者先王也咎深譴積震墜厥命智盛嗣位未幾公其見赦君集曰能悔禍者當面縛軍門智盛不答軍進填隍引衝車飛石如雨城中大震智盛令大將鞠士義居守身與綰曹鞠德俊謁軍門請改事天子君集諭使降辭未屈薛萬均勃然起曰當先取城小兒何與語磨而進智盛流汗伏地曰唯公命乃降君集分兵略定凡三州五縣二十二城戶八千口三萬馬四千先是其國人謠曰高昌兵如霜雪唐家兵如日月日月照霜雪幾何自殄滅文泰捕謠所發不能得也捷書聞天子大悅宴羣臣班賜策功赦高昌所部披其地皆州縣之號西昌州特進魏徵諫曰陛下卽位高昌最先朝謁俄以掠商胡過貢獻故王誅加焉文泰死罪止矣撫其人立其子伐罪弔民道也今利其土屯守常千人屯士數年一易辦裝資離親戚不十年

隴右且空陛下終不得高昌圭粒思助中國費所謂散有用事無用不納改西昌州曰西州更置安西都護府歲調千兵譴罪人以戍黃門侍郎褚遂良諫曰古者先函夏後夷狄務廣德化不爭荒遐今高昌誅滅威動四夷然自王師始征河西供役飛米轉芻十室九匱五年未可復今又歲遣屯戍行李萬里去者資裝使自營辦資稜傾機杼道路死亡尙不計罪人始於犯法終於惰業無益於行所遣復有亡命官司捕逮株蔓相率有如張掖酒泉塵飛烽舉豈得高昌一乘一卒及事乎必發隴右河西耳然則河西爲我腹心高昌佗人手足也何必耗中華事無用昔陛下平頡利吐谷渾皆爲立君蓋罪而誅之伏而立之百蠻所以畏威慕德也今宜擇高昌可立者立之召首領悉還本土長爲藩翰中國不擾書聞不省初文泰以金厚餉西突厥欲設約有急爲表裏使葉護屯可汗浮圖城及君集至懼不敢發遂來降以其地爲廷州焉耆請歸高昌所奪五城留兵以守君集勒石紀功凱而旋俘智盛君臣獻觀德殿至飲至禮酺三日徙高昌豪傑於中國智盛拜左武衛將軍金城郡公弟智湛右武衛中郎將天山郡公鞠氏傳國九世百三十四年而亡智湛麟德中以左驍衛大將軍爲西州刺史卒贈涼州都督有子昭好學有鬻異書者毋顧笥中金歎曰何愛此不使子有異聞乎盡持易之昭歷司膳卿頗能辭章弟崇裕有武藝永徽中爲右武衛翊府中郎將封交河郡王邑至三千戶終鎮軍大將軍武后爲舉哀襚以美錦賻賜甚厚封

爵絕

吐谷渾居甘松山之陽洮水之西南抵白蘭地數千里有城郭不居也隨水草帳室肉糧其官有長史司馬將軍王公僕射尚書郎中蓋慕諸華爲之俗識文字其王椎髻黑冒妻錦袍織裙金釵飾首男子服長襦繒帽或冠髻羅婦人辨髮縈後綴珠貝婚禮富家厚納聘貧者竊妻去父死妻庶母兄死妻嫂喪有服葬已卽除民無常稅用不足乃斂富室商人足而止凡殺人若盜馬者死它罪贖以物地多寒宜麥菽粟蕪菁出小馬犛牛銅鐵丹砂有青海者周八九百里中有山須冰合游牝馬其上明年生駒號龍種嘗得波斯馬牧于海生驄駒日步千里故世稱青海驄西北有流沙數百里夏有熱風傷行人風將發老駝引項鳴埋鼻沙中人候之以氈蔽鼻口乃無恙隋時其王慕容伏允號步薩鉢嘗寇邊煬帝遣鐵勒敗之壁西平復命觀王雄破其衆伏允以數十騎入泥嶺亡去仙頭王率男女十餘萬降置郡縣鎮戍以長子順爲質因王之統餘衆俄追還伏允客党項隋亂因得復故地高祖受命順自江都還長安于時李軌據涼州帝乃約伏允和令擊軌自効當護送順伏允喜引兵與軌戰庫門交綏止卽遣使請順帝遣之順至號爲太靈王太宗時伏允遣使者入朝未還卽寇鄯州帝遣使者讓且召伏允以疾爲解而爲子求婚順帝意帝召子親迎亦稱疾有詔止婚遣中郎將康處真臨諭又掠岷州都督李道彥擊走之執名王二斬級

七百連歲遣名王朝俄寇涼州鄯州刺史李玄運表吐谷渾牧馬青海輕兵掩之可盡致乃命左驍衛大將軍段志玄左驍衛將軍梁洛仁率契苾項兵擊之未至三十里志玄等不欲戰壁而留虜知之驅牧馬走副將李君羨率精騎尾襲懸水上得牛羊二萬還是時伏允不能事其相天柱王用事拘天子行人鴻臚丞趙德楷帝遣使曉敕十反無悛言貞觀九年詔李靖爲西海道行軍大總管侯君集積石道在城王道宗鄯善道李道彥赤水道李大亮且末道高旣生鹽澤道並爲行軍總管突厥契苾兵擊之党項內屬羌及洮州羌皆殺刺史歸伏允夏四月道宗破伏允于庫山俘斬四百伏允謀入磧疲唐兵燒野草故靖馬多飢道宗曰栢海近河源古未有至者伏允西走未知其在方馬羶糧乏難遠入不如按軍鄯州須馬壯更圖之君集曰不然嚮者段志玄至鄯州吐谷渾兵輒傳城彼國方完逆衆用命也今虜大敗斥候無在君臣相失我乘其困可以得志栢海雖遠可鼓而致也靖曰善分二軍靖與大亮薛萬均以一軍趨北出其右君集道宗以一軍趣南出其左靖將薩孤吳仁以輕騎戰曼都山斬名王獲五百級諸將戰牛心堆赤水源獲虜將南昌王慕容孝備收雜畜數萬君集道宗登漢哭山戰烏海獲名王梁屈蘆靖破天柱部落於赤海收雜畜二十萬大亮俘名王二十雜畜五萬次且末之西伏允走圖倫磧將託于圖萬均督銳騎追亡數百里又破之士乏水刺馬飲血君集道宗行空荒二千里盛夏降霜乏水草士糜冰

馬秣雪關月次星宿川達相海上望積石山覽觀河源執失思力馳破虜車重兩軍會于大非山破邏真
咎順之質隋爲金紫光祿大夫伏允立其弟爲太子順歸常鞅鞅自以失位欲以功自結天子乃斬天柱
王舉國降伏允懼引千餘騎遁嶺中衆稍亡從者纔百騎窮無聊卽自經死國人立順爲君稱臣內附詔
封西平郡王號越胡呂烏甘足可汗帝恐未能定其國遣李大亮率精兵鎮援順久質華國人不破卒爲
下所殺立其子燕王諾曷鉢諾曷鉢幼大臣爭權帝詔侯君集就經紀之始請殞厥及子弟入侍詔封諾
曷鉢河源郡王號烏地也拔勒豆可汗遣睢陽郡王道明持節冊命賜鼓纛諾曷鉢身入謝遂請婚獻馬
牛羊萬比年入朝乃以宗室女爲弘化公主妻之詔道明及右武衛將軍慕容寶持節送公主其相宣王
跋扈謀作亂欲襲公主劫諾曷鉢奔吐蕃諾曷鉢知之引輕騎走鄯城威信王以兵迎之果毅都尉席君
買率兵與威信王共討斬其兄弟三人國大擾帝又詔民部尙書唐儉中書舍人馬周持節撫慰高宗立
以主故拜駙馬都尉又獻名馬帝問馬種性使者曰國之最良者帝曰良馬人所愛詔還其馬公主表請
入朝遣右驍衛將軍鮮于匡濟迎之十一月及諾曷鉢至京師帝又以宗室女金城縣主妻其長子蘇度
摸末拜左領軍衛大將軍久之摸末死主與次子左武衛大將軍梁漢王闡盧摸末來請婚帝以宗室女
金明縣主妻之旣而與吐蕃相攻上書相曲直並來請師天子兩不許吐谷渾大臣素知貴奔吐蕃言其

情吐蕃出兵掃虛破其衆黃河上諾曷鉢不支與公主引數千帳走涼州帝遣左武衛大將軍蘇定方爲
安集大使平兩國怨吐蕃遂有其地諾曷鉢請內徙乾封初更封青海國王帝欲徙其部於涼州之南山
羣臣議難之咸亨元年乃以右威衛大將軍薛仁貴爲邏娑道行軍大總管左衛員外大將軍阿史那道
真左衛將軍郭待封副之總兵五萬討吐蕃且納諾曷鉢於故廷王師敗於大非川舉吐谷渾地皆陷諾
曷鉢與親近數千帳纔免三年乃徙治疊水南諾曷鉢以吐蕃盛勢不抗而鄯州地狹又徙靈州帝爲置
安樂州卽拜刺史欲其安且樂云諾曷鉢死子忠立忠死子宣超立聖歷三年拜左豹韜員外大將軍襲
故可汗號餘部詣涼甘肅瓜沙等州降宰相張錫與右武衛大將軍唐休璟議徙其人於秦隴豐靈間令
不得畔去涼州都督郭元振以爲吐谷渾近秦隴則與監牧雜處置豐靈又邈默噉假在諸華亦不遽移
其性也前日王孝傑自河源軍徙耽爾乙尙貴置靈州旣其叛乃入牧坊掠羣馬羸夷州縣是則遷中土
無益之成驗往素和貴叛去於我無損但失吐谷渾數十部豈與尙貴比邪今降虜非疆服皆突矢刃棄
吐蕃而來宜當循其情爲之制也當甘肅瓜沙降者卽其所置之因所投而居情易安磔數州則勢自分
順其情分其勢不擾於人可謂善奪戎心者也歲遣鎮邊使者與宣超兄弟撫護之無令相侵奪生業固
矣有如叛去無損中國詔可宣超死子曠暗立曠暗死子兆立吐蕃復取安樂州而殘部徙朔方河東語

謬爲退渾貞元十四年以朔方節度副使左金吾衛大將軍慕容復爲長樂都督青海國王襲可汗號復死停襲吐谷渾自晉永嘉時有國至龍朔三年吐蕃取其地凡三百五十年及此封嗣絕矣

焉耆國直京師西七千里而贏橫六百里縱四百里東高昌西龜茲南尉犁北烏孫遼渠溉田土宜黍蒲芻有魚鹽利俗祝髮氈衣戶四千勝兵二千常役屬西突厥俗尚娛遊二月牝出野祀四月望日游林七月七日祀生祖十月望日王始出游至歲盡止太宗貞觀六年其王龍突騎支始遣使來朝自隋亂磧路閉故西域朝貢皆道高昌突騎支請開大磧道以便行人帝許之高昌怒大掠其邊西突厥莫賀設與咄陸努失畢作難來奔咄陸努失畢復攻之遣使言狀并貢名馬唃利失可汗立素善焉耆故倚爲援十二年處月處蜜與高昌攻陷其五城掠千五百人焚廬舍侯君集討高昌遣使與相聞突騎支喜引兵佐唐高昌破歸向所俘及城遣使者入謝西突厥臣屈利啜爲弟娶突騎支女遂相約爲輔車勢不朝貢安西都護郭孝恪請討之會王弟頡鼻栗婆準葉護等三人來降帝卽命孝恪爲西州道總管率兵出銀山道以栗婆準等爲鄉導初焉耆所都周三十里四面大山水緣其外故恃不爲虞孝恪倍道絕水夜傳堞遲曙譟而登鼓角轟哄唐兵縱國人擾敗斬千餘級執突騎支更以栗婆準攝國事始帝語近臣曰孝恪以八月十一日詣焉耆閼一旬可至當以二十二日破之使者今至矣俄而遽人以捷布聞囚突騎支及

妻子送洛陽有詔赦罪屈利啜以兵救焉耆而孝恪還三日矣屈利啜囚栗婆準更使吐屯攝王遣使以告帝曰焉耆我所下爾乃王之邪吐屯懼不敢王焉耆立栗婆準而從兄薛婆阿那支自爲王號瞎千執栗婆準獻龜茲殺之阿史那社爾討龜茲阿那支奔之壁東境抗王師爲社爾所禽數其罪斬以徇立突騎支弟婆伽利爲王以其地爲焉耆都督府婆伽利死國人請還前王突騎支高宗許之拜左衛大將軍歸國死龍嬾突立武后長安時以其國小人寡過使客不堪其勞詔四鎮經略使禁止僉使私馬無品者肉食開元七年龍嬾突死焉吐拂延立於是十姓可汗請居碎葉安西節度使湯嘉惠表以焉耆備四鎮詔焉耆龜茲疏勒于闐征西域賈各食其征由北道者輪臺征之詔天寶常朝賀

龜茲一曰巨茲一曰屈茲東距京師七千里而贏自焉耆西南步一百里度小山經大河二又步七百里乃至橫千里縱六百里土宜麻麥秔稻蒲芻出黃金俗善歌樂旁行書貴浮圖法產子以木壓首俗斷髮齊頂惟君不剪髮姓白氏居伊邏廬城北倚阿羯田山亦曰白山常有火王以錦冒頂錦袍寶帶歲朔闕羊馬察它七日觀勝負以下歲盈耗云蔥嶺以東俗喜淫龜茲于闐置女肆征其錢高祖受禪王蘇伐勃缺遣使入朝會死子蘇伐疊立號時健莫賀俟利發貞觀四年獻馬太宗賜璽書撫慰加等後臣西突厥郭孝恪伐焉耆乃遣兵與焉耆影援自是不朝貢蘇伐疊死弟訶黎布失畢立二十一年兩遣使朝貢然

帝怒其佐焉者叛議討之是夜月食昴詔曰月陰精用刑兆也星胡分數且終乃以阿史那社爾爲崑邱道行軍大總管契苾何力副之率安西都護郭孝恪司農卿楊弘禮左武衛將軍李海岸等發鐵勒十三部兵十萬討之社爾分五軍掠其北執焉耆王阿那支龜茲大恐酋長皆棄城走社爾次磧石去王城三百里先遣伊州刺史韓威以千騎居前右騎衛將軍曹繼叔次之至多褐與王遇其將羯獵顛兵五萬合戰威僞北王見威兵少磨而進威退與繼叔合還戰大破之追奔八十里王嬰城社爾將圍之王引突騎西走城遂拔孝恪居守沙州刺史蘇海政行軍長史薛萬備以精騎窮躡六百里王計窮保撥換城社爾圍之閱月執王及羯獵顛其相那利夜逸以西突厥并國人萬餘來戰孝恪及子死之王師擾倉部郎中崔義起募兵戰城中繼叔威助擊之斬首三千級那利敗哀亡散復振還襲王師繼叔乘之斬八千級那利走或執以詣軍社爾凡破五大城男女數萬遣使者諭降小城七百餘西域震懼西突厥安西國歸軍饑焉社爾立王弟葉護王其國勒石紀功書聞帝喜見羣臣從容曰夫樂有幾朕嘗言之土城竹馬童兒樂也飭金翠羅紈婦人樂也買遷有無商賈樂也高官厚秩士大夫樂也戰無前敵將帥樂也四海寧一帝王樂也朕今樂矣遂徧觴之初孝恪之擊焉耆也龜茲有浮屠善數歎曰唐家終有西域不數年吾國亦亡社爾執訶黎布失畢那利羯獵顛獻太廟帝受俘紫微殿帝責謂羣臣皆頓首伏詔赦罪改館鴻臚

寺拜布失畢左武衛中郎將徙安西都護於其都統于闐碎葉疏勒號四鎮高宗復封訶黎布失畢爲龜茲王與那利羯獵顛還國久之王來朝那利悉其妻阿史那王不能禁左右請殺之由是更猜忌使者言狀帝并召至京師囚那利護遣王還羯獵顛拒不內遣使降賀魯王不敢進悒悒死詔左屯衛大將軍楊胄發兵禽羯獵顛窮誅部黨以其地爲龜茲都督府更立子素稽爲王授右驍衛大將軍爲都督是歲徙安西都護府於其國以故安西爲西州都督府卽拜左驍衛大將軍兼安西都護麴智湛爲都督西域平帝遣使者分行諸國風物產詔許敬宗與史官譔西域圖志上元中素稽獻銀頗羅名馬天授三年王延田跌來朝始儀鳳時吐蕃攻焉耆以西四鎮皆沒長壽元年武威道總管王孝傑破吐蕃復四鎮地置安西都護府於龜茲以兵三萬鎮守於是沙磧荒絕民供糗糧苦甚議者請棄之武后不聽都護以政績稱華狄者田揚名郭元振張孝嵩杜暹云開元七年王白莫苾死子多而立改名孝節十八年遣弟孝義來朝自龜茲贏六百里諭小沙磧有跋祿迦小國也一日亟墨卽漢姑墨國橫六百里縱三百里風俗文字與龜茲同言語少異出細氈褐西三百里度石磧至凌山葱嶺北原也水東流春夏山谷積雪西北五百里至素葉水城比國商胡雜居素葉以西數十城皆立君長役屬突厥自素葉水城至羯霜那國衣氈褐皮氈以繒縑額素葉城西四百里至千泉地贏二百里南雪山三垂平陸多泉池因名之突厥可汗

歲避暑其中羣鹿飾鈴環可狎也西羸百里至咀邏私城亦比國商胡雜居有小城三百本華人爲突厥所掠羣保此尙華語西南羸二百里至白水城原隰膏腴南五十里有筱赤建國廣千里地沃宜稼多蒲陶又二百里卽石國

疏勒一曰佉沙環五千里距京師九千里而羸多沙磧少壤土俗尙詭詐生子亦夾頭取孺其人文身碧瞳王姓裴氏自號阿摩支居迦師城突厥以女妻之勝兵二千人俗祠祆神貞觀九年遣使者獻名馬又四年與朱俱波甘棠貢方物太宗謂房玄齡等曰曩之一天下克勝四夷惟秦皇漢武耳朕提三尺劍定四海遠夷率服不減二君者然彼末路不自保公等宜相輔弼毋進諛言置朕於危亡也儀鳳時吐蕃破其國開元十六年始遣大理正喬夢松攝鴻臚少卿冊其君安定爲疏勒王天寶十二載首領裴國良來朝授折衝都尉賜紫袍金魚朱俱波亦名朱俱槃漢子合國也并有西夜蒲犁依耐得若四種地直于闐西千里葱嶺北三百里西距喝盤陀北九百里屬疏勒南三千里女國也勝兵二千人尙浮屠法文字同婆羅門甘棠在海南崑崙人也喝盤陀或曰漢陀曰渴館檀亦謂渴羅陀由疏勒西南入劍末谷不忍嶺大百里其國也距瓜州四五百里直朱俱波西南距懸度山北抵疏勒西護密西北判汗國也治葱嶺中都城負徒多河勝兵千人其王本疏勒人世相承爲之西南卽頭痛山也葱嶺俗號極疑山環其國人

勁悍貌言如于闐其法殺人剽劫者死餘得贖賦必輸服飾王坐人牀後魏太延中始通中國貞觀九年遣使者來朝開元中破平其國置葱嶺守捉安西極邊戍也

于闐或曰瞿薩旦那亦曰渙那曰屈丹北狄曰于遁諸胡曰豁旦距京師九千七百里瓜州羸四千里并有漢戎盧杆彌渠勒皮山五國故地其居曰西山城勝兵四千人有玉河國人夜視月光盛處必得美玉王居繪室俗機巧言迂大喜事祆神浮屠法然貌恭謹相見皆跪以木爲筆玉爲印凡得問遺書戴于首乃發之自漢武帝以來中國詔書符節其王傳以相授人喜歌舞工紡績西有沙磧鼠大如蝟色類金出入羣鼠爲從初無桑蠶丐隣國不肯出其王卽求婚許之將迎乃告曰國無帛可持蠶自爲衣女聞置蠶帽絮中關守不敢驗自是始有蠶女刻石約無殺蠶蛾飛盡得治繭王姓尉遲氏名屋密本臣突厥貞觀六年遣使者入獻後三年遣子入侍阿史那社爾之平龜茲也其王伏闕信大懼使子獻橐它三百長史薛萬備謂社爾曰今破龜茲西域皆震恐願假輕騎羈于闐王獻京師社爾許之至于闐陳唐威靈勸入見天子伏闕信乃隨使者來會高宗立授右衛大將軍子葉護玷爲右驍衛將軍賜袍帶布帛六千段第一區留數月遣之請以子弟宿衛上元初身率子弟會領七十人來朝擊吐蕃有功帝以其地爲毗沙都督府析十州授伏闕雄都督武后立其子璿開元時獻馬駝豹璿死復立尉遲伏師戰爲王死伏闕達

嗣并冊其妻執失爲妃死尉遲珪嗣妻馬爲妃珪死子勝立至德初以兵赴難因請留宿衛乾元三年以其弟左監門衛率葉護曜爲太僕員外卿同四鎮節度副使權知本國事勝自有傳于闐東三百里有建德力河七里有精絕國河之東有汗彌居達德力城亦曰拘彌城卽靈彌故城皆小國也初德宗卽位遣內給事朱如玉之安西求玉於于闐得圭一珂佩五枕一帶勝三百簪四十奩三十釧十杵三懸瑟百斤并它寶等及還詐言假道回紇爲所奪久之事泄得所市流死恩州

天竺國漢身毒國也或曰摩伽陀曰婆羅門去京師九千六百里都護治所二千八百里居蔥嶺南幅圓三萬里分東西南北中五天竺皆城邑數百南天竺瀕海出師子豹狸象它犀象火齊琅玕石蜜黑鹽北天竺距雪山圍抱如壁南有谷通爲國門東天竺際海與扶南林邑接西天竺與罽賓波斯接中天竺在四天竺之會都城曰茶縛和羅城濱迦毗黎河有別城數百皆置長別國數十置王曰舍衛曰迦沒路開戶皆東嚮曰迦尸或曰波羅奈亦曰波羅那斯其畜有稍割牛黑色角細長四尺許十日一割不然因且死人飲其血或曰壽五百歲牛壽如之中天竺王姓乞利唎氏亦曰利利世有其國不算殺土溽熱稻歲四熟禾之長者沒窠它以貝齒爲貨有金剛旃檀鬱金與大秦扶南交趾相貿易人富樂無簿籍耕王地者乃輸稅以舐足摩踵爲致禮家有奇樂倡伎王大臣皆服錦罽爲螺髻於頂餘髮翦使卷男子穿耳垂

璫或懸金耳綬者爲上類徒跣衣重白婦人頂飾金銀珠纓絡死者燔骸取灰建窰塔或委野中及河餌鳥獸魚鼈無喪紀謀反者幽殺之小罪贖錢不孝者斷手足劓耳鼻徙于邊有文字善步麻學悉曇章亥曰梵天法書貝多葉以記事尚浮圖法不殺生飲酒國中處處指曰佛故跡也信盟誓傳禁呪能致龍起雲雨晴煬帝時遣裴矩通西域諸國獨天竺拂菻不至爲恨武德中國大亂王尸羅逸多勒兵戰無前象不弛鞍士不釋甲因討四天竺皆北面臣之會唐浮屠玄奘至其國尸羅逸多召見曰而國有聖人出作秦王破陣樂試爲我言其爲人玄奘粗言太宗神武平禍亂四夷賓服狀王喜曰我當東面朝之貞觀十五年自稱摩伽陀王遣使者上書帝命雲騎尉梁懷璫持節尉撫尸羅逸多驚問國人自古亦有摩訶震旦使者至吾國乎皆曰無有戎言中國爲摩訶震旦乃出迎膜拜受詔書戴之頂復遣使者隨入朝詔衛尉丞李義表報之大臣郊迎傾都邑縱觀道上焚香尸羅逸多率羣臣東面受詔書復獻火珠鬱金菩提樹二十二年遣右衛率府長史王玄策使其國以蔣師仁爲副未至尸羅逸多死國人亂其臣那伏帝阿羅那順自立發兵拒玄策時從騎纔數十戰不勝皆沒遂剽諸國貢物玄策挺身奔吐蕃西鄙檄召隣國兵吐蕃以兵千人來泥婆羅以七千騎來玄策部分進戰茶縛和羅城三日破之斬首三千級溺水死萬人阿羅那順委國走合散兵復陣師仁禽之俘斬千計餘衆奉王妻息阻乾陀衛江師仁擊之大潰獲其

妃王子虜男女萬二千人雜畜三萬降城邑五百八十所東天竺王尸鳩摩送牛馬三萬餽軍及弓刀寶
纒絡迦沒路國獻異物拜上地圖請老子象玄策執阿羅那順獻闕下有司告宗廟帝曰夫人耳目玩聲
色口鼻耽臭味此敗德之原也婆羅門不劫吾使者寧至俘虜邪擢玄策朝散大夫得方士那邏邇婆
寐自言壽二百歲有不死術帝改館使治丹命兵部尚書崔敦禮護視使者馳天下采怪藥異石又使者
走婆羅門諸國所謂呷茶法水者出石曰中有石象人守之水有七種色或熱或冷能銷草木金鐵人手
入輒爛以索它鬪轉注瓠中有樹名咀賴羅葉如梨生窮山崖腹前有巨虺守穴不可到欲取葉者以
方鏃矢射枝則落爲羣鳥銜去則又射乃得之其詭譎類如此後術不驗有詔聽還不能去死長安高宗
時盧伽逸多者東天竺烏茶人亦以術進拜懷化大將軍乾封二年五天竺皆來朝開元時中天竺遣使
者三至南天竺一獻五色能言鳥乞師討大食吐蕃丐名其軍玄宗詔賜懷德軍使者曰蕃夷惟以袍帶
爲寵帝以錦袍金革帶魚袋并七事賜之北天竺一來朝

摩揭它一曰摩伽陀本中天竺屬國環五十里土沃宜稼穡有異稻巨粒號供大人米王居拘闍揭羅布
羅城或曰俱蘇摩補羅曰波吒釐子城北瀕碗伽河貞觀二十一年始遣使者自通于天子獻波羅樹樹
類白楊太宗遣使取熬糖法卽詔揚州上諸蔗柞瀋如其劑色味愈西域遠甚高宗又遣王玄策至其國

摩訶菩提祠立碑焉後德宗自製鐘銘賜那爛陀祠又有那揭者亦屬國也貞觀二十年遣使者貢方物
烏茶者一曰烏伏那亦曰烏莫直天竺南地廣五千里東距勃律六百里西屬賓四百里山谷相屬產金
鐵蒲殖鬱金稻歲熟人柔詐善禁架術國無殺刑抵死者放之窮山罪有疑飲以藥視洩清濁而決輕重
有五城王居術魯藥利城一曰嘗揭釐城東北有達麗羅川卽烏莫舊地貞觀十六年其王達摩因隨訶
斯遣使者獻龍腦香璽書優答大食與烏莫東鄙接開元中數誘之其王與骨咄俱位二王不肯臣玄宗
命使者冊爲王章求拔國或曰章揭拔本西羌種居悉立西南四山中後徙山西與東天竺接衣服略相
類因附之地袤八九百里勝兵二千人無城郭好鈔暴商旅患之貞觀二十年其王羅利多菩伽因悉立
國遣使者入朝玄策之討中天竺發兵來赴有功由是職貢不絕悉立當吐蕃西南戶五萬城邑多旁澗
谿男子繒束頭衣氍褐婦人辮髮短裙昏姻不以財聘其穀宜秔稻麥豆死者葬于野不封樹喪制爲黑
衣滿年而除刑有刑則常羈屬吐蕃

罽賓隋漕國也居葱嶺南距京師萬二千里而羸南距舍衛二千里王居脩鮮城常役屬大月氏地暑濕
人乘象俗治浮屠法武德二年遣使貢寶帶金鎖水精醜頗黎狀若酸棗貞觀中獻名馬太宗語大臣曰
朕始卽位或言天子欲耀兵振伏四夷惟魏徵勸我脩文德安中夏中夏安遠人伏矣今天下大安四夷

君長皆來獻此微力也遣果毅何處羅拔等厚齎賜其國并撫尉天竺處羅拔至罽賓王東向稽首再拜
仍遣人導護使者至天竺十六年獻褥特鼠喙尖尾赤能食蛇螫者嗅且尿瘡卽愈國人共傳王始祖曰
馨孽至曷顯支傳十二世顯慶三年以其地爲脩鮮都督府神龍初拜其王修鮮等十一州諸軍事修鮮
都督開元七年遣使獻天文及秘方奇藥天子冊其王爲葛邏達支特勒後烏散特勒灑年老請以子拂
秣罽婆嗣聽之天寶四年冊其子勃匄準爲罽賓及烏菴國王乾元初使者朝貢

唐書卷二百二十一上

唐書卷二百二十一上考證

吐谷渾傳拔勒豆○豆舊書作足因字形相似而誤也

罽賓傳神龍初○舊書作龍朔沈炳震曰新書誤

以大首領篤婆鉢提爲王死子泥涅師師立死國人立突昏爲王開元初貢鎖子鎧水精栝礪瓶駝鳥卵及越諾侏儒胡旋女子其王烏勒伽與大食亟戰不勝來乞師天子不許久之請封其子咄曷爲曹王默啜爲米王詔許烏勒伽死遣使立咄曷封欽化王以其母可敦爲郡夫人安者一曰布豁又曰捕喝元魏謂怛蜜者東北至東安西南至畢皆百里所西瀕烏濬河治阿濫謚城卽康居小君長屬王故地大城四十小堡千餘募勇健者爲柘羯柘羯者猶中國言戰士也武德時遣使入朝貞觀初獻方物太宗厚慰其使曰西突厥已降商旅可行矣諸胡大悅其王訶陵迦又獻名馬自言一姓相承二十二世云是歲東安國亦入獻言子姓相承十世云東安或曰小國曰喝汗在那密水之陽東距河二百里許西南至大安四百里治喝汗城亦曰篋斤大城二十小堡百顯慶時以阿濫爲安息州卽以其王昭武殺爲刺史篋斤爲木鹿州以其王昭武閉息爲刺史開元十四年其王篤薩波提遣弟阿悉爛達拂耽發黎來朝納馬豹後八年獻波斯驪二拂菻繡毼毼一鬱金香石蜜等其妻可孰獻柘辟大毼毼二繡毼毼一丐賜袍帶鎧仗及可敦鞋襪裝澤東曹或曰率都沙那蘇對沙那劫布咀那蘇都識匿凡四名居波悉山之陰漢貳師城地也東北距俱戰提二百里北至石西至康東北靈遠皆四百里許南至吐火羅五百里有野叉城城有巨窟殿以關鑰歲再祭人向窟立中卽煙出先觸者死武德中與康同遣使入朝其使曰本國以臣爲

健兒聞秦王神武欲隸麾下高祖大悅西曹者隋時曹也南接史及波覽治瑟底痕城東北越于底城有得悉神祠國人事之有金具器款其左曰漢時天子所賜武德中入朝天寶元年王哥邏僕羅遣使者獻方物詔封懷德王卽上言祖考以來奉天可汗願同唐人受調發佐天子征討十一載東曹王設阿忽與安王請擊黑衣大食玄宗尉之不聽中曹者居西曹東康之北王治迦底真城其人長大工戰鬪石或曰柘支曰柘折曰赭時漢大宛北鄙也去京師九千里東北距西突厥西北波臘南二百里所抵俱戰提西南五百里康也圓千餘里右涯素葉河王姓石治柘折城故康居小王窟匿城地西南有藥殺水入中國謂之眞珠河亦曰質河東南有大山生瑟瑟俗善戰多良馬隋大業初西突厥殺其王以特勒匭職統其國武德貞觀間數獻方物顯慶三年以瞰羯城爲大宛都督府授其王瞰土屯攝舍提于屈昭穆都督開元初封其君莫賀咄吐屯有功爲石國王二十八年又册順義王明年王伊捺吐屯屈勒上言今突厥已屬天可汗惟大食爲諸國患請討之天子不許天寶初封王子那俱車鼻施爲懷化王賜鐵券久之安西節度使高仙芝効其無藩臣禮請討之王約降仙芝遣使者護送至開遠門俘以獻斬闕下於是西域皆怨王子走大食乞兵攻怛邏斯城敗仙芝軍自是臣大食寶應時遣使朝貢有碎葉者出安西南地千里所得勃達嶺南抵中國北突騎施南鄙也西南至葱嶺贏二千里水南流者經中國入于海北流者經胡

入于海北三日行度海春夏常雨雪繇勃達嶺北行贏千里得細葉川東曰熱海地寒不凍西有碎葉城天寶七載北庭節度使王正見伐安西毀之川長千里有異姓突厥兵數萬耕者皆擐甲相掠爲奴婢西屬怛邏斯城石常分兵鎮之自此抵西海矣三月訖九月未嘗雨人以雪冰溉田石東南千餘里有怖悍者山四環之地膏腴多馬羊西千里距塔利瑟那東臨葉葉水水出葱嶺北原色濁西北流入大磧無水草望大山尋遺皆知所指五百餘里卽康也米或曰彌未曰弭抹賀北百里距康其君治鉢息德城永徽時爲大食所破顯慶三年以其地爲南謚州授其君昭武開拙爲刺史自是朝貢不絕開元時獻璧舞筵師子胡旋女十八年大首領末野門來朝天寶初封其君爲恭順王母可敦郡夫人何或曰屈霜你迦曰貴霜匿卽康居小王附墨城故地城左有重樓北繪中華古帝東突厥婆羅門西波斯拂菻等君王其君巨詣拜則退貞觀十五年遣使者入朝永徽時上言聞唐出師西討願輸糧于軍俄以其地爲貴霜州授其君昭武婆達地刺史遣使者鉢底失入謝火尋或曰貨利習彌曰過利居烏潛水之陽東南六百里距戍地西南與波斯接西北抵突厥曷薩乃康居小王與鞬城故地其君治急多颶遮城諸胡惟其國有車牛商賈乘以行諸國天寶十載君稍施芽遣使者朝獻黑鹽寶應時復入朝史或曰佉沙曰羯霜那居獨莫水南康居小王蘇薤城故地西百五十里距那色波北二百里屬米南四百里吐火羅也有鐵門山左

右嶠峭石色如鐵爲關以限二國以金鋼闔城有神祠每祭必千羊用兵類先禱乃行國有城五百疇大業中其君狄遮始通中國號最强盛築乞史城地方數千里貞觀十六年君沙瑟畢獻方物顯慶時以其地爲佉沙州授君昭武失阿喝刺史開元十五年君忽必多獻舞女文豹後君長數死立然首領時入朝天寶中詔改史爲來威國那色波亦曰小史蓋爲史所役屬居吐火羅故地東阨葱嶺西接波刺斯南雪山循縛芻水北有咀蜜種亦自國東西六百里所又東踰四種有鑊沙者廣三百里長五百里東界骨咄接葱嶺有十八種南有揭職稍大幅員準千里陵阜連屬多菽麥氣寒烈東南抵雪山六百里道吐火羅又踰五種至婆羅觀邏北踰山行六百里得烏菴種東北行二百里至河波羅水水西南流春夏澗凍北歷十二種有婆羅吸摩補羅最大種緜地四千里山周其外土沃產鎰水精北大雪山卽東女也歷十九種得摩揭陀又東過四種踰大河有迦摩縷波皆險地接西南夷其人類蠻獠行二月叩蜀南邊其東南野象羣暴故戰用象軍又南歷三十二種有狼揭羅者地大數千里其君治宰菴黎濕伐羅城西北卽波刺斯傳言廣萬里王治蘇刺薩儼那城土温溽引水爲田人富饒出金銀水精多工巧織錦褐氍毹產善馬橐它人服錦氍賦稅口出四銀錢又以交易西北距拂菻西南際海島有西女種皆女子多珍貨附拂菻拂菻君長歲遣男子配焉俗產男不舉又有臂多勢羅四種西北踰大山廣川歷小城聚行二千

里卽謝肥也北五百里有弗栗恃薩儼那地橫二千里縱千里其君突厥種治護怛那城東北大雪山盛夏常凍鑿冰乃可度下有安咀羅縛者地三千里西北踰嶺四百里有關悉多西北三百里有活種大二千里此三種皆居吐火羅故地臣于突厥君亦突厥種主鐵門南諸戎遷徙不常東又有七種東南峽道險甚無慮三百里得俱蘭東北山行五百里卽護密北識匿也南有商彌地大二千里而贏多蒲陶生雌黃鑿石乃得東北踰山七百里至波羅羅川東西千里南北百里春夏雨雪南有鉢露種多紫金行五百里有揭盤陀東行八百里出葱嶺又八百里至烏鐵環千里出白鑿青三種玉君長世臣揭盤陀北徑曠野五百里得疏勒東南五百里濟徒多水踰大沙嶺有斫句迦種或曰沮渠地千里東踰嶺八百里卽于闐也東有媯摩川度磧行二百里得尼壤城在大澤中地墊沕蘆焚荒茂行者鑿道趣城通于闐而于闐以爲東關又東行入大流沙人行無跡故往返輒迷聚遺骸以識道無水草多熱風觸人及六畜皆迷仆行四百里至故都邏又六百里至故折摩馱那古且末也又千里至故納縛波古樓蘭也自咀蜜以下諸種相與羣聚華人皆以國名之故未嘗與唐通傳記雜詭不可得而考然其地與諸國相連屬粗序其名云

蓋遠者本拔汗那或曰鐵汗元魏時謂破洛那去京師八千里居西鞬城在真珠河之北有大城大小城

百人多壽其王自魏晉相承不絕每元日王及首領判二朋朋出一人被甲鬪衆以瓦石相之有死者止以下歲善惡貞觀中王契苾爲西突厥瞰莫賀咄所殺阿瑟那鼠匿奪其城鼠匿死子遏波之立契苾兄子阿了參爲王治呼悶城遏波之治渴塞城顯慶初遏波之遣使朝貢高宗厚慰諭三年以渴塞城爲休循州都督授阿了參刺史自是歲朝貢玄宗開元二十七年王阿悉爛達干助平吐火仙册拜奉化王天寶三載改其國號蓋遠帝以外家姓賜其王曰寶又封宗室女爲和義公主降之十三載王忠節遣子薛裕朝請留宿衛習華禮聽之授左武衛將軍其事唐最謹

大勃律或曰布露直吐蕃西與小勃律接西鄰北天竺烏萇地宜鬱金役屬吐蕃萬歲通天遠開元時三遣使者朝故册其君蘇弗舍利支離泥爲王死又册蘇麟陀逸之嗣王凡再遣大首領貢方物小勃律去京師九千里而贏東少南三千里距吐蕃贊普牙東八百里屬烏萇東南三百里大勃律南五百里箇失蜜北五百里當護密之鞑勒城王居孽多城臨娑夷水其西山嶺有大城曰迦布羅開元初王沒謹忙來朝玄宗以兒子畜之以其地爲綏遠軍國迫吐蕃數爲所困吐蕃曰我非謀爾國假道攻四鎮爾久之吐蕃奪其九城沒謹忙求救北廷節度使張孝嵩遣疏勒副使張思禮率銳兵四千倍道往沒謹忙因出兵大破吐蕃殺其衆數萬復九城詔册爲小勃律王遣大首領察卓那斯摩沒勝入謝沒謹忙死子難泥立

死兄麻來兮立死蘇失利之立爲吐蕃陰誘妻以女故西北二十餘國皆臣吐蕃貢獻不入安西都護三討之無功天寶六載詔副都護高仙芝伐之前遣將軍席元慶馳千騎見蘇失利之曰請假道趨大勃律城中大會五六皆吐蕃腹心仙芝約元慶吾兵到必走出詔書召慰賜綵綳會領待我元慶如約蘇失利之挾妻走不得其處仙芝至斬爲吐蕃者斷髮夷橋是暮吐蕃至不能救仙芝約王降遂平其國於是拂菻大食諸胡七十二國皆震恐咸歸附執小勃律王及妻歸京師詔改其國號歸仁置歸仁軍募千人鎮之帝赦蘇失利之不誅授右威衛將軍賜紫袍黃金帶使宿衛

吐火羅或曰吐豁羅曰覩貨邏元魏謂吐呼羅者居葱嶺西烏濬河之南古大夏地與挹怛雜處勝兵十萬國土著少女多男北有頗黎山其陽穴中有神馬國人游牧牝于側生駒軋汗血其王號葉護武德貞觀時再入獻永徽元年獻大鳥高七尺色黑足類橐駝翅而行日三百里能噉鐵俗謂駝鳥顯慶中以其阿緩城爲月氏都督府析小城爲二十四州授王阿史那都督後二年遣子來朝俄又獻礪磧樹高三尺神龍元年王那都泥利遣弟僕羅入朝留宿衛開元天寶間數獻馬騏異藥乾陀婆羅二百品紅碧玻璃乃册其君骨咄祿頓達度爲吐火羅葉護挹怛王其後鄰胡羯師謀引吐蕃攻吐火羅於是葉護失里忙伽羅丐安西兵助討帝爲出師破之乾元初與西域九國發兵爲天子討賊肅宗詔隸朔方行營挹怛

國漢大月氏之種大月氏爲烏孫所奪西過大宛擊大夏臣之治藍氏城大夏卽吐火羅也噉王姓也後裔以姓爲國訛爲挹怛亦曰挹闐俗類突厥天寶中遣使朝貢俱蘭或曰俱羅弩曰屈浪鞏與吐火羅接壤地三千里南大雪山北俱魯河出金精琢石取之貞觀二十年其王忽提婆遣使者來獻書辭類浮屠語劫者居葱嶺中西及南距賒彌西北挹怛也去京師萬二千里氣常熱有稻麥粟豆畜羊馬俗死棄於山武德二年遣使者獻寶帶玻璃水精栝越底延者南三千里距天竺西北千里至賒彌東北五千里至瓜州居辛頭水之北其法不殺人重罪流輕罪放無租稅俗翦髮被錦袍貧者白氍自澡潔氣溫多稻米石蜜

謝颺居吐火羅西南本曰漕矩吒或曰漕矩顯慶時謂訶達羅支武后改今號東距罽賓東北帆延皆四百里南婆羅門西波斯北護時健其王居鶴悉那城地七千里亦治阿娑你城多鬱金瞿草曩泉灌田國中有突厥屬賓吐火羅種人雜居罽賓取其子弟持兵以禦大食景雲初遣使朝貢後遂臣罽賓開元八年天子册葛達羅支頡利發誓屈爾爲王至天寶中數朝獻帆延者或曰望衍曰梵衍那居斯畢莫運山之旁西北與護時健接東南距罽賓西南訶達羅支與吐火羅連境地寒人穴處王治羅爛城有大城四五水北流入烏濬河貞觀初遣使者入朝顯慶三年以羅爛城爲寫鳳都督府縛時城爲悉萬州授王節

寫鳳州都督管內五州諸軍事自是朝貢不絕石汗那或曰斫汗那自縛底野南入雪山行四百里得帆延東臨烏滸河多赤豹開元天寶中一再朝獻

識匿或曰尸棄尼曰瑟匿東南直京師九千里東五百里距葱嶺守捉所南三百里屬護密西北五百里抵俱蜜初治苦汗城後散居山谷有大谷五會長自爲治謂之五識匿地二千里無五穀人喜攻剽劫商賈播蜜川四谷稍不用王號令俗窟室貞觀二十年與似沒役槃二國使者偕來朝開元十二年授王布遮波資金吾衛大將軍天寶六載王跌失伽延從討勃律戰死擢其子都督左武衛將軍給祿居蕃似沒者北接石土俗與康同役槃亦與康隣出良馬俱蜜者治山中在吐火羅東北南臨黑河其王突厥延陀種貞觀十六年遣使者入朝開元中獻胡旋舞女其王那羅延頗言爲大貪暴賦天子但尉遣而已天寶時王伊悉爛俟斤又獻馬護蜜者或曰達摩悉鐵帝曰鑊侶元魏所謂鉢和者亦吐火羅故地東南直京師九千里而羸橫千六百里縱狹纒四五里王居寒迦審城北臨烏滸河地寒沍堆阜曲折沙石流漫有豆麥宜木果出善馬人碧瞳顯慶時以地爲烏飛州王沙鉢羅頡利發爲刺史地當四鎮入吐火羅道故役屬吐蕃開元八年册其王羅旅伊陀骨咄祿多毗勒莫賀達摩薩爾爲王十六年與米首領米忽汗同獻方物明年大會烏鶻達干復朝王死册其從弟護真檀嗣王二十九年身入朝宴內殿拜左金吾衛將

軍賜紫袍金帶天寶初王子頡吉匄請絕吐蕃賜鐵券八載真檀來朝請宿衛詔可授右武衛將軍久乃遣又遣首領朝貢乾元元年王紇設伊俱鼻施來朝賜氏李

箇失蜜或曰迦濕彌邏北距勃律五百里環地四千里山回緣之他國無能攻伐王治撥邏勿邏布邏城西瀕彌那悉多大河地宜稼多雪不風出火珠鑿金龍種馬俗毛褐世傳地本龍池龍徙水竭故往居之開元初遣使者朝八年詔册其王真陀羅祕利爲王問獻胡藥天木死弟木多筆立遣使者物理多來朝且言有國以來並臣天可汗受調發國有象馬步三種兵臣身與中天竺王阇吐蕃五大道禁出入戰輒勝有如天可汗兵至勃律者雖衆二十萬能輸糧以助又國有摩訶波多磨龍池願爲天可汗營祠因丐王册鴻臚譯以聞詔內物理多宴中殿賜資優備册木多筆爲王自是職貢有常其役屬五種亦名國所謂咀又始羅耆地二千里有都城東南餘七百里得僧訶補羅地三千餘里亦治都城東南山行五百里得烏刺尸地二千里有都城宜稼穡東南限山千里卽箇失蜜西南行險七百里得半斂蹉地二千里又得曷邏闐補羅耆其大四千里有都城多山阜人驍勇五種皆無君長云

骨咄或曰珂咄羅廣長皆千里王治思助建城多良馬赤豹有四大鹽山山出烏鹽開元十七年王俟斤遣子骨都施來朝二十一年王頡利發獻女樂又遣大首領多博勒達干朝貢天寶十一載册其王羅金

節爲葉護蘇毗本西羌族爲吐蕃所并號孫波在諸部最大東與多彌接西距鶻莽峽戶三萬天寶中王沒陵贊欲舉國內附爲吐蕃所殺子悉諾率首領奔隴右節度使哥舒翰護送闕下玄宗厚禮之多彌亦西羌族役屬吐蕃號難磨瀛犁牛河土多黃金貞觀六年遣使者朝貢賜遣之伊吾城者漢宜禾都尉所治商胡雜居勝兵千附鐵勒人驍悍土良沃隋末內屬置伊吾郡天下亂復臣突厥貞觀四年城會來朝額利滅舉七城降列其地爲西伊州

師子居西南海中延袤二千餘里有稜伽山多奇寶以寶置洲上商舶償直輒取去後隣國人稍往居之能馴養師子因以名國總章三年遣使者來朝天寶初王尸羅迷迦再遣使獻大珠鈿金寶瓔象齒白氎波斯居達遏水西距京師萬五千里而羸東與吐火羅康接北隣突厥可薩部西南皆瀕海西北羸四千里拂林也人數十萬其先波斯匿王大月氏別裔王因以姓又爲國號治二城有大城十餘俗尊右下左祠天地日月水火祠夕以麝揉蘇澤彫顏鼻耳西域諸胡受其法以祠祇拜必交股俗徒跣丈夫祝髮衣不剖襟青白爲巾帔緣以錦婦辨髮著後戰乘象一象士百人負則盡殺斷罪不爲文書決於廷叛者鐵灼其舌瘡白爲直黑爲曲刑有髡削小罪彫或系木于頸以時月而置劫盜囚終老偷者輸銀錢凡死棄于山服闋月除氣常歎熱地夷漫知耕種畜牧有鷲鳥能噉羊多善犬驢大驢產珊瑚高二三尺隋

末西突厥葉護可汗討殘其國殺王庫薩和其子施利立葉護使部帥監統施利死遂不肯臣立庫薩和女爲王突厥又殺之施利之子單羯方奔拂林國人迎立之是爲伊怛支死兄子伊嗣俟立貞觀十二年遣使者沒似半朝貢又獻活毒蛇狀類鼠色正青長九寸能捕穴鼠伊嗣俟不君爲大會所逐奔吐火羅半道大食擊殺之子卑路斯入吐火羅以免遣使者告難高宗以遠不可師謝遣會大食解而去吐火羅以兵納之龍朔初又訴爲大食所侵是時天子方遣使者到西域分置州縣以疾陵城爲波斯都督府卽拜卑路斯爲都督俄爲大食所滅雖不能國咸亨中猶入朝授右武衛將軍死始其子泥涅師爲質調露元年詔裴行儉將兵護還將復王其國以道遠至安西碎葉行儉還泥涅師因客吐火羅二十年部落益離散景龍初復來朝授左威衛將軍病死西部獨存開元天寶間遣使者十輩獻碼碯牀火毛繡舞筵乾元初從大食襲廣州焚倉庫盧舍浮海走大厯時復來獻又有陀拔斯單者或曰陀拔薩憚其國三面阻山北瀕小海居婆里城世爲波斯東大將波斯滅不肯臣大食天寶五載王忽魯汗遣使入朝封爲歸信王後八年遣子自會羅來朝拜右武衛員外中郎將賜紫袍金魚留宿衛爲黑衣大食所滅貞觀後遠小國君遣使者來朝獻有司未嘗參考本末者今附之左方曰火辭彌與波斯接貞觀十八年與摩羅游使者僧朝二十一年有健達王獻佛土茶莖五葉赤華紫須龍朔元年多福王難婆修疆宜說遣使者來朝

總章元年有末陀提王開元五年有習阿薩般王安殺並遣使者朝貢七年訶毗施王捺塞因吐火羅大
會羅摩獻師子五色鸚鵡天寶時來朝者曰俱爛那曰舍摩曰威達曰蘇吉利發屋蘭曰蘇利悉單曰建
城曰新城曰俱位凡八國俱位或曰商彌治阿賒颯師多城在大雪山勃律河北地寒有五穀蒲若榴
冬窟室國人常助小勃律爲中國候新城之國在石東北贏百里有弩室羯城亦曰新城曰小石國城後
爲葛邏祿所并

拂菻古大秦也居西海上曰海西國去京師四萬里在苦西北直突厥可薩部西瀕海有遲散城東南
接波斯地方萬里城四百勝兵百萬十里一亭三亭一置臣役小國數十以名通者曰澤散曰驢分澤散
直東北不得其道里東渡海二千里至驢分國重石爲都城廣八十里東門高二十丈鉅以黃金王宮有
三甕門皆飾異寶中門中有金巨稱一作金人立其端屬十二丸率時改一丸落以懸懸爲殿柱水精琉
璃爲椽香木梁黃金爲地象牙闥有貴臣十二共治國王出一人挈囊以從有訟書投囊中還省枉直國
有大災異輒廢王更立賢者王冠如鳥翼綴珠衣錦繡前無襟坐金藤榻側有鳥如鵝綠毛上食有毒輒
鳴無陶瓦屑白石墜屋堅潤如玉盛夏引水上流氣爲風男子剪髮衣繡右袒而帔乘輜駟白蓋小車出
入建旌旗擊鼓婦人錦巾家貲億萬者爲上官俗喜酒嗜乾餅多幻人能發火于額手爲江湖口嚼耗舉

足墮珠玉有善醫能開腦出蟲以愈目青土多金銀夜光璧明月珠大貝車磔礪木難孔翠虎魄織水
羊毛爲布曰海西布海中有珊瑚洲海人乘大舶墮鐵網水底珊瑚初生磐石上白如菌一歲而黃三歲
赤枝格交錯高三四尺鐵發其根繫網舶上絞而出之失時不取卽腐西海有市貿易不相見置直物旁
名鬼市有獸名贛大如狗獷惡而力北邑有羊生土中膺屬地割必死俗介馬而走擊鼓以驚之羔膺絕
卽逐水草不能羣貞觀十七年王波多力遣使獻赤玻璃綠金精下詔答賚大食稍彊遣大將軍摩拽伐
之拂菻約和遂臣屬乾封至大足再朝獻開元七年因吐火羅大會獻師子羚羊自拂菻西南度磧二千
里有國曰磨鄰曰老勃薩其人黑而性悍地瘴癘無草木五穀飼馬以槁魚人食鶻莽鶻莽波斯聚也不
恥蒸報於夷狄最甚號曰尋其君臣七日一休不出納交易飲以窮夜

大食本波斯地男子鼻高黑而髯女子白皙出輒鄣面日五拜天神銀帶佩銀刀不飲酒舉樂有禮堂容
數百人率七日王高坐爲下說曰死敵者生天上殺敵受福故俗勇于鬪土磽礧不可耕穡而食肉刻石
蜜爲盧如羣狀歲獻貴人蒲萄大者如雞卵有千里馬傳爲龍種隋大業中有波斯國人牧于俱紛廢地
那山有獸冒曰山西三穴有利兵黑石而白文得之者王走視如言石文言當反乃詭衆哀亡命於恆島
水劫商旅保西鄙自王移黑石寶之國人往討之皆大敗還於是遂疆滅波斯破拂菻始有粟麥倉庾南

侵婆羅門并諸國勝兵至四十萬康石皆往臣之其地廣萬里東距突騎施西南屬海中有撻拔力種無所附屬不生五穀食肉刺牛血和乳飲之俗無衣服以羊皮自蔽婦人明皙而麗多象牙及阿末香波斯賈人欲往市必數千人納麩劉血誓乃交易兵多牙角而有弓矢鎧稍士至二十萬數爲大食所破略永徽二年大食王微蜜莫末賦始遣使者朝貢自言王大食氏有國三十四年傳二世開元初復遣使獻馬鈿帶謁見不拜有司將劾之中書令張說謂殊俗慕義不可寘於罪玄宗赦之使者又來辭曰國人止拜天見王無拜也有司切責乃拜十四年遣使蘇黎滿獻方物拜果毅賜緋袍帶或曰大食族中有孤列種世酋長號白衣大食種有二姓一曰盆尼末換二曰奚深有摩訶末者勇而智衆立爲王關地三千里克夏臘城傳十四世至末換殺兄伊疾自王下怨其忍有呼羅珊木鹿人並波悉林將討之徇衆曰助我者皆黑衣俄而衆數萬卽殺末換求奚深種孫阿蒲羅拔爲王更號黑衣大食蒲羅死弟阿蒲恭拂立至德初遣使者朝貢代宗取其兵平兩京阿蒲恭拂死子迷地立死弟訶論立貞元時與吐蕃相攻吐蕃歲西師故鮮盜邊十四年遣使者含嗟烏鷄沙北三人朝皆拜中郎將賚遣之傳言其國西南二千里山谷間有木生花如人首與語輒笑則落東有末祿小國也治城郭多木姓以五月爲歲首以畫缸相獻有尋支瓜大者十人食乃盡蔬有顆葱葛藍軍達菱薤大食之西有苦者亦自國北距突厥可薩部地數千里

有五節度勝兵萬人土多禾有大川東流入亞俱羅商賈往來相望云自大食四十五日行得都盤西距羅利支十五日行南卽大食二十五日行北勃達一月行勃達之東距大食二月行西抵岐蘭二十日行南都盤北大食皆一月行岐蘭之東南二十日行得阿沒或曰阿昧東南距陀拔斯十五日行南沙蘭一月行北距海二日行居你訶温多城宜馬羊俗柔寬故大食常游牧於此沙蘭東距羅利支北恒滿皆二十日行西卽大食二十五日行羅利支東距都盤北陀拔斯皆十五日行西沙蘭二十日行南大食二十五日行恒滿或曰恒沒東陀拔斯南大食皆一月行北岐蘭二十日行西大食一月行居烏潯河北平川中獸多師子西北與史接以鐵關爲限天寶六載都盤等六國皆遣使者入朝乃封都盤王謀思健摩訶延曰順化王勃達王摩訶澀斯曰守義王阿沒王俱那胡設曰恭信王沙蘭王卑路斯威曰順禮王羅利支王伊思俱習曰義寧王恒滿王謝沒曰奉順王

費曰西方之戎古未嘗通中國至漢始載烏孫諸國後以名字見者寔多唐興以次修貢蓋百餘皆冒萬里而至亦已勤矣然中國有報贈冊帛程糧傳驛之費東至高麗南至真臘西至波斯吐蕃堅昆北至突厥契丹靺鞨謂之八蕃其外謂之絕域視地遠近而給費開元盛時稅西域商胡以供四鎮出北道者納賦輸臺地廣則費倍此盛王之鑒也

唐書卷二百二十一下

唐書卷二百二十一下考證
波斯傳是爲伊怛支○怛舊書作恆
伊嗣俟立○俟舊書作侯

唐書卷二百二十一下考證

